

Matiyu

Matiyu belen mere igin Yesu nin yitin kayyin

*Yesuyen megen nin asem yago
(Luk 3:23-38)*

¹ Gabe Yesu Kristuyen asem wen Abraham hitte mat wan wan Israel marte doyan al kurun Dewit hitte, irde yen hitte mat wan wanbe Yesu forok yirin goyen asande katinbe gahade:

² Be, Abraham urminbe Aisak. Aisak urminbe Yekop.

Munan Yekop urmin wenbe Yuda, itin wenyabe kulin yagoya.

³ Yuda urmin waranbe Peresya kulin Seraya. Irde ire itinya gote milinbe Tamar.

Peres urminbe Hesron. Hesron urminbe Ram.

⁴ Be, Ram urminbe Aminadap. Irkeb Aminadap urminbe Nason. Nason urminbe Salmon.

⁵ Salmon urminbe Boas. Boas milinbe Rahap. Bere gobe Yuda mar bere mon.

Boas urminbe Obet. Obet milinbe Rut. Bere gayen wor Yuda mar bere mon. Munan Obet urminbe Yesi.

⁶ Yesi urminbe Yuda marte doyan al kurun Dewit.

Dewit urminbe Solomon. Solomon milinbe Batseba. Bere gayen wor Yuda mar bere mon. Dewit belen un Uria mayke kamkeb tirin.

- 7 Solomon urmiᅇbe Rehoboam. Rehoboam urmiᅇbe Abia. Abia urmiᅇbe Asa.
- 8 Asa urmiᅇbe Yehosafat. Yehosafat urmiᅇbe Yehoram. Yehoram urmiᅇbe Usia.
- 9 Usia urmiᅇbe Yotam. Yotam urmiᅇbe Ahas. Ahas urmiᅇbe Hesehia.
- 10 Hesehia urmiᅇbe Manase. Manase urmiᅇbe Emon. Emon urmiᅇbe Yosaia.
- 11 Irkeb Yosaia urmiᅇbe Yehoiakinya kulin yagoya.
- Yehoiakinya kulin wenya hinhanyabe Babilon naᅇare niᅇ fuleᅇa mar belen waᅇ gasa yirde bul yirde meten mar miᅇ yirniᅇ yeᅇ Babilon yukamiᅇ.
- 12 Be, Babilon yukamiᅇ go mulgaᅇ heᅇ naᅇamde kwamiᅇ. Irdeb Yehoiakinbe urmiᅇ Sealtiel miᅇyaᅇ hiriᅇ. Sealtiel urmiᅇbe Serubabel.
- 13 Serubabel urmiᅇbe Abiut. Abiut urmiᅇbe Eliakim. Eliakim urmiᅇbe Aso.
- 14 Be, Aso urmiᅇbe Sadok. Sadok urmiᅇbe Akim. Akim urmiᅇbe Eliut.
- 15 Eliut urmiᅇbe Eleasa. Eleasa urmiᅇbe Matan. Matan urmiᅇbe Yekop.
- 16 Irkeb Yekop urmiᅇbe Yosep. Yosepbe Maria uᅇ. Maria biᅇde matbe Yesu Kristu* gogo forok yiriᅇ.
- 17 Niᅇgeᅇ Abraham hitte mat waᅇ waᅇ Dewit hitte hiriᅇ goyen asi basaᅇmiᅇ yagobe tumᅇaᅇ 14. Irde Dewit hitte mat waᅇ waᅇbe Babilon niᅇ mar

* **1:16:** Kristu gobe Hiburu mere matbe Mesaia. Gote miᅇbe alya bereya Al Kurun hitte Yumulgaᅇ teᅇ teᅇ Al.

belen gasa yirde Babilon yukamiñde goyenter wor asi basañmiñ yagobe 14 po. Irdeb gor mat wañ wañ Yesu Kristu kawañ hiriñde gor wor 14 po.

Maria belen Yesu kawañ kiryiñ

(Luk 2:1-7)

¹⁸ Be, Yesu Kristu kawañ hiriñ gobe ga-hade: miliñ Mariabe Yosep niñ tubul tenj untek yenj merem tiyamiñ gega, Mariabe Yosep goya tumñañ ma henya biñ yan hiriñ. Irkeb Yosep belen keneñ bebak tiyyiñ. Goyenpoga diriñ gobe Holi Spirityen tareñde Maria binde forok yiriñ goyen ma nurdeb kukuwamñeñ nuryiñ.

¹⁹ Gega Maria goyen tetek al Yosep gobe al huwak uliñde merem moñ geb, goyen keneñbe kawan po takira tike al budam nurkeb Maria go memya heñ heñ ge igiñ ma nurdeb bada heñ daha mat kura balmiñ tubul timewoñ yenj nurde hinhin.

²⁰ Goyenbe goke dufay heñ hikeyab Al Kurunyen miyoñ belen mitere forok yenbe inyiñ. “Dewit asem Yosep, gebe Maria tenj tenj niñ al belen daha wet kura gineñ gineñ niñ kafura heñ bada ma hawayiñ. Diriñ binde hi gobe Holi Spirityen tareñde forok yiyuñ. ²¹ Niñgeb binde hi gobe diriñ al diriñ kawañ kiryen. Yen belen gab alya bereyamiñ mata buluñ tenj han bana mat yumulgañ tiyyeñ. Niñgeb denembe ‘Yesu’† inayiñ,” inyiñ.

²² Be, mata kurun gabe Doyañ Al Kurun belen mere basañ almiñ momoñ irke basañ heñ tagalyiñ goyen gogo forok yiriñ. ²³ Mere tiyyiñ gobe

† **1:21:** Deñe gote miñbe “Dumulgañ tenj tenj Al”.

gahade: “Bere fonen kura alya ma kuŋ hitin belen bin henbe dirin al dirin kura kawan kiryen. Irkeb ‘Immanuel’ innayin,” inyin. Immanuel gote minbe ‘Al Kurunbe nenya hite’.

²⁴ Be, Yosep go mite tiyyinde mat huwardeb Al Kurunyen miyon belen sanin po mere iryin gwahade po Maria goyen ten yaminde kurin. ²⁵ Goyenbe yenya ma ferde hinaryum. Kuŋ kuŋbe Maria gobe dirin al dirin kawan kiryin. Irkeb Yosep belen “Yesu” inyin.

2

Nanja yenen bebak ten ten mar Yesu kinnin yen wayamin

¹ Be, Yesube Herot Yudia nanare nin doyan al kurun hinhinya Yudia nanja bana gon nin taun dirnen kura Betlehem gor kawan hirin. Be, dirin go kawan hirin kamereb nanja wan wan belen nin mar kura Yerusalem taunde wayamin. Mel gobe dinambe yenenbe kame da mata kura forok yiyyen goyen bebak ten hanyen mar. ² Be, mel go wanbe gusunan hamin. “Yudia nanare nin doyan al kurun hiyyen al gayamuŋ ga forok yiyun gobe dare hi? Nanja wan wan belen mat dinambemin kenenbe dolon irnin yen gago wayhet,” yamin.

³ Be, Herot go mere goyen nurdeb, “Dirin gore kame kurun hen asogo nirde gasunne tiyyen,” yenbe kafura hirin. Yerusalem taunde hinhan mar wor budam wor po mere go nurdeb dirin goke ten kanduk bulun kura forok yiyyen yen kafura hamin. ⁴ Irkeb Herot belen Al Kurun dolon ird ird mata doyan marte karkuwanjabe

Moseyen saba tagal tagal marya hoy yirdeb, “Mesaiabe damde kawañ hiyyeñ?” yineñ gusunañ yiryiñ. ⁵ Irkeb wol henbe, “Yudia nanare niñ taun Betlehem gor kawañ hiyyeñ. Al Kurunyen mere basañ al kura belenbe gahade kayyiñ:

⁶ ‘Be, den Betlehem niñ mar,
den hitte al kura forok yeñ nere alya bereya
Israel mar gote doyañ al kurun hiyyeñ.
Irkeb denñ dirñ goyen kurun hiyyeñ.

Niñgeb denbe Yudia naña bana goñ niñ al denem
yañ mar gote folek,’ yitiñ hi. *Maika 5:2*
Niñgeb Mesaiabe Betlehem forok yiyyeñ,” in-
amiñ.

⁷ Irkeb Herot belen dirñ gobe daha naña kawañ hiriñ goyen bebak tiye yeñbe naña wañ wañ belen niñ al karwo dinambe yeneñ bebak teñ teñ mar goyen balminde hoy yirdeb, “Daha naña wor po dinambe goyen forok yiyuñ?” yinkeb gwaha naña kintiñ inen momoñ iramiñ. ⁸ Irkeb Herot belen usi yirdeb, “Betlehem kunañ. Kuñbe diriñ goke kenkela po nanñkennayiñ. Keneñbe arañ po wañ momoñ nirnayiñ. Irkeb ne wor kuñbe dolon ireñ,” yinyiñ.

⁹ Be, mel gobe Herot belen gwaha yinkeb Betlehem kuniñ yeñ kwamiñ. Irkeb dinambe naña wañ wañ belen kenamiñ goyen naña kota mehen heñ kuñbe diriñ hinhin ya turte gor bada hiriñ. ¹⁰ Dinambe gore gwaha tike keneñbe mel go amañen nuramiñ. ¹¹ Irdeb ya bana hurkun diriña miliña goyen yeneñbe dokolhoñ yuguluñ teñ diriñ goyen dolon iramiñ. Irdeb det kura diriñ go unniñ yeñ yawayamiñ goyen hol yirdeb

unamin. Gol horaya det kura toropa yara kake hamin ten hiyen gwahade goyabe guram hamnen igin wor po yawayamin goyen unamin. ¹² Be, Al Kurunyen miyon belen mitere, “Mulgan hen Herot hitte ma kunayin,” yinen hayhay yiryin. Irkeb belen hoyan mat nanam kwamin.

Yosep belen Yesuya milin Mariaya yade Isip kurin

¹³ Mel go kukeb Al Kurunyen miyon belen mitere Yosep hitte forok yenbe, “Herot belen dirin gayen maymeke kami yen nankenen tiya. Ningeb huwarde dirinya milinya gayen yade busaharde Isip nanare kun gon hinayin. Irdeb ne po doyan nirde hinayin. Mulgan hena dinmeke gab mulgan henayin,” inyin. ¹⁴ Be, Yosep go bin bak yeke huwardeb wawun goyen po ire milinya go yadeb busaharde Isip nanare kwamin. ¹⁵⁻¹⁸ Irkeb Herot gobe doyan hemanbe nana wan wan belen nin mar gobe usi niran yen nurdeb bin ar wor po yirin. Irkeb Betlehemya tiyun muknen binyan bana gon nin al dirin dirnen damam irawa mat bam belen gobe tumnan gasa yirke kamnan yen fulen marmin hulyan yiryin. Gobe nana wan wan belen nin mar belen han kanya wor po nanamde dinambe kenaminde gor mat gagasiya damaya kpanyan henbe gogo, “Dirinbe damam irawa mat bam belenbe gasa yirnayin,” yinyin. Go tiyyin gobe bikken Al Kurunyen mere basan al Yeremaia belen yirin goyen forok yirin. Mereminbe gahade:

“Al belen al kura Rama taunde bin misin katen esen obam ten epte ma ten hike nuramin.

Esej gobe Resel belen dirnen wen kamde pasi hamin goke esen hinhin.

Ningeb al kura belen yolna irke bada hetek mon,”
yitin hi. *Yeremaia 31:15*

Be, Yosepya dirinminminya go kun Isip hike hikeb Herot go kamyin. Irke gab mulgan hamin. Go tiyamin gobe Doyan Al Kurun belen, “Urnebe Isip nana tubul ten wan wan nin hoy irmin,”* yirin goyen mere basan almin Hosea mere irke basan hen tagalyin goyen gogo forok yirin.

Yosepya dirinminminyabe Israel nanare mulgan hamin

¹⁹ Be, kame Herot go kamkeb Doyan Al Kurunyen miyon belen Yosep Isip hinhinya goyen mitere forok yenbe, ²⁰ “Yosep, dirin ga maynin yen hinhan marbe kaman. Ningeb huwarde ire milinya yade Israel nanare mulgan henayin,” inyin. ²¹ Irkeb huwarde ire milinya goyen yade mulgan hen Israel kwamin. ²² Goyenbe al kura belen, “Akelaus belen naniinde gasun ten Yuda nanare nin doyan al kurun Herot† hiyun,” yeke nurdeb kafura hen gor kutek ma iryin. Irkeb sopte po mitere Al Kurunyen miyon belen, “Galili nanare kunayin,” inkeb Galili kwamin. ²³ Kunbe taun kura Nasaret inen hanjyende gor keperamin. Gobe bikken Al Kurun belen, “Nasaret nin al inen hinayin,” yirin goyen mere basan marmin mere yirkeb basan hen tagalamin gwahade goyen po forok yirin.

* **2:15-18:** Hosea 11:1 † **2:22:** Herot gobe Israel doyan irde hinhan doyan mar karkuwan gote denje.

3

*Yon Baptais belenj mere tagalde hinhin
(Mak 1:1-8; Luk 3:1-18; Yon 1:19-28)*

¹ Be, dama budam kukeb al kura Yon Baptais inenj hinhan goyen Yudia nanjare sawsawa po kurunj nanja bana gonj wanjbe saba tagal tagal minj uryinj. ² Saba tenj hinhin gobe gahade: “Al Kurunj belenj alya bereyaminj doyanj yirtek nalube bikkenj binde hihi. Niñgeb yenj yufuk bana hitek yenj nurde hanj kenem mata bulunjinj yubul tenj yenj ge bitinj mulganj henayinj,” yinenj hinhin. ³ Metenj goyen tenj hinhin al Yon Baptais goke bikkenj Al Kurunjenj mere basanj al Aisaia belenj gaha yirinj: “Sawsawa po kurunj nanja bana gonj al kura forok yenjbe alya bereya belenj Doyanj Al Kurunjenj mere nurde gama ird ird ninj dufay gitik tenj tenj ge gahade kuware tagalde hiyenj:

‘Doyanj Al Kurunjenj belenj kernanj.

Belenjinj sope irde huwa irnanj,’ yenj hiyenj,”
yenj kayyinj. *Aisaia 40:3*

⁴ Be, al gote ulinhorbe dapnja kamel wuynenj belenj irtinj goyen hor irdeb dapnja sikkenj gore po kanminj irde ulinhor goyen mal temdere giti irde hiyen. Irdeb binjgeminjbe gusuya yalanju fiminja po nene hiyen. ⁵ Irkeb Yudia nanja bana gonj ninj taun kurunj Yerusalemja nanja bana gonj ninj taun hoyanj hoyanjyabe Yodan fe sinja bana gonj ninj marya kurunj goyen Yon hitte kunjbe ⁶ mata bulunminj ge Al Kurunj pohogay irkeb Yon belenj Yodan fe bana baptais yirde hinhin.

⁷ Be, Yuda marte tikula sañiñ po gama irde hanjen Farisi marya Sadusi marya budam Yon belej al baptais yirde hinhide gor wake yenenbe, “Deñbe mata buluñ po teñ hañ gega, mali baptais tiniñ yeñ wayhañ? Deñ gab dufaytiñ buluñ wor po kunere dirneñ weñ yara. Goyenbe mali baptais tetek gab Al Kurunjen bearar ma kentek yeñ nurde hañ? Ganuñ belej gwaha dinuñ? Epte ma wor po busaharnayiñ geb!

⁸ Niñgeb Al Kurunjen bearar bana ma hitek yeñ nurde hañ kenem mata buluñtiñ yubul teñ yeñ ge bitiñ mulgañ hañ gote igineñ Al Kurun diliñde mata igiñ huwak goyen po teñ hinayiñ. ⁹ Irde dindiken ge yeñ, ‘Neñbe Abraham dirneñ weñ,’ ma yeñ hinayiñ. Al Kurunbe igiñ hora gayen yade Abrahamyen dirneñ weñ yiryen geb, mata buluñtiñ ma yubul tinayiñbe meretiñ gobe miñ miñmoñ wor po hiyyen. ¹⁰ Be, saporbe bikken he miñde kerd kerd niñ ep irtiñ hi yara Al Kurun belej mata buluñtiñ gote murun gem duntek binde wor po hi. Niñgeb he kura igineñ ma heñ hiyen gobe ilde kak alare temeynayiñ go gwahade goyen po, deñ gayen mata buluñtiñ yubul ma tinayiñbe Al Kurun belej dakira teñ kak alare dimiyyen.

¹¹ “Nebe mata buluñtiñ yubul teñ Al Kurun niñ bitiñ mulgañ hekeb fe uliñ po baptais dirde hime. Goyenbe harhokner al kura wayyen. Al gote tareñbe kurun wor po. Yeñbe al turun yañ wor po geb, ne gahade gare epte ma yeñ ge teñ meten kurun titek hime. Kahañ basanmiñ teñ kuñ kuñ gobe meten kurun moñ gega, goyen

wor epte moŋ yeŋ nurde hime. Yeŋ belen gab Holi Spiritya kakya belen baptais diryen. ¹² Irde yeŋbe al kura wit iginen yawaren yeŋ kutum-min tukun iginenya sikkenya pota yirde iginenbe goyen yerd yerd ya bana yerde sikkenbe yade kumga tiyyen go gwahade goyen diryen. Niŋgeb al kame wayyen goreb meremin ma gama irde hinayin marbe kak huginjen hitekde gor yimiyyen,” yinyin.

*Yon Baptais belen Yesu baptais iryin
(Mak 1:9-11; Luk 3:21-22)*

¹³ Goyarebe Yesu gob Yon belen baptais niri yeŋbe Galili nanare mat Yodan fete kurin. ¹⁴ Wake kenenbe Yon belen pet tenbe, “Ge belen gab ne baptais nirtek gega, daniŋ bul mat, ‘Yeŋ belen baptais niri,’ yeŋ ne hitte wayha?” inyin. ¹⁵ Irkeb Yesu belen wol henbe, “Mekerke han kabe ne nurhem gwahade nira. Gogab Al Kurunyen dufay huwak wor po goyen tumnan deyya belen kawan forok iryen. Gwaha tiyen gab igin yeŋ nurde hime,” inyin. Irkeb Yon belen fe alare tukun baptais iryin.

¹⁶ Be, Yesu go baptais tenbe fe tubul ten sinare wayyin. Wakeb goyare goyen po nan kin hol yirin. Hol yekeb Holi Spiritbe Yesu hitte nu foy ten kattinjen ten yeŋ hende keperke yingen kinyin. ¹⁷ Irkeb al melak kura nan kinde mat, “Al gabe urne bubulkunne wor po. Yeŋ ge amanen wor po nurde hime,” yirin.

4

Ungura beley Yesu tunan uryin (Mak 1:12-13; Luk 4:1-13)

¹ Be, baptais tirin go kamereb Ungura Satan beley tunan uri yenbe Holi Spirit beley bul irde sawsawa po kurun nanja bana gon tukurin. ² Be, nan kahalya wawunya 40 gayen binje kutjare hinhin. Ningeb go kamereb binje bulun wor po iryin. ³ Irkeb tunan urtek al beley wanbe, “Ge gayen Al Kurun Urmin kenenbe hora ga yinke beret hena,” inyin. ⁴ Gwaha inkeb Yesu beley wol henbe, “Al Kurunen asande, ‘Albe Al Kurun beley mere titin kurun goyen nurde sanin hen hanen. Munan binje hende po ma hanen,’ gwahade katin hi,” inyin.

⁵ Go kamereb Ungura beley Yesu go Yerusalem Al Kurunen taun inen hanende gor tukunbe Al Kurunen ya balem kurun goyen hende hoyan wor pore kura gor tukuke huwaryin. ⁶ Irkeb sopte po inyin. “Al Kurunen asandebe gahade katin hi:

‘Al Kurun beley ge nin ten miyonmin hulyan yirke
wan haninde ganarkeb solok yawayin
goyen

hora unkenen beley mun kura kahanje umu-
law ma uryen,’ yitin hi.

Tikin

91:11-12

Ningeb ge gayen fudinde Al Kurun Urmin kenenbe solok yawa,” inyin. ⁷ Irkeb wol henbe, “Goyen goke wor, ‘Al Kurunge tunan ma urayin. Yenbe Doyan Al Kurun geb,’ yen asande katin hi,” inyin.

⁸ Be, kura goya po tunan ure yenbe Yesu goyen dugu kurunde kura gor tukunbe megen nin doyan mar karkuwan belen nana doyan yirde han goya tarenmin turnun yana kurun goyen tumnan ikala iryin. ⁹ Ikala irdeb, “Dokolhonje yugulun ten dolon nirke gab det kurun yenha gayen yubul ten gunen,” inyin. ¹⁰ Gwaha inkeb wol henbe, “Satan, hoyan kwa! Asandebe, ‘Al Kurun po ga Doyan Al Kurunje geb yende yufukde po henbe yen po dolon irde hayin,’ yitin hi gobe ma nurde ha?” inyin. ¹¹ Gwaha inkeb Ungura go tubul ten kurin. Irkeb Al Kurunyen miyon belen wan Yesu faran uramin.

*Yesu belen Galili nanare metenmin min uryin
(Mak 1:14-15; Luk 4:14-15)*

¹² Be, kamebe Yesu go Yon Baptais ten fere ten koyare keramin mere momon goyen nurdeb mulgan hen Galili nanare kurin. ¹³ Kun Nasaret tiyunde hinhin. Mun kura hitnen tenbe Kapeneam taunde kurkun gor hinhin. Kapeneam taun gobe Galili fe ala kurun goyen sinare Sebulunya Naptaliyat megenje hinhin. ¹⁴ Be, Yesu go Kapeneam kurkurin gobe Al Kurun belen mere basan almin Aisaia momon irke basan hen tagalyin goyen fudinde wor po forok yirin. Merebe gahade:

¹⁵ “Sebulun megenya Naptali megenyabe Galili makañde kurkun kurkun belen kurunde har.
Yenbe Yodan fe sinan kurhan har. Megen gabe Galili nana bana har.

Gonbe Yuda mar mon al min hoyan manan gon han.

16 Go mar gobe Al Kurun ma nurde unen mata bulun bana po hen kidoma bana hitnen ten han yen goyen hulsi kurun kura kennayin.

Al kidoma bana hen kamtin yara han yen gobe hulsi goyen forok yeke gote uren bana hinayin,” yitin hi. *Aisaia 9:1-2*

17 Be, Yesu go Kapeneam hen yabe saba tagal tagal metenmin min uryin. Sabaminbe gahade: “Al Kurun belen alya bereyamin doyan yirtek nalube binde hihi. Ningeb yen yufuk bana hitek yen nurde han kenem mata buluntin yubul ten yen ge bitin mulgan henayin,” yen hinhin.

*Komatmin kura hoy yirin
(Mak 1:16-20; Luk 5:1-11)*

18 Be, Galili makan ferenyan goyen kun hen yabe Saimon denem kurabe Pitaya kulin Andruya makede kaman temeyde hike yinyin. Ire itinya gobe makan dapna yad yad mar. 19 Kun yenenbe yinyin. “Wayyi. Wan gama niryi. Irkeb al yade Al Kurun hitte yukun yukun mar diren,” yinyin. 20 Gwaha yinkeb goyare po kamanmin yago yubul ten Yesu gama iraryum.

21 Mun kura kutnen tenbe ire itinya hoyan Yemsa Yonyabe nani Sebediya hakware hen kamanmin sope yirde hike 22 yenenbe hoy yirin. Irkeb ire itinya gore wor nani Sebedi goyen hakware gor po tubul tenbe Yesu gama iraryum.

*Garbam mar sope yirin
(Luk 6:17-19)*

²³ Be, Yesu go Galili naṅa bana goyen kuṅbe Yuda marte gabu yayan saba teṅ Al Kurun belen alya bereyamin doyan yird yird mere igin goke tagaldeb alya bereya garbammin kurayen kurayen manan goyen guram yirke igin heṅ hinhan. ²⁴ Irkeb yeṅ mata tiyyin goyen Siria naṅare nin mar wor nurtin ala tiyamin. Irdeb garbam kurayen kurayen goyen yukuteke sope yiri yeṅ Yesu hitte yawayamin. Alya bereya ulin misin kurun minyan, unguram yan, bu toneṅ minyan, tonan kukuwa minyan yabe ulin kamtin ya goyen yad wayamin. Irkeb tumnan guram yirde sope yiryin. ²⁵ Be, Galili naṅa, Dekapolis* naṅa, Yudia naṅa, Yodan fe sin a bana gon nin marya Yerusalem taun kurunde gor nin marya budam wan Yesu gama iramin.

5

Aman heṅ hinayin (Luk 6:20-23)

¹ Be, Yesu belen al buda kurun go yenenbe dondonende hurkun kipiryin. Komatmin yago wor yeṅ hinhide gor hurkamin. ² Irkeb sabamin min uryin. Sabaminbe gahade:

³ “Be, al kura nindikenbe epte mon yeṅ Al Kurun nin po nurde hinayin mar gobe Al Kurun belen alya bereyamin doyan yirde hi bana gon hinayin.

Nin geb goke amanen nurde hinayin.

* **4:25:** Dekapolis gote minbe “10 taun han.”

4 “Al Kura mata bulunminj ge kandukneñ wor po nurde hañ marbe Al Kurun belen binj yurum yiryen.

Niñgeb goke amanen nurde hinayin.

5 “Al kura neñ harhet harhet ma ten hañ marbe kame Al Kurun belen megen kurun gayen yunke yende hiyyen.

Niñgeb goke amanen nurde hinayin.

6 “Al kura Al Kurun dilinde mata huwak ten ten nin feya bingeya nin kamtinen ten hañ marbe Al Kurun belen mata huwak goyen yunen hiyen.

Niñgeb goke amanen nurde hinayin.

7 “Al kura al hoyan nin buninen nurde yunen hañ mar gobe Al Kurun wor buninen nurde yunen hiyen.

Niñgeb goke amanen nurde hinayin.

8 “Al kura binde dufay bulun ma kerde hañ marbe Al Kurun kenen hinayin.

Niñgeb goke amanen nurde hinayin.

9 “Al kura fulenaya kandukya yisikamde awalikde hen hen mata forok irde hañ marbe Al Kurun belen dirine wen yinyen.

Niñgeb goke amanen nurde hinayin.

10 “Al kura Al Kurun dilinde mata huwak ten hike al hoyan belen bulun bulun yirke kanduk kurayen kurayen yenen hañ marbe Al Kurun belen alya bereyamin doyan yirde hi bana goñ hinayin.

Niñgeb goke amanen nurde hinayin.

11 “Be, ne gama nirde hike al belen goke igin ma nurde sukal dirde bulun bulun dirde mere bulun

kurayen kurayen ulitiŋde irde hinayiŋ. Goyenbe goke ma nurde aman heŋ hinayiŋ. ¹² Kanduk teŋ hinayiŋ gote muruŋgembe Al Kurun beŋ kurun dunyeŋ. Niŋgeb goke amanen nurde hinayiŋ. Mata gobe tiŋen moŋ. Bikken Al Kurunyen mere basan mar yirde hinhan gwahade goyen po, den wor gwaha dirde hinayiŋ,” yinyiŋ.

Hulsiya fawya

(Mak 9:50; Luk 14:34-35)

¹³ Irdeb sopte po yinyiŋ. “Denbe al haŋ kurun gate faw yara. Fawbe meten miŋyaŋ. Goyenbe daha wet kura teŋ bulun hiyyenbe daha mat sopte igiŋ irtek? Epte moŋ. Niŋgeb faw bulun hitiŋ gobe wok irtek. Irkeb al beŋ ufurka teŋ kuŋ hinayiŋ.

¹⁴ “Irde denbe al megen haŋ kurun gate hulsi yara. Taun kurun kura doŋdoŋde hi gobe epte ma banare hiyen. ¹⁵ Gwahade goyen po al kura epte ma hulsi usuŋ urde teŋ koron po aw uryen. Gwahade yarab teŋ hende biŋuŋ irkeb al ya biŋ bana hinayiŋ goyen tumnaŋ hulsire hinayiŋ. ¹⁶ Gwahade goyen po denbe hulsi yara heŋ Al Kurun diliŋde mata wukken goyen al yikala yirde hinayiŋ. Gogab matatiŋ igiŋ goyen yenenbe Al Kurun saŋiŋ miŋyaŋ goyen isoka irde hinayiŋ.

Al Kurunyen mere saŋiŋ ire yeŋ wamiriŋ

¹⁷ “Be, moŋgo ne gayen nenenbe dufaytiŋdeb, ‘Yeŋ beŋbe Moseyen sabaya Al Kurunyen mere basan marte sabaya goyen walde pasi hewe yeŋ wayyiŋ,’ yeŋ ma nurnayiŋ. Nebe saba goyen wale yeŋ ma wamiriŋ. Gwaha titnenbe mere gote miŋ wor po goyen teŋ kawan irmeke nurnan

yeŋ wamiriŋ. ¹⁸ Fudinde wor po dinenŋ hime. Megenya nanŋiŋya hiriryenŋ goya goyen sabamiŋ gote mere bilmiŋ katiŋ goyen unŋkurenŋ muŋ kura bana ma kuyenŋ. Heŋ heŋbe sabamiŋ gote iginenŋ tumŋaŋ forok yenayiŋ. ¹⁹ Niŋgeb al kura sabamiŋ kura gama irtek metenŋ moŋ wor po goyen pel irde go ma gama irdeb al hoyanŋ wor go goya gama irde ma inyenŋ al gobe Al Kurunŋ belenŋ alya bereyamiŋ doyanŋ yird yird bana goŋ deŋem moŋ hiyyenŋ. Munanŋ al kura sabamiŋ gama irde al hoyanŋ saba yiryenŋ al gobe Al Kurunŋ belenŋ alya bereyamiŋ doyanŋ yird yird bana goŋ deŋem kurunŋ wor po hiyyenŋ. ²⁰ Fudinde wor po dinenŋ hime. Deŋ mata huwak tenŋ hinayiŋ goyen Farisi marya Moseyen saba maryat mata huwak goyen fole ma irnayiŋbe fudinde wor po epte ma Al Kurunŋ belenŋ alya bereyamiŋ doyanŋ yirde hi bana goŋ hurkunayiŋ.

Kanduk sope ird ird mata

²¹ “Be, bikkenŋbe Moseyen sabareb taytiŋ yagobe, ‘Al ma gasa yirke kamnayiŋ. Munanŋ al kura gwaha tiyyenŋbe merere huwarde murunŋem bulunŋ tiyyenŋ,’ yintiŋ goyen deŋbe nurde hanŋyen gogo. ²² Goyenpoga nebe go hende gaha dinenŋ tihim: al kura kadom inenŋ tiyyenŋ al gobe merere huwaryenŋ. Gwahade goyen po, al kura kadom, ‘Dufaygem moŋ,’ inyenŋ wor merem yanŋ heŋ Yuda marte doyanŋ mar diliŋde huwaryenŋ. Irde al kura belenŋ kadom kura, ‘Gebe kukuwa,’ inyenŋbe kak alare kuyenŋ.

²³ “Niŋgeb Al Kurunŋ galak ire yeŋ altare gor det yukunŋ henŋyab kadge kura belenŋ bulunŋ nurd

guntin goyen bege bak yekeb ²⁴ detge go alta dilin mar gor po yubul ten kun kadge goya kanduk go sope irde awalik hen gab mulgan hen Al Kurun galak irayin.

²⁵ “Be, al kura merem yan girde merere gukun hikeyab aran po kandukturin go belen kun henya sope iriryen. Monjo kun merere huwarkeb mere nurd nurd al belen gade kimyan titmin haniinde giryen. Irkeb kimyan titmin belen gade fere girde koyare gernayin geb. ²⁶ Fudinde wor po dinen hime. Kat sinare kwen yenbe hora gwahade kerayin guntin goyen tumnan po kerde pasi irde gab sinare kwayin geb,” yinyin.

Al berem yanbe huwak po hinayin

²⁷ Irde sopte yinyin. “Be, mere kurabe gahade yen hike nurde hanjen: ‘Al berem yanbe bere hoyan ma duwan yirde hinayin. Irde bere wor al hoyan ma duwan yirde hinayin,’ yitin. ²⁸ Goyenpoga nebe go hende gaha dinen tihim: al kura bere kura kenen gwaha irmewon yen bin huwaryen gobe bikken bere hoyanya duwan ten ten mata bulun goyen binde tiyyen. ²⁹⁻³⁰ Monjo ulge kurhan kura belen mata bulun tike ulge tumnan kak alare kwak geb, bulun tiyyen go po ten sina irayin. Delge yase belen mata bulun tikeb goyen marde temeyayin. Hange yase belen mata bulun tikeb go wor walde temeyayin.

Bere takira ten ten mata

(Matiyu 19:9; Mak 10:11-12; Luk 16:18)

³¹ “Be, denbe ‘Al kura berem takira tiye yenbe takira ten ten asan kan haniinde kerdebe takira tiyyen,’ gwaha yen hike nurde hanjen.

³² Goyenpoga nebe go hende gaha dinen tihim: al kura berem go al hoyan ma duwan irde hikeya epte ma takira tiyyen. Takira tike bere go kun al hoyan tiyyenbe bere goya un gergen goya Al Kurun dilinde leplep mata ten har yen yinyen. Goyenbe Al Kurun belen un bikkek gore yirke tahar yen un bikkek go minje iryen.” yinyin.

Biya ten ten mata

³³ Be, Yesu go sopte gaha yinyin: “Bikken Mo-seyen sabarebe taytin yago, ‘Biya ten henya usi ma ten hinayin. Al Kurun hitte biya tenbe biya tiyayin goyen po gama irayin,’ yintin goyen den wor nurde hanjen gogo. ³⁴⁻³⁵ Goyenpoga nebe go hende gaha dinen tihim: nanjinbe Al Kurunen maroro gasun. Irde megenbe yende kahan kerd kerd gasun. Irde Yerusalemben Doyan Al Kurun gote taun. Nin geb biya tinin yen goya det goyen goya den ma yurnayin. ³⁶ Tonantin yuwalhen un kuren kura goyen tarentinde epte ma umnam hoyan irnayin. Nin geb biya tenya tonantin ma den urnayin. ³⁷ Huginen mere fudinde po yen hinayin. Nin geb mere kura fudinde kenem, ‘Fudinde,’ yenayin. Munan fudinde mon kenenbe ‘Fudinde mon,’ po yenayin. Go hende mere kura sopte tinayinbe mere gobe Al Bulun hitte mat wayyen.

Wol hen hen mata

(Luk 6:29-30)

³⁸ “Be, mere kurabe gahade yen hike nurde hanjen: ‘Al kura belen delge upul tikeb ge belen wor wol hen dilin upul tiyayin. Irde misinje yufele tikeb ge belen wor wol hen misin yufele

tiyayiñ,' yitiñ. ³⁹ Goyenpoga nebe go hende gaha dinen tihim: al kura buluñ dirke goya matamiñ go wol ma hawayiñ. Al kura wañ ulunje yase belej señ gurke goya wol ma heñ kurhan wor tigiri teñ unayiñ. ⁴⁰ Irde al kura uliñhorge goke po teñ merere geren tikeb buniñen irde mene dibage manañ unayiñ. ⁴¹ Irde al kura parsay girde, 'Kandukne teñ 1 kilomita kwa,' ginkeb farañ ure yeñ nurde kandukmiñ teñ tebañ 1 kilomita kwayiñ. ⁴² Irdeb al kura det kurañ amu heñ gusuñan girkeb mali po teñ unayiñ. Munan al kura wañ detge kura belñen tewe ginkeya ga basaña ma irayiñ.

Asogo

(Luk 6:27-28,32-36)

⁴³ "Be, mere kurabe gahade yeñ hike nurde hanjen gogo: 'Kadtiñ yago niñ amañen nurd yunen hinayiñ. Irde asogotiñbe buluñ buluñ yirde hinayiñ,' yitiñ. ⁴⁴⁻⁴⁵ Goyenpoga nebe go hende gaha dinen tihim: Al Kurunbe al iginya bulunya tumñande nanaya kigariña yunen hiyen. Niñgeb asogotiñ ge amañen nurde yunen hinayiñ. Irde buluñ buluñ dirde hinayiñ mar gobe Al Kurun belej farañ yuri yeñ Al Kurun gusuñan irde hinayiñ. Gogabe denbe Al Kurun tareñmiñ kurun wor po gote dirñen weñ igiñ hinayiñ. ⁴⁶ Be, al kura den ge amañen nurde dunen hinayiñ mar goke po amañen nurnayiñbe Al Kurun belej gote murun gem dunen yeñ nurde han? Moñ. Teks yad yad marbe mata buluñ mar yinen hanjen goyen wor kadom ge amañen nurde igiñ igiñ yirde hanjen. ⁴⁷ Yuda mar moñ al miñ hoyan

wor kadom mere gird ten igin igin yirde hanyen. Niŋgeb kadtin yago po mere yirde igin igin yirde hinayinbe matatinbe mel gote folek yen nurde han? Mon. ⁴⁸ Nantin Al Kurun taren minyan gobe huwak wor po geb, den dirnen wen wor gwahade go po huwak hinayin,” yinyin.

6

Al faran yurd yurd mata

¹ Be, Yesu belen sopte gaha yinyin: “Be, Al Kurun dilinde mata igin ten hinin yenbe kenkela dufay hen ga mata ten hinayin. Al denke po ga mata ten hinin ma yen hinayin. Gwaha tinayinbe Adotin Al Kurun sanin minyan gore matatin gote murungem ma dunyen. ² Usi marbe al belen denen turun dirnan yenbe al buninen faran yurnin yen gabu yayan, kurabe belenyan huwarde bigul fu irde ga mata ten hanyen. Goyenbe den goya gwaha ma ten hinayin. Fudinde wor po dinen hime. Matamin gote murungembe al belen turun yirde hinayin goya go po tenayin. Kamebe hubu wor po geb. ³ Niŋgeb al buninen kura faran yurnin yenbe balmin po mata ten hinayin. Hantin yase belen mata igin kura tike goya hantin tapa belen go ma nuryen. ⁴ Gwahade goyen po al buninen faran yurnin yenbe al ma denen hikeya faran yurde hinayin. Irkeb Nantin Al Kurun taren minyan gore al faran yurd yurd mata banare ten hinayin gote murungem dunyen.

*Al Kurun mere ird ird mata
(Luk 11:2-4)*

⁵ “Be, usi marbe Al Kurun mere irniñ yeñbe al deney turun dirnanñ yeñ gabu yayanñ, kurabe belen kogorhonñyanñ al budam kunñ wañ teñ hanyende gor huwarde Al Kurun mere irde hanyen. Goyenbe denñ goya gwaha ma teñ hinayinñ. Fudinde dinenñ hime. Mataminñ gote murunñgembe al belen turunñ yirde hinayinñ goyare gog po tenayinñ. Kamebe hubu wor po. ⁶ Niñgeb Al Kurun mere irniñ yeñbe yatınñ bana hurkunñ yame tañbe Nantinñ Al Kurunñ banare hi goyen mere irde hinayinñ. Gogab Nantinñ belenñ banare henñ balminñ mata teñ hinayinñ goyen denenñbe gote murunñgem duneyñ.

⁷ “Yuda mar moññ al minñ hoyanñ belen unguraminñ dolonñ yirde henña mereninñ nurnayinñ yeñ mere sobamde po yeñ tebanñ teñ hanyen. Goyenbe denñbe Al Kurunñ mere irniñ yeñ goya gwaha ma teñ hinayinñ. ⁸ Adotinñ Al Kurunñbe denñ belenñ gusunñanñ ma irkeya bikkenñ det goke nurde hanñ yeñ nurde hi. Niñgeb mel go teñ hanñ gwaha ma teñ hinayinñ. ⁹ Niñgeb Al Kurunñ mere irniñ yeñbe gaha yeñ hinayinñ:

Adonininñ, gebe kurunñ wor po.

Huginñ turunñ girde hitek.

¹⁰ Gere alya bereya doyanñ yird yird mata goyen kawan forok irayinñ.

Irdeb dufayger metenñ teñ gote iginenñ ge hayende gor iginñ wor po forok yirde hayen gwahade goyen po,

megen gayen wor forok yirde hayinñ.

¹¹ Irdeb hanñkayen binñgebe gwaha mat nene ep nenayinñ yeñbe gwahade po dunenñ hayinñ.

- 12 Irdeb al hoyañ belen bulun dirke mata bulunmin halde yunen hityen gwahade goyen po,
mata buluninin halde dunen hayin.
- 13 Irdeb dubul tike tunan bulun bana ma kattedk.
Irde Al Bulun haninde mat dumulgan tiyayin.
- 14 Ningeb al kura bulun dirkeb mata bulunmin goyen halde yunnayin. Gogab Adotin tarenmin kurun gore wor mata buluntin halde dunyen.
- 15 Munan al kura bulun dirkeb halde ma yunnayin gobe Adotin tarenmin kurun gore wor mata buluntin go ma halde dunyen.

Binge kutna ird ird mata

16 “Be, usi marbe binge kutna irde henyabe kimin algup neke tupi sam tikeb al belen yenen mel gabe gwaha ten han yen dennan yen nurde mata ten hanjen. Goyenbe den goya gwaha ma ten hinayin. Matamin gote murungembe al belen turun yirde hinayin goya po tenayin. Kamebe hubu wor po. 17 Ningeb binge kutna irde henyabe fe gemde tonanting par ten kutnare hite yara ma ten kun hinayin. 18 Gogab binge kutnare hinayin goyen al belen gwaha ten han yen ma denen hinayin. Goyenbe Adotin banare hi gobe nurde hiyen. Ningeb mata balminde ten hinayin goyen gote murungem dunyen.

Megen nin samun
(Luk 12:33-34)

19 “Be, megen nin samunbe sisige belen walinayin, kurab kawé mar belen kawé dirnayin. Irde kurabe tiktuk irde bulun henayin. Ningeb dindiken ge nurde samun yade buda ma yirde

hinayiņ. ²⁰ Gwahade yarabe samuņtiņ goyen yade al farañ yurde hinayiņ. Irkeb Al Kurun belen gote murunġem igiņ wor po goyen kame duneņ yeņbe gasuņmiņde yerde hiyeņ. Gobe det kura belen epte ma buluņ yirnaiyiņ. ²¹ Dufaytiņ kurunbe samuņtiņ hiyeņde gor po hiyeņ geb, gago momoņ dirde hime.

²² “Be, diltiņbe ulitiņde hulsi yara. Niņgeb diltiņ igiņ hinayiņbe hulsire haņ yara Al Kurunyen samuņ banare hi goyen keneņ keņkela bebak teņ hinayiņ geb, heņ heņtiņ igiņ wor po hiyyeņ. ²³ Munañ diltiņ buluņbe samuņmiņ epte ma keneņ bebak teņ megen niņ samuņ niņ po nurde hinayiņ geb, heņ heņtiņ gobe kidoma belen po aw duryeņ. Niņgeb Al Kurunyen samuņ banare hi goyen keneņ bebak titek yarabe bebak ma tinayiņbe heņ heņtiņbe buluņ wor po hiyyeņ. ²⁴ Albe epte ma wawuņ unġureņde po doyaņ al irawa niņ meteņ teņ yunyeņ. Epte moņ wor po. Gwaha titteņbe doyaņ al kurabe harhok unyeņ. Munañ kurabe amaneņ nurd uneņ keņkela awalik irde hiyeņ. Niņgeb gwahade goyen po, epte ma Al Kurunya horaya tumņaņde meteņ teņ yunnayiņ.

*Heņ heņge niņ ug po ma dufay hawayiņ
(Luk 12:22-31)*

²⁵ “Niņgeb fudinde deneņ hime. Megen gar heņya daha mat biņgeya feya netek, irde ulniņdebe da yade umņa teņ hitek yeņbe heņ heņtiņ ge uguņ po ma dufay heņ hinayiņ. Biņgebe igiņ gega, gore po epte ma heņ heņtiņ igiņ iryeņ. Ultiņ umņa manañ gwahade po ulitiņ igiņ ma

iryeŋ. ²⁶ Be, nu niŋ nurnaŋ. Yeŋbe biŋge ma harde haŋyen. Irde sak yeke yade biŋge yadi yerd yerd yare ma yerde haŋyen. Goyenbe Al Kurun beŋeŋ paka yirde hiyen. Al Kurun saŋiŋ miŋyaŋ beŋeŋ nu wor gogo keŋkela po doyaŋ yirde hiyen. Munaŋ deŋbe nu gote folek wor po geb, dahadem Al Kurun beŋeŋ deney wasak tike biŋge kamnayeŋ? Epte moŋ geb. ²⁷ Deŋ gayen kura megen gar heŋ heŋ niŋ uguŋ po dufay henayeŋbe igiŋ nalutiŋ goyen muŋ kura siŋgir irde ulyaŋde hinayeŋ? Epte moŋ.

²⁸ “Irde daniŋ geb uliŋ umŋa niŋ uguŋ po dufay heŋ haŋyen? Yamun fuwalabe yeneŋmiŋ igiŋ muŋ wor po goke nurnaŋ. Yeŋbe uliŋ umŋa niŋ metey ma teŋ uliŋhor kura ma gada yirde haŋyen. ²⁹ Goyenbe fudinde wor po dineŋ hime. Bikken Israelyen doyaŋ al kurun Solomonbe uliŋ umŋa kusamuŋ wor po yerde hinhin. Goyenpoga uliŋ umŋamiŋ igiŋ wor po gore yamuŋ fuwala goyen epte ma fole yirtek hinhan. ³⁰ Yamun fugala gobe nalu sobamde ma haŋyen. Haŋka hinayeŋ, gisebe al beŋeŋ walde kakde yemeyde haŋyen. Be, gwahade goyen po, yamuŋ fugala gobe det kurun kura gogo moŋ gega, Al Kurun beŋeŋ doyaŋ yirde umŋa yirde hiyen geb, deŋbe daniŋ ulniniŋ umŋa ma gitik teŋ dunyeŋ yeŋ goke uguŋ po dufay heŋ haŋ? Deŋbe Al Kurun niŋ hekkeŋ wor po ma nurde haŋ. ³¹ Niŋgeb da biŋge netek, da fe netek, irde da yade ulniniŋ umŋa titek yeŋ goke dufay uguŋ po ma heŋ hinayeŋ. ³² Megen niŋ mar ne niŋ ma nurde haŋ gore gab det budam kurun gwahade goyen yad yad niŋ uguŋ po dufay

hen goke kanduknen nurde hanjen. Goyenbe Adotin Al Kurun sanin minyan gobe det goke nurde han yen bikken denen hiyen. ³³ Ningeb denbe Al Kurun belen doyan dird dirnya mata huwak ten tenya nin wa nurde hinayin. Irke gab Al Kurun belen den det kurun nurde hinayin kurun goyen wor dunen hiyen. ³⁴ Ningeb sopte fay urkeb daha titek yen goke dufay ugun po ma hen hinayin. Fay urke gab gwaha kura tiye yen nurnayin. Han kayen kandukbe han kayen po, munan giseyenbe giseyen po geb,” yinyin.

7

Kadinde mata goke bulun mat ma yawayin (Luk 6:37-38,41-42)

¹⁻² Be, Yesu go sopte gaha yinyin: “Al kura kadam mata tike kenenbe, ‘Nebe igin, munan yenbe bulun ten hi,’ yiyyenbe al go wor Al Kurun belen gwaha po iryen. Al kadin kurate mata daha mat kennayinbe Al Kurun wor gwaha mat dinyen. Ningeb al kadin belen mata kura tike goya den belen, ‘Nenbe huwak,’ yen nurde, ‘Al gobe danin bulun tiya?’ ma yen hinayin. Monjo Al Kurun belen den wor gwaha po diryen geb. ³ Denbe kadinde mata bulun muknen mun wor po mukun yara goyen yenen goke yen han. Goyenbe dindikenbe mata bulunbe he parwek karkuwan yara diltin pet ten han goyen go ma po nurde han. ⁴ He parwek gore huginen diltin pet titin han goyen ma yenenya dahade ningeb, ‘Kadne, mukun delger hi go ten sinja ire?’ inayin? ⁵ Dulin usi mar wor wor, mehenbe

dindikenjde diltinjde ninj he parwek go wa yade sinja yirnayin. Irde gab diltin kenkela nankenenbe kadtin dilinjde mukun goyen igin yad sinja yirnayin.

⁶ “Be, denbe det kura Al Kurun untek goyen yade kulu ma yunen hanjen. Irde selwen yara det damum hende hoyan goyen yade bu binde ma yemeyde hanjen. Gwaha yirkeb samun igin kura gogo yen ma nurde mali yufurka tinayin. Ninjeb gwahade goyen po, al kura Al Kurunyen merebe titminen min minmon yen nurde han mar gobe Al Kurunyen det mali mali ma yunen hinayin. Monjo mel gore tigiri ten buya kuluya belen disen sak dirtinen dirnayin geb,” yinyin.

*Al Kurun gusunan ird ird ninj bada ma henayin
(Luk 11:9-13)*

⁷⁻⁸ Irdeb sopte po gaha yinyin: “Be, al kura belen det kuran nurde Al Kurun gusunan irkeb unyen. Irde det kuran nankenen kurut yekeb ikala iryen. Irde yen belen alya bereyamin doyan yirde hi bana gon hurkun hurkun yame goyen mayde teban irkeb yame hol ird unyen. Ninjeb den wor det kura nin nurde Al Kurun gusunan irtinjde po hikeb dunyen. Det goke nankenen kurut yitinjde po hikeb dikala diryen. Irde yen belen alya bereyamin doyan yirde hi bana gon hurkun hurkun yame mayde teban irkeb yame hol ird dunyen.

⁹ “Be, den gayen al ganunbe dirinmin belen binje nin yekeb hora ten unyen? ¹⁰ Irde makan dapna nin yekeb kunere ten unyen? ¹¹ Den mata bulun mar wor dirintin yago belen det kuran

yekeb det igiñ po yunniñ yeñ nurde hanñen. Niñgeb Adotiñ Al Kurunñ saniñ miñyanñ gobe deñ megen niñ mar gote folek geb, gusunñanñ irkeb det igiñ wor po goyen dunyeñ geb.

¹² “Gwahade niñgeb mata teñ hinayiñ kurunñ gobe al hoyañ beleñ neñ gwaha gwaha dirde hiwoñ yeñ nurde hañ gwahade goyen po, deñ wor gwahade po yirde hinayiñ. Moseya Al Kurunñyen mere basañ marya beleñ saba teñ hinhan gote miñ wor pobe gago geb.

Yame dirñeñ bana hurkunayiñ

(Luk 13:24)

¹³⁻¹⁴ “Be, kak alare kuñ kuñ yamebe kurunñ, irde gor kuñ kuñ beleñbe meteneñ moñ. Niñgeb al budam yame goyen bana hurkunñ hañ. Munañ Al Kurunña hugiñ heñ heñ gasunñde gor kuñ kuñ yamebe dirñeñ muñ wor po. Irde beleñ manañ meteneñ. Niñgeb al yunñkureñ yunñkureñ beleñ muñ po gab yame goyen keneñ bebak teñ hañ. Niñgeb deñbe yame dirñeñ bana gore hurkunayiñ.

Heya he gote igineñya

¹⁵ “Be, Al Kurunñyen mere basañ mar falkuk niñ keñkela heñ hinañ ko. Go mar gobe dapña fulenam moñ sipsip yara heñ wanayiñ. Meremiñbe igiñ yara gega, biñ bana dufaymiñbe bulunñ wor po geb, kulu duwi beleñ al isitiñ yara heñ heñtiñ bulunñ wor po irnayiñ. ¹⁶ Gwahade mar gobe matamiñde po gabe fudinde Al Kurunñyen mere basañ mar ma usi mar wet goyen yeneñ bebak teñ hinayiñ. Al beleñ wain igineñbe kañ hoyañ hende ma yade hanñen. Fik he igineñ

wor he mali hende ma yade han̄yen. ¹⁷ Gwahade goyen po, he igin̄be igineñ igiñ po forok yirde hiyen. Munañ he bulun̄be igineñ bulun̄ po forok yirde hiyen. ¹⁸ Niñgeb he igin̄be igineñ bulun̄ ma forok yiryen̄. Munañ he bulun̄be igineñ igiñ ma po forok yiryen̄. ¹⁹ Niñgeb he kura igineñ igiñ ma forok yiryen̄ gobe ilde kak alare temeynayiñ. ²⁰ Niñgeb gwahade goyen po, matamiñ beleñ gab mel gobe gwahade mar yen̄ yenen̄ bebak tinayiñ.

²¹ “Be, alya bereya megen hen̄ya, ‘Doyañ Al Kurun̄, Doyañ Al Kurun̄,’ ninen̄ han̄ gega, al yun̄kuren̄ beleñ po Al Kurun̄yen alya bereya hen̄ayiñ. Adone Al Kurun̄ san̄iñ miñyan̄ gote du-fay goyen ken̄kela nurde go po gama irde han̄ mar po gab Al Kurun̄yen alya bereya hen̄ayiñ. ²² Nalu fun̄ande goyenterbe al budam beleñ, ‘Doyañ Al Kurun̄, Doyañ Al Kurun̄, neñbe san̄iñger merege basañ heñ tagalde hin̄het. Irde tareñger un̄gura yakira teñ mata tiñen̄ kurayen kurayen yirde hin̄het. Niñgeb neñbe gere alya bereya,’ ninnayiñ. ²³ Goyenbe ne beleñ kawan po, ‘Mata bulun̄ mar, nebe go ma wor po nurd dunen̄ hime. Hoyañ kunan̄!’ yinen̄.

Al irawayen ya ird ird mata
(Luk 6:47-49)

²⁴ “Be, gwahade niñgeb al kura merene nurde gama iryen̄ al gobe ya ire yen̄be tola metemiñ dukun̄ po talde hora po dalun̄ unyen̄ go gwahade goyen. ²⁵ Kigariñ kurun̄ kateñ figilu teñen̄ yan̄ kuyen̄. Irde meñe san̄iñ yare gor kuyen̄ gega, tolambe san̄iñ po yimiytiñ geb, epte ma tobo tike katyen̄. ²⁶ Goyenbe al kura merene nurde ga

gama ma iryen al gobe al kukuwa kura mulowo hende ya iryen go gwahade goyen. ²⁷ Niṅgeb kigarin kurun katen figilu tenen yan kuyen, irde menen sanin yare gor kukeb tolambe mulowo hende yimiytin geb, ya gobe katen bulun wor po hiyyen,” yinyin.

²⁸⁻²⁹ Be, Yesu go sabamin pasi irkeb gor hihan mar gore meremin go tonnen yan wor po nuramin. Irdeb hurkunƙat tenbe, “Ey, sabamin gabe Moseyen saba marte saba yara mon be!” yamin.

8

Al busuka minyan sope iryin (Mak 1:40-45; Luk 5:12-16)

¹ Be, sabamin go pasi irdeb dugure gor mat katen kun hikeb al budam gama irde kun hihan. ² Irkeb busuka minyan al kura gore wan kimin mar dokolhon yugulun tenbe, “Doyan Al Kurun, dufayger wilaknen nurdeb sope nirke igin hewen,” inyin. ³ Irkeb al go ulinde hanin kerdeb, “Igin guram giren. Niṅgeb igin hawa!” inyin. Irkeb goyare po busuka go tubul tike igin hirin. ⁴ Irkeb, “Igin haha gake al kura momon irak yo. Gwaha titnenbe Al Kurun dolon ird mata doyan mar hitte kun sikkenge yikala yirke kenenbe fudinde igin haha ginnayin. Irke gab Mose belen bikken yirin mata goyen gama irde dapna kura mel go yunnayin. Irkeb ge nin ten Al Kurun nin dapna go kumga tinayin. Irkeb al tunnan fudinde igin hihi yen gennayin,” inyin.

Fuleŋa marte doyaŋ alyen dufaymiŋ tareŋ
(Luk 7:1-10)

⁵ Be, gwaha tenbe Yesu go Kapeneam taunde kuriŋ. Irkeb Roma gabmanyen fuleŋa marte doyaŋ al* kura gore faraŋ nuri yeŋ wayyiŋ. ⁶ Irdeb, “Doyaŋ Al Kurun, meten alne kura uliŋ kamke uliŋ misiŋ kurun wor po katen yare ferde hi,” inyiŋ. ⁷ Irkeb Yesu beŋ, “Kuŋ sope ireŋ,” inyiŋ. ⁸ Irkeb al gore wol henbe, “Doyaŋ Al Kurun, ge beŋ ne al gahade gate yare kutek moŋ. Niŋgeb duliŋ mere po tikeb meten alne igiŋ hiyyen. ⁹ Ne wor doyaŋ alner yufukde hen yende mere po gama irde himyen. Irde ne wor fuleŋa mar kura doyaŋ yirde hime geb, al goyen kura, ‘Kwa,’ inmekeb kuyeŋ. Munan kurabe, ‘Waya,’ inmekeb wayyen. Irde meten alne manan, ‘Det ga ira,’ inmekeb gwaha po tiyyen,” inyiŋ. ¹⁰ Irkeb Yesu beŋ al gote mere go nurde tulfut yiriŋ. Irdeb gama irde kuŋ hinhan mar goyen fulgan kanbe, “Fudinde wor po dinhem. Israel bana ga ne niŋ dufaymiŋ saŋiŋ irtiŋ al kura gahade ma keneŋ himyen. Hubu wor po. ¹¹ Ga nurnan ko. Kame kame Al Kurun beŋ alya bereyamiŋ doyaŋ yirde hi bana goŋ dula mata kurun forok yiyyen. Goyenterbe Yuda mar moŋ al miŋ hoyan beŋ megen kurun ga hike kwa gayen kurhan mat mat waŋbe Yuda marte asem yago Abraham, Aisakya Yekopya irde gasunmiŋyan gasunmiŋyan keperde dulan ten hinayiŋ. ¹² Goyenbe Yuda marbe Al Kurun beŋ basiŋa yirtiŋ gega, ne niŋ dufaymiŋ saŋiŋ ma irnayiŋ mar gobe yakira tike

* **8:5:** Fuleŋa marte doyaŋ al gabe fuleŋa mar 100 doyaŋ yirde hiyen.

siɗare kidoma bana goɗ hinayin. Irde esenbe misin yisen hinayin,” yinyin. ¹³ Irdeb fulenɗa marte doyan al goyen, “Iginɗe kwa. Ne nin dufayge sanin irde ha geb, gwahade forok yewon yen nurha gwahade po forok yiyyen,” inyin. Irkeb meten alminbe Yesu beɗen mere tiyyin nalu goyenter po igin hirin.

Yesu beɗen al budam sope yiriyin

(Mak 1:29-34; Luk 4:38-41)

¹⁴ Be, Yesu go Pitayen yare kunbe Pita tenak aygan minyan ferde hike kinyin. ¹⁵ Irde kun haninde tanarkeb aygan go tubul tiyyin. Irkeb bere gore huwarde binɗe kan yunyin.

¹⁶ Be, kun hako ga kidoma hen hikeb unɗura ketal yurtin mar budam yawayamin. Irkeb Yesu beɗen unɗura go merere po yakira tiyyin. Irde al garbam minyan manan tunɗande sope yirke igin hamin. ¹⁷ Gwaha ten hinhin goke bikken Al Kurunyen mere basan al Aisaia beɗen asande mere kura gahade kayyin:

“Al gobe nende mata bulunya garbamninnya pasi yiryen,” yitin hi. *Aisaia 53:4*

Ninɗeb mere gote iginenbe mata gogo forok yirde hinhin.

Yesu gama irninbe det kura yubul tinayin

(Luk 9:57-62)

¹⁸ Be, Yesu gob al budam wan gabu irke yenenbe komatmin yago goyen, “Fe ala kurun ga sina iron mat kunin,” yinyin. ¹⁹ Irkeb Moseyen saba tagal tagal al kura gore wanbe, “Tisa, nebe ge kun hen taha kurun gobe gama po girde kun hen,” inyin. ²⁰ Irkeb wol hen, “Kulu duwibe ferd

ferd gasuŋ minyaŋ. Nu wor hagam yaŋ. Goyen-poga ne Al Urmiŋ† gabe gor kura ferde usaŋ hetek gasuŋnem moŋ,” inyiŋ. ²¹ Irkeb komatmiŋ hoyan kura goreb, “Doyaŋ Al Kurun, nebe gama giren gega, kuŋ adone wa teŋ mete teŋ gab waŋ gama giren,” inyiŋ. ²² Irkeb Yesu beleŋ, “Waŋ gama nira! Al kamtiŋ gobe tubul tike al ne niŋ ma nurde Al Kurun diliŋde kamtiŋ yara haŋ mar gore gab teŋ mete tinayiŋ geb,” inyiŋ.

Yesu beleŋ meŋe kurun masi irke tik yiriŋ
(Mak 4:35-41; Luk 8:22-25)

²³ Be, gwaha teŋbe hakwa kura go hende hurkuriŋ. Irkeb komatmiŋ yago wor go hende hurkuŋbe yeŋya kwamiŋ. ²⁴ Irke gwahade forok yewen tiya yeŋ ma nurkeya bemel po meŋe kurun huwariŋ. Irkeb duba karkuwan karkuwan funde waŋ hakwa mayde biŋde hurkuŋ ala heŋ hinhin. Goya goyenbe Yesube firinŋde hinhin. ²⁵ Irkeb komatmiŋ beleŋ kuŋ isaŋ heŋbe, “Doyaŋ Al Kurun, fe nene kamniŋ tihit geb, faraŋ dura!” inamiŋ. ²⁶ Irkeb huwarde, “Daniŋ geb ne niŋ hekkeŋ ma nurde kafura heŋ haŋ?” yinyiŋ. Irdeb meŋeya makanya bulun wor po hiriŋ goyen masi yirke kamaryum. ²⁷ Irkeb mel go hurkuŋkat teŋbe, “Da albe gago? Meŋeya makanya wor yende mere nurhar!” yeŋ kadom gusuŋaŋ gird tiyamiŋ.

Gadara marte nanjare kuriŋ
(Mak 5:1-20; Luk 8:26-39)

† **8:20:** Al Urmiŋ gote miŋbe alya bereya Al Kurun hitte Yumulgaŋ teŋ teŋ Al. Daniel 7:13 gorbe deŋem Al Urmiŋ goyen hi.

28 Be, meñe kamke mel go kuñ kuñbe Galili fe ala siña kurhan Gadara marte nanjare forok yamiñ. Irkeb al irawa kura unğura ketal yurtiñ bembayan heñ kuñ haryen gore Yesu hitte wayaryum. Al irawa gobe misiñeñ yañ wor po geb, albe yeñ haryenyañ gor kutek moñ. 29 Be, irem gore Yesu hitte wañbe, “Al Kurun Urmiñ, daha direñ wayha? Nalu hako hikeya bulun dire yeñ wayha?” ineñ kwep iraryum. 30 Be, goya goyenbe bu buda kurun kura sorte yarham po heñ dulan teñ hinhan. 31 Unğura gore Yesu goyen esen mere irdeb, “Dakira tiye yeñ nurdeb dad derke kuñ bu buda iro ketal yurtek,” inaryum. 32 Irkeb, “Kunan!” yinkeb unğura buda go al irawa goyen yubul teñ kuñ bu buda kurun go ketal yurkeb kuñ hamulare mat fe alare kateñ fe nene kamamiñ. 33 Irkeb bu doyañ yirde hinhan mar gobe busa harde taunde kuñbe al irawa unğuram yanja bu budaya hitte mata forok yiriñ kurun goyen goke al momoñ yiramiñ. 34 Irkeb al taunde niñ gobe tumñañ Yesu kinniñ yeñ gir yeñ wayamiñ. Irde wañ keneñbe, “Nanjaniniñde gar ma hayiñ. Dubul teñ kwayiñ,” ineñ esen mere iramiñ.

9

*Al uliñ kamtiñ sope iryiñ
(Mak 2:1-12; Luk 5:17-26)*

1 Be, gwaha irkeb Yesu go hakwa hende hurkuñbe mulgañ heñ meten teñ hiyen taunde Kapeneam kuriñ. 2 Irkeb al uliñ kamtiñ kura goyen sapir hende tawayamiñ. Irkeb Yesu belen mel gote dufaymiñ yeñ ge taren irtiñ go yenenbe

al goyen, “Diriñ, kandukneñ ma nurayiñ. Mata bulunđe halhem geb,” inyiñ. ³ Gwaha yekeb Moseyen saba mar kura beleñ go nurdeb, “Ey, Al Kurun beleñ po ga alyen mata bulun halde yunen hiyen gega, al gare gwaha tihim yeñ hi geb, al gabe Al Kurun sukal irde hi,” yeñ dufay hamiñ. ⁴ Irkeb dufaymiñ yeneñ bebak teñbe, “Daniñ geb bitiñde dufay bulun kerde hañ? ⁵ Damiñbe meteneñ yeñ nurde hañ? ‘Mata bulunđe halde gunhem,’ yihim goyen ma ‘Huwarde kwa,’ yeweneñ goyen? ⁶ Dufaytiñdebe al garbam sope ird ird gobe meteneñ yeñ nurde hañ. Niñgeb nebe deñ beleñ meteneñ nurde hañ goyen ireñ tihim. Irmeke gab megen garbe ne Al Urmiñ gabe alyen mata bulun halde halde sañiñ miñyañ yeñ neneñ bebak tinayiñ,” yinyiñ. Irdeb al uliñ kamtiñ goyen, “Huwarde gasunđe teñ yager kwa,” inyiñ. ⁷ Irkeb al go huwarde yamiñde kuriñ. ⁸ Irkeb al buda gor gabu iramiñ goyen mata go keneñbe hurkunƙat tiyamiñ. Irdeb Al Kurun beleñ al guram yird yird tareñ al yuntiñ goke Al Kurun turun iramiñ.

*Yesu beleñ Matiyo hoy iryiñ
(Mak 2:13-17; Luk 5:27-32)*

⁹ Be, gwaha teñ Yesu go gor mat hoyande kun henya be al kura denem Matiyo goyen teks yad yad gasunđe hike kinyiñ. Irdeb, “Wañ gama nira,” inyiñ. Irkeb al gore huwarde Yesu gama iryiñ.

¹⁰ Be, Yesuya komatmiñya Matiyuyen yare hen

binge nene hikeb teks yad yad marya* al kura Moseyen saba kenkela ma gama irde hike, “mata bulun mar” yinen hanjen mar goya wan yenya hen dulan ten hinhan. ¹¹ Irkeb Farisi mar belen go yenenbe Yesuyen Komatmin gusunan yirdeb, “Danin geb tisanbe teks yad yad marya ‘mata bulun mar’ yinen hityen mar goya bingge nene han?” yinamin. ¹² Irkeb mere go nurdeb Yesu belen, “Al ulinde igin po hiyenbe guram al nin ma nuryen. Al garbam minyan belen gab guram al nin nuryen. ¹³ Nebe nen al huwak yen nurde han mar goyen hoy yire yen ma wamirin. Goyenpoga nenbe mata bulun mar yen nurde han mar goyen hoy yire yen wamirin. Goke tenbe Al Kuru belen, ‘Nebe al belen galak nird nird nin ma nurde hime. Kadom buninen gird gird mata goke amanen nurde hime,’ yitin goyen kun min gwahade yen kenkela dufay hen nurnan ko,” yinyin.

*Bingge kutna mata nin Yesu gusunan iramin
(Mak 2:18-22; Luk 5:33-39)*

¹⁴ Be, gwaha yinenbe gor hinhin. Irkeb Yon Baptaisyen komatmin belen wanbe, “Nenya Farisi maryabe bingge kutna irde hityen gega, dahade geb komatge wenbe gwaha ma ten han?” inen gusunan iramin. ¹⁵ Irkeb Yesu belen wol henbe, “Albe tikin mere min alya tumnan henyabe danin esen hinayin? Epte mon. Goyenbe

* **9:10:** Teks yad yad marbe Israel mar nin ma meten ten hinhan. Roma gabman nin ten teks yade hinhan. Irde teks hora kurabe yingen ge yade hinhan geb, mel goke Israel mar belen igin ma nurde yunen hinhan.

tikin mere min al goyen asogom belen wan ten kuke gab yen ge nurde binje kutna irde hinayin,” yinyin. ¹⁶ Irde yenbe saba gergen tagalde hi goyen goke maya mere mat gaha yinyin: “Al kura amel gergen walde ten ulinhor bikkek erek yitin goyen ma pet ten gada iryen. Gwaha irkeb amel parwek gergen gore ulinhor bikkekde nin kan goyen yulun tenbe erek yitin yamen gobe sopte bulun wor po iryen. ¹⁷ Gwahade goyen po, al wain fimin gergen yade dapna sikken po wain fimin hen hen irtin bikkek bana gon ma unnayin. Gwaha irnayinbe wain fimin gergen goreb dapna sikken bikkek go kunga tikeb erek niyyen. Irkeb wain fimin wok yiyyen. Dapna sikken go manan gog po bulun hiyyen. Albe gwaha ma ten hanyen. Wain fimin gergenbe wain fimin hen hen dapna sikken gergen bana po unen hanyen. Irkeb det irawakde bulun ma hiriryen,” yinyin.

Bere dirnen kamtinja bere kura danduku minyanya goyen sope yiryin

(Mak 5:21-43; Luk 8:40-56)

¹⁸ Be, Yesu go saba yirde hikeyab gor nin doyan al kura wan Yesu dilin mar dokolhon yugulun tenbe, “Wernebe gayamu ga kama. Goyenbe kun hange ulinde kerkeb sopte huwaryen,” inyin. ¹⁹ Irkeb Yesu go huwarde al goya kwaryum. Komatmin yago wor gama irde kwamin.

²⁰⁻²¹ Be, hako kun hikeyab bere kura dama 12 gayen danduku manan hiyen gore dufayminde po, “Kun menere nin ulinhormin po sisan urenbe igin hewen,” yen nurdeb kame belen mat wanbe Yesuyen menje diba ulinhor goyen murunde sisan

uryiñ. ²² Be, bere gore gwaha tikeb Yesu belen fulgañ kañ kinyiñ. Irdeb, “Werne, kandukñeñ ma nurayiñ. Dufayge ne niñ sañiñ irha gore sope girke igiñ haha geb,” inyiñ. Irkeb goya goyen po igiñ hiriñ.

²³ Be, Yesu go kuñbe doyañ al wañ tupi ten kwaryum al gote yare forok yeñbe ya binde hurkuriñ. Hurkuñbe dolonđe niñ buleluñ fuk yird yird marya esen marya gabu irde hinhan go yinyiñ. ²⁴ Irdeb, “Bere gabe ma kama. Duliñ ferde hi. Niñgeb kat siñare kunañ!” yinyiñ. Irkeb mel goreb hinmañ fayken iramiñ. ²⁵ Be, al buda go yakira tike megen kuñ pasi hamiñ. Irkeb Yesu po hurkuñ bere go haniñde tanarkeb kamiñde mat huwariñ. ²⁶ Irkeb gote mere momoñmiñbe al naña bana go hinhan gobe nurde tukutiñ ala tiyamiñ.

Diliñ titmiñya mohon kattinya guram yiryiñ

²⁷ Be, Yesu mel go yubul ten kuñ hikeb diliñ titmiñ al irawa belen kuware, “Dewit Urmiñ, bunineñ dirde farañ dura be,” inen gama iraryum. ²⁸ Goyenbe Yesube nurd nurd yare hurkuriñ. Irkeb al irawa goyen manañ gama irde kukeb, “Der gayen epte sope diryen yeñ ne niñ dufaytiriñ sañiñ irde har?” yinen gusuñañ yiryiñ. Irkeb, “Gwahabe, Doyañ Al Kuruñ,” inaryum. ²⁹ Gwaha yekeb Yesu belen diliñyañ sisañ yurdeb, “Ne niñ dufaytiriñ tareñ irhar geb, nurhar gwahade po forok yiyyeñ,” yinyiñ. ³⁰ Irkeb diliñ wuk yeke nankenaryum. Irkeb, “Sope dirhem gake al kura ma po momoñ yiriryen,” yinen sañiñ po utañ yiryiñ. ³¹ Gega irem go siñare kuñbe Yesu

belen sope yiryin goyen tagalde tukukeb al naŋa bana goŋ nin gobe nurde pasi hamin.

³² Be, Yesuya komatminya goyen sinare heŋ kuŋ hikeb unŋura ketal urke mohon kattin al kura goyen Yesu hitte tawayamin. ³³ Irkeb Yesu belen unŋura go takira tikeb al mohon kattin goyen mere tiyyin. Irkeb al buda kurun gobe hurkuŋkat tenbe, “Israel naŋa bana gaŋ mata ga-hade kura ma keneŋ hityen!” yamin. ³⁴ Goyenbe Farisi marbe, “Unŋurayen kurunmin gote tarende unŋura yakira ten hi,” yamin.

Al Kurunyen meten marbe budam mon

³⁵ Be, Yesu go taunyanya tiyunyanya kurun goyen kuŋbe Yuda marte gabu yayan mere igin Al Kurun belen alya bereyamin doyan yird yird goke saba yirde hinhin. Irde al garbam min kurayen kurayen goyen sope yirde hike igin heŋ hinhan. ³⁶ Gwaha ten kuŋ henjab al buda go yinyin. Irdeb al buda gobe sipsip kura yewek minmon heŋ buninen buninen ten yingen gwaha mat kura sanin hetek mon yara yenenbe buninen wor po nurd yunyin. ³⁷ Irde komatmin yago siraw mere mat, “Binŋebe sak yen ep han gega, binŋe goyen yad yad meten marbe budam mon. ³⁸ Ninŋeb binŋe meten gote Doyan Al Kurun gusunan irkeb meten mar budam yad yerke metenminde gor kuŋ binŋe yade hinayin,” yinyin.

10

*Yesuyen mere basan mar 12
(Mak 3:13-19; Luk 6:12-16)*

¹ Be, Yesu belen komatmin 12 goyen yinke kun gabu irkeb garbammin kurayen kurayen sope yird yirdya unğura yakira ten ten tarenya yunyin.
² Yesuyen mere basan mar 12 gote denembe gago: mehendebe Saimon denem kurabe Pita. Irde kulin Andruya, Sebedi urmin waran Yemsya kulin Yonya. ³ Filipya Batolomiyuya Tomasya teks yad yad al Matiyuya. Irde Tadiusya Alfius urmin Yemsya. ⁴ Irde Saimon Selotyabe* Yesu asogom haniñde kiryin al Yudas Iskariotya.

*Mere basan marmın meten yunyin
 (Mak 6:7-13; Luk 9:1-6)*

⁵ Yesube go mar 12 goyen yad yerke kunin tiyamin. Kunin tikeb saba gahade yiryin: “Al min hoyan Yuda mar mon hitte ma kunayin. Irde Samaria marte taun kura bana ma po kunayin. ⁶ Israel marbe Al Kurunyen sipsip gega, meremin ma nurde duwi hamin geb, yen hitte kunayin. ⁷ Kun henyabe, ‘Al Kurun belen alya bereyamin doyan yird yird nalu gobe binde hihi,’ yinen tagalde hinayin. ⁸ Irde garbam mar sope yirde, al kamtin yisan hen, al busuka minyanbe sope yirde, al unğuram yanbe unğura go yakira ten kun hinayin. Taren gobe dulin tahan geb, gwahade goyen po den wor murungem mon dulin al faran yurde hinayin. ⁹⁻¹⁰ Irkeb meten ten hinayin goke al belen faran durde hinayin. Niñgeb kunin yenbe hora unğuren mun kura ma po ten kunayin. Irde kalwa ma yawarnayin.

* **10:4:** Yesu hinhin goyenterbe Roma gabman asogo irde hanjen mar kura hinhan. Go mar gobe Selot yinen hinhan.

Ulinhorbe ultinđe hañ gog ep geb, hoyañ ma yawarnayin. Kahañbasanya genunya wor hoyañ ma yawarnayin. ¹¹ Taunyanya tiyunyañya kuñbe al kura gargar dirtek al goke nañkenen yenenbe yenya hinayin. Yenya heñ kuñ kuñ metentin pasi irhet yen nurdeb yubul teñ hoyande wor kunayin. ¹² Be, al gote yare kuñbe ya miñ mar goyen, ‘Al Kurun belen bitin yisikamke ga hinayin,’ yinnayin. ¹³ Irke mel go den ge igin nurke yenenbe biñ kamke heñ heñ mata goyen gor po tubul tike hiyen. Munañ igin ma denke yenenbe biñ kamke heñ heñ mata gobe den hitte mulgañ hiyyen. ¹⁴ Al kura gargar ma dirde meretin ma nurkeb mel gore Al Kurunyen mere pel irhet yen bebak tinan yenbe kahañtinde niñ tupi go busañ heñ gab ya wet ma taun wet kura goyen tubul teñ kunayin. ¹⁵ Fudinde wor po dinen hime. Taun goyenter niñ marbe kame Al Kurun belen al iginya bulunya pota yiryen nalureb mata bulunmin gote murungem bulun wor po tenayin. Bikkeñ Sodomya Gomoraya taunde niñ mar belen mata bulun teñ hinhan gote murungem tamin gote folek wor po tenayin geb,” yinyin.

*Kanduk kurayen kurayen forok yenayin
(Mak 13:9-13; Luk 21:12-17)*

¹⁶ Be, Yesu go sopte gaha yinyin: “Den kunayin bana gonbe bulun dirtek marbe budam hañ. Niñgeb sipsip yad yemeke kulu duwi kahal bana kutneñ tinin tahañ. Niñgeb den meten teñ kuñ henyabe kunere belen keñkela dufay heñ ga mata teñ hanyen go gwahade goyen po teñ

hinayiñ.† Kalyiñgibe buluñ gog kura tiya yeñ ma nurde hityen. Niñgeb deñ wor matatiñ gwahade po teñ kuñ hinayiñ. ¹⁷ Irdeb al niñ nurde ga meten teñ hinayiñ. Mel gore merem yañ dirke merere huwarnayiñ. Irde kurabe gabu yayan dukun dusulak tinayiñ. ¹⁸ Ne niñ buluñ nurde hañ mar beñ dukun megen niñ doyañ mar kurayen kurayen diliñde merere derde hinayiñ. Irkeb ne niñ gusuñan dirkeb mel goya Yuda mar moñ al miñ hoyanya goyen momoñ yirnayiñ. ¹⁹⁻²⁰ Niñgeb wañ dade merere dukun gusuñan dirkeb daha yiniñ tihit yeñ barbar ma yenayiñ. Goyenter daha mat mere teñ teñ dufay duneñ duneñ albe deñ moñ. Goyarebe Holi Spirit beñ dufay dunke mere tinayiñ geb, goke kandukneñ ma nurde hinayiñ.

²¹ “Be, goyenterbe ire itinya igiñ ma heñ kura beñ al hay heke wañ gasa yirke kamde hinayiñ. Irde naniñ beñ wor dirneñ weñ gwahade po yirnayiñ. Irde diriñ beñ huwarde naniña miliñyat mere ma nurde asogo yirde gasa yirke kamnayiñ. ²² Al tumñan ne niñ igiñ ma nurde hañ mar beñ asogo dirde hinayiñ. Goyenbe gwaha dirde hike goke kafura ma heñ sañiñ po heñ hinayiñ. Kuñ kuñ funañdebe Al Kurun beñ dawaryeñ. ²³ Niñgeb ne niñ teñ buluñ buluñ dirkeb busaharde hoyañde kuñ hinayiñ. Fudinde wor po dineñ hime. Deñbe Israel naña bana niñ taun kurun gayen meten teñ kuñ pasi ma irkeya ne Al Urmiñ gayen mulgañ heweñ.

† **10:16:** Yesu beñ kunere niñ yiriñ gobe buluñ mat ma yiriñ. Kunerebe keñkela dufay heñ ga mata teñ hanyen goke nurde yiriñ.

24-25 “Be, dirinbe saba almin gote dufay epte ma fole iryen. Dufayminbe kun saba almin gote dufayya tunande henbe gor po bada hiyyen. Be, meten al wor doyan alminde meten goyen fole ma iryen. Metenminbe kun doyan almin belen meten ten hi gwahade po tenbe gor po bada hiyyen. Gwahade goyen po, denbe nere yufukner han. Ningeb al belen ne bulun nirde ungurayen kurunmin Belsebul nineh han kenem denbe daha dirnayin? Bulun wor po dirnayin. Al mali dentin ga mon yen nurde dunenbe mere bulun mat wor po dirde hinayin.

26 “Goyenpoga gwaha dirnayin mar goke ma kafura henayin. Dufayya mataya kura epte ma po banare hinayin. Banare hitin kurun gobe kame kawan po forok yeke al tumnan nurnayin.

27 Ningeb kamebe den momon dirde himyen gayen kawan po tagalde hinayin. Balminde mere dirde himyen goyen wor kawan tagalde hinayin.

28 Al mudunke kamnayin mar goke kafura ma hen hinayin. Yenbe ultin go po bulun irnayin. Munan go kamere tontinbe epte ma daha wet kura irnayin. Gwahade yarabe ultinya tontinya kak alare yemeytek albe unkuren go po gab kafura irde hinayin.

29 “Finfunbe nu muknen wor po gwahade kura yen yentek mon gega, Al Kurunbe bin sir ma yirde hiyen. Ningeb nu goyen kura daha wet kura tiyyen gob Al Kurunbe nurde hike ga tiyyen.

30 Tonantin yuwalnen epte ma kapyan hetek goyen wor Al Kurunbe gwahade han yen kenkela nurde hi. 31 Ningeb denbe Al Kurun dilindeb

fiɲfuɲ buda damum gote folek wor po yeɲ denen hi geb, heɲ heɲtiɲ ge kafura ma heɲ hinayiɲ,” yinyiɲ.

Yesu niɲ tagalde hinayiɲ

(Luk 12:8-9,51-53; 14:26-27; Mak 9:41)

³² Be, Yesu go sopte gaha yinyiɲ: “Al kura al hoyan diliɲ mar dufaymiɲ ne niɲ saɲiɲ irde hiyeɲ goyen tagalyeɲbe ne wor Nanne saɲiɲ miɲyaɲ gote diliɲ mar, ‘Al gabe nere,’ iney. ³³ Munan al kura ne niɲ yeɲ al hoyan diliɲ mar, ‘Nebe ma nurde unhem,’ yinyeɲ al gobe ne wor kame Nanne saɲiɲ miɲyaɲ gote diliɲ mar, ‘Al gobe ma nurde unhem,’ iney.

³⁴ Be, ga nurnan ko. Nebe fuleɲa mata isikamde kamde niɲ ma megen gar katmiriɲ. Ne wamiriɲ gake teɲbe fuleɲare hinayiɲ. ³⁵ Nebe megen han mar beleɲ mata gaha teɲ hinayiɲ yeɲ wamiriɲ. Mata gobe gahade:

‘Urmiɲ beleɲ naniɲ asogo iryeɲ.

Wirin beleɲ miliɲ asogo iryeɲ.

Bere beleɲ huwarde unɲe miliɲ asogo iryeɲ.

³⁶ Gwahade goyen po al asogo wor po yirtek marbe yiɲgeɲ miɲ bana gore po asogo yirnayiɲ.’ *Maika 7:6*

³⁷ “Irde al kura miliɲya naniɲya niɲ uguɲ po nurde ne ma gama niryeɲ al gobe epte ma komatne hiyyeɲ. Irde al kura urmiɲya wiriɲya niɲ uguɲ po nurde ne ma gama niryeɲ al goyen wor epte ma komatne hiyyeɲ. ³⁸ Irde ne niɲ teɲ kanduk yeneɲ kamde kamde niɲ bada henayiɲ marbe epte ma komatne henayiɲ. ³⁹ Irde al kura megen heɲ heɲmiɲ ge uguɲ po dufay heɲ hiyeɲbe

Al Kurunya epte ma hiriryen. Goyenpoga ne nin ten al kura hen henmin ge ma nurde gama nirde hiyen al gobe Al Kurunya hen hen gobe yende hiyyen.

⁴⁰ “Be, den meten ten kun hikeya igin dirde gargar dirde hinayin gobe ne gayen nirde han yen nuren. Gwaha niryen gobe ne po mon. Nanne nad nerke wamirin al goyen manan igin igin iryen. ⁴¹ Irde al kura, ‘Al gabe Al Kurunen mere basan al,’ yen kenen igin irde gargar iryen al gobe mere basan alyen murungem tiyyen. Irde al kura, ‘Al gabe al huwak,’ yen kenen igin irde gargar iryen al gobe Al Kurun belen al huwakyen murungem unyen. ⁴² Irde al denem mon gar han gayen kura komatne yen kenen bebak ten fe kura unke melak bida iryenbe gote murungembe son ma hiyyen,” yinyin.

11

Yesu belen Yon Baptais nin yirin (Luk 7:18-35)

¹ Be, komatmin 12 goyen saba yirde yirdeb yubul tike kwamin. Irkeb Yesube gor mat Galili nana bana gon nin taun hoyanjan wor Al Kurunen saba yirde meremin tagale yen kurin.

² Gwaha ten kun hikeb Yon Baptais koyare hinhide gor po henbe Yesu Kristuyen mere mon goyen nuryin. Irdeb komatmin kura hulyan yirin. ³ Irkeb kunbe, “Ge gayenbe Yon belen al kura kame wayyen yeke nurde hityen al goyenbe ge gago ma al hoyan nin doyan hen hitek?” inen gusanjan iramin. ⁴ Irkeb, “Mulgan hen kunbe

dindiken mere nurde hanja mata ten hime nenen hanya kurun goyen Yon momon irnayan. ⁵ Al dilin titminbe nankenen han. Kahan titminbe taren hen harde kun han. Al busuka minyanbe ulin igin hen han. Irde kirmin titminbe mere nurde han. Al kamtin manan sopte huwarde kun han. Irde Al Kurun belen megen nin alya bereya faran yurd yurd mere igin gobe al buninen wor nurde han gayen kun momon irnayan. ⁶ Irdeb, 'Al kura ne nin ten Al Kurun nin dufaymin taren irtin goyen go ma katyenbe Al Kurun belen guram irde sanin iryen,' yihi innayan," yinyin.

⁷ Gwaha yinkeb Yonyen komatmin go mulgan hen kwamin. Kukeb Yesu belen Yon nin momon yire yenbe gaha yinyin: "Denbe sawsawa po kurun nana bana gonbe da kinnin yen kwan? Dulin yamun kura meje belen tama yurtin goyen yinnin yen kwan? ⁸ Goyen mon kenem da wor po kinnin yen kwan? Al kura umna igin titin kura kinnin yen kwan? Mon. Al horam yan umna igin ten det igin igin nin po nurde han marbe megen nin doyan mar karkuwanen yayan po han. ⁹ Goyenbe da kun kinnin yen kwan? Al Kurunyen mere basan al? Gwaha, fudinde. Gega yenbe Al Kurunyen mere basan mar hoyan goyen yara mon. Yenbe gote folek. ¹⁰ Al goyen goke tenbe Al Kurunyen asande gahade katin hi:

'Mere basan alne ten kermeke yen wa mehen hen kuyen.

Mehen hen kunbe belenge sope irde gunyen,'
yitin hi. *Malakai 3:1*

¹¹ Be, yitiŋ gwahade po metenŋ tiyuŋ al gobe al hoyanŋ moŋ. Yon Baptais beleyŋ tiyuŋ. Niŋgeb fudinde wor po, bere beleyŋ kawanŋ yirtiŋ haŋ kurunŋ gayen Yonyen metenŋ goyen fole irtek epte moŋ hinhan. Yen beleyŋ metenŋ tiyuŋ gobe metenŋ hoyanŋ kurunŋ gote folek wor po tiyuŋ. Goyenbe yenbe ne gayen nenkela ma heŋ hi. Niŋgeb al kura denem moŋ gega nenkela heŋ bebak tenbe Al Kurunŋ beleyŋ yende alya bereya doyanŋ yirde hi bana goŋ hiyenŋ al gobe Al Kurunŋ diliŋdeb Yon folek yenŋ kinyenŋ.

¹²⁻¹³ “Be, Moseyen sabaya Al Kurunŋyen mere basanŋ marte sabaya asanŋde katiŋ gobe Al Kurunŋ beleyŋ yende alya bereya doyanŋ yird yird goyen tagalke wanŋ wanŋ Yon Baptais wor tagaluŋ. Niŋgeb Yon hitte mat wanŋ wanŋ gayen nalu hitere gabe Al Kurunŋ beleyŋ alya bereyaminŋ doyanŋ yird yird mata kawan forok yenŋ hike yenenbe al budam bana goŋ kuniŋ yenŋ nurde kurut wor po yenŋ haŋ. Goyenbe tarenŋminŋde tenŋ hikeb Al Kurunŋ beleyŋ alya bereyaminŋ doyanŋ yird yird goyen bulunŋ irde haŋ. ¹⁴ Yonbe bikkenŋ Elaia beleyŋ metenŋ tenŋ hinhin gwahade metenŋ tiyuŋ. Niŋgeb al kura kame Elaia wayyenŋ yenŋ Moseyen sabaya Al Kurunŋyen mere basanŋ mar beleyŋ tagaltiŋ goyen fudinde yenŋ nurde haŋ kenenbe Yon Baptais gobe al gogo yenŋ nurnayinŋ. ¹⁵ Al kirminŋ minyanbe mere gayen kenkela nurnanŋ ko.

¹⁶ “Be, gayenter niŋ marbe al matam dahade haŋ yewenŋ? Be, go mar gobe diriŋ kura gabu gasunŋde heŋ kari tenŋ henya yinŋenŋ ulinŋ kadom mohonŋde tenŋ hanŋyen go gwahade. Diriŋ gobe

kari ten henya kadom ginen tenbe, ¹⁷ ‘Nen belen buleluŋ fuk irde tikiŋ heŋ dunhet gega, gege ma tahaŋ. Irde esinayiŋ daw yeŋ al hakwa ambo irde irdere niŋ tikiŋ heŋ dunhet gega ma esahaŋ,’ yinen kwep kwep yirde haŋyen go gwahade.

¹⁸ Niŋgeb diriŋ ten haŋyen gwahade goyen po, mel gobe mere fudinde nurtek ma yirde hi. Niŋgeb Yon Baptais belen beretya wainya ma neke kenenbe, ‘Al gobe unguram yaŋ,’ inen hihan. ¹⁹ Munan ne Al Urmiŋ gabe biŋgeya wainya nemeke nenenbe, ‘Al gabe dulare niŋ al wor po. Irde yeŋbe teks yad yad marya Moseyen saba keŋkela ma gama irde hike “mata buluŋ mar” yinen hityen mar gote kadom,’ ninen haŋyen. Goyenpoga al kura dufay wukkeŋ miŋyaŋbe matamiŋ belen gab kawan forok irde hiyen geb,” yiniŋ.

Biŋ mulgaŋ ma heŋ haŋ mar

(Luk 10:13-15)

²⁰ Be, Yesu go gwaha yinenbe Al Kurunyen tarende mata tiŋen kurayen kurayen budam ten hike ga bebek ma tenbe mata buluŋmiŋ yubul ma ten Al Kurun hitte biŋ mulgaŋ ma hamiŋ mar goyen goke igiŋ ma nurde gaha yiriŋ: ²¹ “Be, den Yuda mar Korasin taundeya Betsaida taundeya haŋ marbe ne belen mata tiŋen kurayen kurayen ten himeke nenen bebek titek yara gega, gwaha ma ten asogo nirde haŋ. Niŋgeb den Yuda marte mata gwahade goke Al Kurun belen biŋ ar yeke gote murun gem buluŋ wor po dunyen geb, goke buniŋen nurd dunen hime. Ne belen Yuda mar moŋ al miŋ hoyan haŋyen taunde Tairya

Saidonya gor kuŋ mata tiŋeŋ forok yirmiriŋ manhan mel gob aran po bebak teŋ mata buluŋmiŋ ge kandukŋeŋ wor po nurde amil erekke hor yirde tupi sam teŋ mata buluŋmiŋ go yubul teŋ Al Kurunŋ niŋ biŋ mulgaŋ hewoŋ. ²² Fudinde wor po diŋeŋ hime. Tairya Saidonya taunde niŋ marte mata buluŋ gote muruŋgembe kurunŋ yarham. Goyenbe deŋ Yuda mar merene gama ma irde haŋyen gote muruŋgembe yende folek, buluŋ wor po tenayiŋ geb. ²³ Irde deŋ Kapeneam taunde niŋ mar, deŋbe dindikeŋ ge yeŋ, ‘Neŋbe deŋniŋiŋ yaŋ,’ yeŋ turuŋ turuŋ teŋ Al Kurunŋ niŋ bitiŋ ma mulgaŋ heŋ haŋ? Al Kurunŋ beleŋ kak ala bana demeyke kurkunayiŋ geb. Mata tiŋeŋ kurayen kurayen deŋ hitte forok yeŋ hike yeneŋ haŋ gayen Sodom taunde forok yeŋ hinhan manhan gor niŋ mar beleŋ mata goyen yeneŋbe mata buluŋmiŋ yubul teŋ Al Kurunŋ niŋ biŋ mulgaŋ hewoŋ. Irkeb buluŋ ma irkeb gaha naŋa gayenbe taun gobe hiwoŋ. ²⁴ Fudinde diŋeŋ hime, kame Al Kurunŋ beleŋ al igiŋya buluŋya pota yiryen nalureb Sodom niŋ marbe mata buluŋ teŋ hinhan gote muruŋgem buluŋ tenayiŋ. Goyenbe deŋ Kapeneam taunde niŋ marbe Sodom niŋ mar beleŋ kanduk tenayiŋ gote folek wor po tenayiŋ geb,” yiniŋ.

*Kanduk miŋyaŋ marbe Yesu hitte wanayiŋ
(Luk 10:21-22)*

²⁵ Be, goya goyenbe Al Kurunŋ mere irde, “Adone, gebe naŋkiŋya megeŋya gote Doyaŋ Al Kurunŋ. Gebe al yiŋgeŋ dufaymiŋ wukkeŋ yeŋ nurde haŋ marya megen niŋ alyen saba

karkuwan yawartin marya hittebe meten ten hime kurun gate min goyen bana kerde hayen. Goyenbe dirin belen nani milin hitte tawun hitin yara al kura yingende saninde epte mon yen nurde Al Kurun belen gab faran duri yen han mar hitte yikala yiran goke amanen wor po nurde turun girde hime. ²⁶ Fudinde, buniyengebe kurun geb, mata gwahade forok iran,” yirin.

²⁷ Irdeb, “Adone belenbe det kurun gayen doyan yird yird meten gobe ne nunyin. Nebe yende Urmin wor po geb, yen po gab kenkela nurde nunen hi. Al hoyanbe gwahade ma nurd nunen han. Irde Nannebe neya al kura ne belen basina yirde hime marya po ga nurd unen hite. Al hoyanbe gwahade mon. ²⁸ Ningen den kanduk kurayen kurayen yenen goke bitin misin nurde han marbe ne hitte wanan. Irkeb faran durmeke bitin yurum heke hinayin. ²⁹ Nebe delne kamtin, irde dufayne manan kipirtin. Ningen wan sabane nurde gama nirnayin. Irkeb faran durmeke bitin yurum hekeb hinayin. ³⁰ Sabane nurde gama irnayin dinen hime gobe metenen mon. Ne belen kanduk dunen hime gobe hipirken geb, ne hitte wanan,” yinyin.

12

*Yesube Sabat nalu gote min al
(Mak 2:23-28; Luk 6:1-5)*

¹ Be, Yesu go Sabat nalu goyenter komatmin yagoya wit meten kahalyan kun hinhan. Kun henyabe komatmin yago goyen binje yirkeb wit bilmin kura yade iginen nene hinhan. ² Irkeb

Farisi mar belen yenenbe, “Mel ga yena! Mel gabe Sabat nalure mata gwaha ma ten hinayin yen bisam irtin goyen ten han!” inamin. ³ Irkeb Yesu belen wol henbe, “Denbe Al Kurunyen asande Dewitya kadam yagoya binje kamde mata tiyamin gote baranmin goyen ma wor po kapyan hen nurde hanjen? ⁴ Dewitbe Al Kurunyen ya balem bana hurkunbe beret Al Kurun untin himam, Al Kurun dolon ird ird mata doyan marte kudinen goyen kadomya yad namin. Dewitbe Mose belen gwaha ma ten hinayin yitin goyen wor gogo tiyyin gega, goke kanduk kura ma kinyin. ⁵ Irde Al Kurun dolon ird ird mata doyan marbe Sabat nalure Al Kurunyen ya balem bana hen meten ten henbe Moseyen saba bulun irde hinhan. Goyenbe gote kanduk kura ma kenen hinhan goyen Al Kurunyen asande katinbe ma kapyan hen hanjen? ⁶ Fudinde dinhem. Mel gobe Sabat nalure Al Kurunyen ya balem bana meten ten hikeb mata bulun tahan ma yinen hanjen. Munan nebe ya gote folek geb, komatne yago neya tumnan hen Sabat nalure mata tahan gabe mata bulun mon geb. ⁷⁻⁸ Ne Al Urmin gabe Sabat nalu gote Doyan Al Kurun. Ningeb Al Kurunyen mere asande, ‘Nebe al belen galak nird nird nin ma nurde hime. Kadom buninen gird gird goke gab amanen nurde hime,’ yitin goyen den belen mere gote min nurde han manhan ulinde merem mon mar gayen bulun bulun ma yirde hiwon,” yinyin.

*Sabat nalure al hanin simsimam kura sope iryin
(Mak 3:1-6; Luk 6:6-11)*

⁹ Be, gwaha yinenbe gor mat kuŋ Yuda marte gabu yare kuriŋ. ¹⁰ Bana goŋbe al kura haniŋ simsim hitiŋ goyen gor hinhin. Irke Farisi mar gore da misiŋde kura uliŋde merem yaŋ irniŋ yeŋbe Yesu gusuŋaŋ iramiŋ. “Sabat nalurebe al kura garbam miŋyaŋ goyen sope irtek gobe Mo-seyen sabarebe igiŋ yitiŋ ma dahade?” inamiŋ. ¹¹ Gwaha inkeb, “Deŋ gayen sipsiptiŋ kura Sabat nalure mete titmiŋ bana kurkuyeŋbe igiŋ keneŋ wasak tinayiŋ? Moŋ, kuŋbe teŋ isaŋ heŋ siŋare kernayiŋ geb. ¹² Al Kurun diliŋdeb sipsipbe det dirneŋ, munaŋ albe det kurun wor po. Niŋgeb Sabat nalurebe mata igiŋ igiŋ po ga teŋ hitek,” yinyiŋ. ¹³ Irde al go, “Hange giŋ ira,” inyiŋ. Irke haniŋ giŋ irkeb haniŋ kurhan igiŋ hiyen go gwahade igiŋ wor po hiriŋ. ¹⁴ Goyenbe Farisi mar gobe siŋare kuŋ yiŋgeŋ uliŋ daha mat Yesu mayteke kami yeŋ mere sege iramiŋ.

Yesube Al Kurun beŋ basiŋa irtiŋ

¹⁵ Be, Farisi mar beŋ mata tiniŋ teŋ hinhan goyen bebak teŋbe gasuŋ go tubul teŋ hoyande kuriŋ. Kukeb al budam po gama irde kwamiŋ. Irkeb garbam miŋyaŋbe tumŋaŋ sope yirke igiŋ hamiŋ. ¹⁶ Gwaha yirde al buda go guram dirhem gake al hoyan ma momoŋ yirnayiŋ yeŋ hayhay yiryiŋ. ¹⁷ Mata kurun tiyyiŋ gobe Al Kurun beŋ mere basaŋ almiŋ Aisaia mere irke asaŋde kayyiŋ gote igineŋ kawan forok yiriŋ. Merebe gahade:

¹⁸ “Al gabe nere meten al, basiŋa irmiriŋ goyen.

Yeŋbe bubulkuŋne wor po yeŋ nurde unen hime.

Irde yeŋ ge amaŋeŋ wor po nurde hime.

Holi Spirit ten kermeke ketal uryen.

Irkeb ne beɓen al iginya bulunya pota yirde gote murungem yunen goyen megen al hike kwa kurun gayen momon yirde tukuyen.

¹⁹ Yenbe al kuraya kadom mohoŋde ten kwep kwep ma tiyyen.

Irde beɓenyan mere kuware ma ten hike nurnayin.

²⁰ Al kura bisike kokaŋ go gwahade, bulun hiniŋ ten hinayin goyen bulun ma yiryen.

Irde al kura bulun heŋ hulsi aymuk irtin yara hinayin goyen wor bulun ma yiryen.

Matamin gobe bada ma hiyyen.

Gwahade po ten tenbe alya bereyamin tumnan yumulgan ten pasi iryen.

²¹ Irke al min hoyan Yuda mar mon gore yen ge hekken nurde faran yurd yurd nin doyan irde hinayin,” yitin hi. *Aisaia 42:1-4*

Yesuya Belsebulya

(Mak 3:20-30; Luk 11:14-23; 12:10)

²² Be, gwaha yen hikeyabe al kura unɓura ketal urtin goyen ten wayamin. Al gobe dilin titmin irde mohoŋ manan kattin. Be, al gobe Yesu beɓen sope irkeb nankenen mere ten tiyyin.

²³ Irkeb gabu iramin mar beɓen mata go kenen hurkunƙat wor po tenbe, “Mesaia Dewit Urmin kame wayyen yen hanyen gobe al gago wet?” yamin.

²⁴ Goyenbe Farisi mar beɓen mere go nurdeb, “Mon, unɓurayen kurunmin Belsebulyen tarende unɓura gogo yakira ten hi,” yamin. ²⁵ Irkeb Yesu gobe al dufay heŋ hinhan

goyen yeneŋ bebaŋ teŋbe gaha yinyiŋ: “Tiyuŋ kuruŋ kura bana al beleŋ yiŋgeŋ uliŋ kadom asogo gird teŋ bur yenayiŋ gobe saŋiŋ ma heŋ buluŋ henayiŋ. Irde al miŋ dirŋeŋ kura wor gwahade po, yiŋgeŋ uliŋ kadom asogo gird teŋ bur yenayiŋbe tumŋaŋ saŋiŋ ma heŋ hinayiŋ. Taunde niŋ al wor gwahade po, awalikde ma hinayiŋbe epte ma saŋiŋ heŋ hinayiŋ. ²⁶ Niŋgeb gwahade goyen po Satan beleŋ yeŋ yufukde haŋ uŋgura buda goyen haram yirde yakira tiyyeŋbe dahadem saŋiŋ henayiŋ? Hubu geb. ²⁷ Goyenbe deŋ beleŋ Belsebulyen tareŋde uŋgura yakira teŋ hi nineŋ haŋ. Munan deŋ gama dirde haŋ mar wor uŋgura yakira teŋ haŋyen goyenbe ganuŋyen saŋiŋde mata go teŋ haŋ yeŋ nurde haŋ? Belsebulyen tareŋde ma Al Kurunyen tareŋde? Mel gobe uŋgura yakira teŋ teŋ saŋiŋbe Al Kurun hitte mat waŋ hi yeŋ nurde haŋ geb, deŋ beleŋ ne nineŋ haŋ gobe usi wor po irde haŋ yeŋ nurd dunnayiŋ. ²⁸ Niŋgeb nebe Al Kurunyen saŋiŋde uŋgura yakira teŋ himyen geb, Al Kurun beleŋ doyaŋ dird dird gobe bikkeŋ deŋ hitte gago forok yihi.

²⁹ “Be, daha matbe al kura gore kuŋ al hoyan tareŋ miŋyan gote yare hurkuŋ samuŋmiŋya detmiŋya yade kuyeŋ? Gwaha tiye yeŋbe al gore kuŋ saŋiŋ miŋyan al go wa teŋ fere teŋ gab epte yamiŋde niŋ detya samuŋmiŋya goyen yawaryeŋ.

³⁰ “Be, al kura ne niŋ ma heŋ haŋ marbe asogone. Irde al kura Al Kurun hitte al yukuŋ yukuŋ niŋ faraŋ ma nurde haŋ marbe al bur yirde meten go buluŋ irde haŋ yeŋ nuren. ³¹ Niŋgeb

al kura mata bulunya sukal mereyamin ge ten Al Kurun pohogay irkeb igin halde unyen. Goyen-poga al kura Holi Spirit sukal iryen gobe Al Kurun belen epte ma wor po halde pasi ird unyen. ³² Al kura ne Al Urmin gayen asogo nirde mere bulun tiyyenbe pohogay nirke igin halde pasi irde unen. Goyenbe al kura Holi Spirit belen meten ten hi yen nurd nurd ga asogo irde mere bulun tiyyen gobe epte ma wor po mata bulunmin goyen halde unyen. Megen gar henya, ma kame Al Kurunyen nalure gor wor epte ma halde unyen.

³³ “Hebe iginen belen gab dikala dirke he igin ma he bulun yen hanjen. Ningeb iginen igin forok yewon yen nurdeb he go sope irde haran henayin. He goyen sope irde haran ma henayinbe iginen bulun bulunen forok yenayin. ³⁴ Denbe kunere duwi yara bulun wor po geb. Meretinya matatinyabe bulun ala po. Ningeb den gwahade belen mere kura igin ma po tinayin. Hubu wor po. Bitin bana dufay bulun belen makin hitin gore mohontinde mat kat kun hiyen. ³⁵ Ningeb al iginbe binde dufay igin hinayin goyen yade kawan yirde hiyen. Munan al bulunbe binde dufay bulun hinayin goyen kawan yirde hiyen. ³⁶ Goke tenbe fudinde wor po dinen hime, Al Kurun belen al iginya bulunya pota yiryen nalure gorbe melaktin son heke ne nin mere bulun mat yitin kurun goke merere huwarde danin gwaha yamin goyen Al Kurun momon irnayin. ³⁷ Ningeb mohontinde mat mere kat kuyen gore gab nalu goyenter mere ten hanjen gote murungem igin dunyen ma bulun dunyen goyen

nurnayiñ,” yinyiñ.

Al Kurunyen sañiñde det kura irke kinniñ in-amin

(Mak 8:11-12; Luk 11:29-32)

³⁸ Be, Farisi mar kuraya Moseyen saba marya belen, “Tisa, Al Kurunyen sañiñde mata tiñen kura irke kinniñ yeñ nurde hite,” inamiñ. ³⁹ Irkeb Yesu belen wol heñbe, “Dufay bulun kerde mata manan bulun ten han mar goreb mata tiñen Al Kurun belen po ga irtek goke po gusunan hen hanyen. Goyenbe bikken Al Kurunyen mere basan al Yona belen mata ten mere tiyyin goyen po ga nurnayiñ. Mata tiñen hoyan kura ma kennayiñ. ⁴⁰ Yonabe makan dapna kurun binde wawun karwo gon hinhin gwahade po, ne Al Urmin gayen wor megen binde nankehalya wawunya karwo hen. ⁴¹ Irde Niniwe taunde nin mar gobe Yona belen kun Al Kurunyen mere basan hen tagalkeb mata bulunmin yubul ten Al Kurun nin bin mulgan hamin. Goyenbe alya bereya gayenter gayenbe ne saba ten hime gabe Yonayen saba gote folek gega, go ma nurde han. Ningeb Al Kurun belen al iginya bulunya pota yiryen nalurebe Niniwe nin mar belen huwardeb merene ma nurde han mar gayen minge yirnayiñ. ⁴² Bikken Solomon belen Israel nana doyan irde hinhinyabe nana gisaw nin doyan bere kurun kura Siba belen Solomonyen dufaymin wukken goyen nure yeñ wayyiñ. Goyenbe alya bereya gayenter nin gayenbe ne Solomonyen dufay folek gare saba yirde hime gega ma nurde han. Ningeb kame

Al Kurun belen al iginya bulunya pota yiryen nalureb doyan bere Siba belen huwardeb merene ma nurde han mar gayen merem yan yiryen.

⁴³ “Be, unğura kura al ulinde takira tike kat kuyen gobe mali nan̄a al ma hitek bana goñ kun usan heñ heñ gasun niñ nan̄kenen kun hiyen. Goyenbe gasun kura ma kinyen. ⁴⁴ Irdeb, ‘Bikken hinhem gasunde gor mulgan hewen,’ yiyyen. Irdeb mulgan heñ wanbe gasun bikkek gobe Al Kurunyen mere binde ma kiryin geb, halde haran heñ sope irtin yara kinyen. ⁴⁵ Irdeb kunbe sopte unğura 7 yende sanin folek goyen yupi ten tumnan wanbe al goyen ketal urnayin. Gwaha tikeb al gobe han̄kapa hinhin gwahade moñ, bulun wor po hiyyen,” yinyin.

Yesuyen kulinya hayminya
(*Mak 3:31-35; Luk 8:19-21*)

⁴⁶ Be, Yesu go hako po al buda kurun goyen mere yirde hikeb miliya kulinya belen mere irnin yen wan sinare heñ doyan irde hinhan. ⁴⁷ Irkeb al kura belen go yenenbe kun Yesu goyen, “Momkeya kolge wenya ginnin yen wan sinare ga han,” inyin. ⁴⁸ Irkeb wol henbe, “Ganunbe mamne? Ganunbe kolne yago?” inyin. ⁴⁹⁻⁵⁰ Irdeb komatmin yago yenen henyabe, “Al kura Nanne Al Kurun sanin minyan gote mere nurde go po gama irde han marbe kolne, hayneya mamne yagoya. Ningeb mamneya kolne wenyabe gago han,” inyin.

13

Yasuñ tej tej gote maya mere

(Mak 4:1-9; Luk 8:4-8)

¹ Be, go naña fay goyenter po Yesube hiyen ya go tubul tej kunj fe ala kurunñ sinare kura gor kipiryiñ. ² Irkeb sopte al buda karim ma wañ gabu iramiñ. Irkeb bada heñ hakwa kura hin-hin hende gor hurkunñ kipiryiñ. Keperde hikeb al buda kurunñ gob fe sinare huwarde hinhan. ³ Hakware gor heñyabe saba budam maya mere mat al buda go saba yiryiñ. Maya meremiñ kurabe gahade: “Yasuñ al kura det muykenñ tur ire yeñ kuriñ. ⁴ Metenñde kunj tur irde tukuriñ. Irkeb kurabe belenyanñ katamiñ. Irke nu belenñ wañ yenenbe namiñ. ⁵ Kurabe hora hereñ megenñ halgayiñyanñ katamiñ. Megeñ tolok monñ geb, aranñ po kawanñ hamiñ. ⁶ Goyenbe naña forok yeñ temeykeb filginiñ sanñ monñ geb, gwilgwal irde kamamiñ. ⁷ Det muykenñ kurabe yamuñ hiranñ yanñ hinhan bana goñ katenñ kawanñ hamiñ. Goyenbe yamuñ duwi gore hurkunñ awrum yurke nonbo hamiñ. ⁸ Munanñ det muykenñ kurabe megenñ igiñ wor poyanñ katenñ kawanñ hamiñ. Irde muykenñ unñkurenñde matbe 100 igineñ gwahade hamiñ. Muykenñ kurabe 60, munanñ kurabe 30 gwahade ala igineñ heñ tukamiñ. ⁹ Al kirminñ minyanñbe mere gayen kenñkela nurnanñ ko,” yiriñ.

Daniñ maya merere saba yird hinhin?

(Mak 4:10-12; Luk 8:9-10)

¹⁰ Irkeb komatminñ yago goyen kunjbe, “Daniñ geb maya mere mat alya bereya saba yirde ha?” inenñ gusunñyanñ iramiñ. ¹¹ Irkeb, “Al Kurunñ belenñ

alya bereyamiñ doyañ yird yird gote miñbe bannare hi geb, al hoyañ belen epte ma bebak titek. Goyen denbe Al Kurunyen tarende miñ goyen igiñ bebak tinayiñ. ¹² Niñgeb kenkela wor po merene palña irde nurde hinayiñ. Al kura binde mat fudinde wor po Al Kurunyen mere nurde hikeb Al Kurun belen meremiñ igiñ goyen unen tebañ irde hiyen. Munañ al kura gwahade moñ gobe Al Kurunyen mere binde muñ kura hiyen goyen wor teñ siña iryen. ¹³ Al gwahade gobe det yennayiñ gega, epte ma det gote miñ nurnayiñ. Irde merebe nurnayiñ gega, epte ma mere gote miñ bebak tinayiñ. Niñgeb gwahade po teñ hinayiñ yenbe gago maya mere mat saba yirde himyen.

¹⁴ Al gwaha teñ hañ gokeb Al Kurunyen mere basañ al Aisaia belen Al Kurunyen mere nurde asañde kayyiñ gobe gago forok yen hi. Merebe gahade:

‘Denbe merene nurde hinayiñ, irde kenen hinayiñ gega, bebak ma po teñ hinayiñ.

¹⁵ Fudinde wor po, mel gate binbe sañiñ wor po. Kirminbe migisuñ yurtiñ, irde diliñbe mala titiñ.

Moñ manhan kirminde nurde, diliñde yenenbe binde matbe bebak wor po teñ ne hitte mulgañ heñ wake sope yirmewoñ,’ yitiñ hi.

Aisaia 6:9-10

¹⁶⁻¹⁷ Niñgeb fudinde wor po diniñ hime. Bikken Al Kurunyen mere basañ marya al huwak bikken hinhan gobe daha wor den belen mata kurun yenen hañ gayen yentewoñ yen nurde hinhan. Goyenbe go ma yenenya kamamiñ. Mere den

nurde hañ gayen wor nurtewoñ yeñ nurde hinhan. Goyenbe ma nuramiñ. Munañ denbe nalu igiñde forok yañ geb, diltiñde det igiñ yeneñ, kirminñtiñde mere igiñ igiñ nurde hañ gago. Niñgeb goke amañeñ nurde hinayiñ.

¹⁸ “Gwahade geb yasun alyen maya mere gote miñ momoñ direñ tihim geb, keñkela nurde bebak tinañ ko. ¹⁹ Muykeñ belenyañ katamiñ gote miñbe da? Gobe al kura Al Kurunñ belen yende alya bereya doyañ yird yird saba gote miñ nurde bebak ma tiyyeñ. Irke uñgura belen wañ saba go teñ siña irde biñ sam irke mere goke ma nuryeñ go gwahade. ²⁰ Megen halgayiñya hora arat hereñ det muykeñ katamiñ gote miñbe gahade: al kura Al Kurunñyen saba tiñeñya nurdeb arañ po igiñ igiñ yeñ gama iryeñ. ²¹ Goyenbe mere go keñkela ma biñde kurkuñ kipiryen geb, ulyañde ma Al Kurunñyen mere goyen gama iryeñ. Al Kurunñyen saba nurde gama irde hiyeñ gega, al belen bulun bulun irke gote kanduk keneñbe bada heñ arañ po Al Kurunñyen saba go tubul tiyyeñ. ²² Yamunñ duwi forok yitiñ bana det muykeñ katamiñ gote miñbe gahade: al kura Al Kurunñyen saba nurde gama irde hiyeñ. Irde megen niñ mata teñ teñya megen niñ samunñ yad yad dufay belen tulunñ tikeb Al Kurunñyen saba goyen igineñ miñmonñ hiyyeñ. ²³ Goyenpoga megenñ igiñyañ wor po katamiñ gote miñbe gahade: al kura Al Kurunñyen saba nurde bebak teñ gama irde hiyeñ gob gote igineñbe budam wor po forok yenayiñ. Muykeñ kurabe igineñ 100 forok yiryenñ. Kurabe 60, munañ kurabe 30 forok yiryenñ go gwahade.

Muykenj buda gob iginej kurayen kurayen forok yenayinj,” yinyinj.

Yamuñ bulunyen maya mere

²⁴ Be, Yesu go gwaha yinej saba yire yenbe maya mere hoyañ gahade yinyinj: “Al Kurun belej yende alya bereya doyañ yird yird gobe gahade: al kura wit muykenj goyen metenjinde yukunj tur yiryinj. ²⁵ Goyenbe wawunbe al tumñañ firinje hikeb al gote asogom belej kunj yamuñ duwi muykenj goyen wit muykenj tur irtinjan goyen tur yirde yukunbe kurinj. ²⁶ Kame wit go kawanj heñ kunj iginej hiniñ teñ hikeb yamuñ duwi goyen manañ forok yeñ tukaminj. ²⁷ Irkeb metenj gote miñ alyen metenj mar belej wanbe, ‘Doyañ al, gebe wit muykenj harañ gega, yamuñ duwi gob daha mat forok yañ?’ inaminj. ²⁸ Irkeb, ‘Asogone kura belej mata ga tiyunj geb,’ yinyinj. Irkeb metenj marminj belej, ‘Ninğeb kunj wasininj?’ inenj gusunañ iraminj. ²⁹ Irkeb, ‘Goñminj. Moñgo wasehet yeñ wit manañ tumñañ wasinak ge. ³⁰ Yubul tike tumñañde karkuwanj henayinj. Sak nalure gab wasitek. Goyare gab metenj marne yamuñ duwi wa walde kumga teñ teñ niñ yad fere teñ yernayinj. Munañ witbe yade yukunj yadi yerd yerd ya kurunde gor yernayinj,’ yinyinj,” gwahade Yesu belej mel go momon yiryinj.

*Mastet bilminya yisyat maya mere
(Mak 4:30-32; Luk 13:18-21)*

³¹ Be, Yesu go maya mere hoyañ wor yinyinj. “Al Kurun belej alya bereyaminj doyañ yird yird gobe mastet he bilminj dirneñ munj wor

po go gwahade. Al kura belen mastet bilmin goyen tenbe metenminde haryin. ³² Det hoyan muykenbe karkuwan, munan mastet he muykenbe dirnen mun wor po gega, kawan hen kurun henbe metende gor det haryin goyen fole yiryen. Irkeb nu belen wan hani heren hagam yirde gor hinayin,” yinyin. ³³ Irdeb sopte po siraw mere hoyan yinyin. “Al Kurun belen yende alya bereya doyan yird yird gobe Bere kura yis ten palawa kurunya tigiri ten tubul tikeb palawa go ditdi nene kurun hiyyen go gwahade goyen,” yinyin.

*Maya mere mat po saba yirde hinhin
(Mak 4:33-34)*

³⁴ Yesu belen al buda mere gwahade yirde hinhin gobe maya mere mat po yirde hinhin. Mere kenkelak mat ma yirde hinhin. Maya mere mat po yirde hinhin. ³⁵ Ningeb Yesu belen maya mere mat saba tagalde hinhin gobe Al Kurun belen mere basan almin mere irke asande kayyin gote iginenbe gogo forok yirin. Merebe gahade: “Sabanebe maya mere mat po tiyen.

Irde det banare hitin al kura bebak titek mon goyen tagalen,” yitin hi. *Tikin 78:2*

Yamun bulunyen siraw mere gote min

³⁶ Be, Yesu gobe al buda kurun go yubul ten ya hiyende gor mulgan hirin. Irkeb komatmin yago kunbe, “Yamun duwi nin maya mere mat tagalha gote min goyen momon dira,” inamin. ³⁷ Irkeb gaha yinyin: “Wit muyken igin kun haryin al gobe ne Al Urmin gayen. ³⁸ Meten gobe megen kurun gayen gake yihim. Munan wit muyken

gobe Al Kurunyen dirneŋ weŋ. Yamuŋ duwi gobe Al Bulunyen dirneŋ weŋ. ³⁹ Irde yamuŋ duwi muykeŋ tur iryiŋ al gobe uŋgura. Sak nalu gobe nalu funaŋ, irde biŋge gabu ird ird mar gobe Al Kurunyen miyoŋ. ⁴⁰ Yamuŋ buluŋ wasen kak alare yemeyke humga kunayiŋ go gwahade goyen po, nalu funaŋdebe al hitte mata gwahade forok yiyyeŋ. ⁴¹ Ne Al Urmiŋ gare miyoŋne yad yermeke kuŋ nere alya bereya haŋ bana goŋ mata buluŋ teŋ haŋyen marya mata buluŋ tinaŋ yineŋ al biŋ yade haŋyen marya go yukuŋ gabu yirnayiŋ. ⁴² Irde mel go yade kak ala buluŋ wor po bana goŋ yemeynayiŋ. Irkeb goŋ po heŋ eseŋ misiŋ yiŋeŋ hinayiŋ. ⁴³ Goyabe Al Kurun dilinŋde alya bereya huwak haŋyen gobe Al Kurun beleŋ doyaŋ yirde hiyeŋde gor naŋa temeyke wuk yitiŋ yara wukkeŋ igiŋ wor po hinayiŋ. Al kirmiŋ miŋyaŋbe mere gayen keŋkela nurnan ko,” yinyiŋ.

Samunyen maya mere

⁴⁴ Be, maya mere hoyan wor yinyiŋ. “Al Kurun beleŋ yende alya bereya doyaŋ yirde hi gobe gahade: samuŋ kura damum hende hoyan wor po megeŋ biŋde bana kirtiŋ hinhin. Kurareb al kura samuŋ gwahade gaŋ hi yeŋ ma nurdeya megeŋ goyen talde taldeb kinyiŋ. Keneŋbe sopte aw uryiŋ. Irdeb aman wor po heŋ kuŋ detmiŋ kurun goyen al yunke damu tikeb gote muruŋgem tukunbe megeŋ goyen damu tiyyiŋ go gwahade. ⁴⁵ Al Kurun beleŋ alya bereyamiŋ doyaŋ yirde hi gote maya mere kurabe gahade: al kura beleŋ selweŋ yara kura damum hende wor po goyen

goke nankenen kun hinhin. ⁴⁶ Kun kun igin mun wor po kura kenenbe mulgan hen yende samun kurun goyen al yunke damu tikeb murungem ten tukun det kusamun wor po go damu tiyyin go gwahade,” yinyin.

Kaman kurunyen maya mere

⁴⁷ Be, Yesu belen sopte po gaha yinyin: “Al Kurun belen yende alya bereya doyan yirde hi gobe gahade: makan dapna yawarnin yen kaman kurun temeyamin. Irdeb dapna min kurayen kurayen yawaramin. ⁴⁸ Dapna makin hihi yen nurdeb tulun ten tukun sinare irde dapna iginbe tiriyan yeramin. Munan bulunbe yemeyamin go gwahade. ⁴⁹ Nalu funande wor pore gorbe al hitte mata gwahade go forok yiyyen. Al Kurunyen miyon belen wan al huwakya al mata bulun ten hitin marya goyen pota yirnayin. ⁵⁰ Irde mata bulun mar gobe yade kak ala kurun bana gon yemeyke esen misin yisen hinayin,” yinyin. ⁵¹ Irdeb, “Maya mere kurun dirhem gote min kenkela nurhan we?” yinke, “Gwaha,” inamin. ⁵² Irdeb, “Bebak tihit yahan geb, denbe Moseyen saba al kura saba bikkek po mon sabane gergen manan nurde tumnan yanarde han al go gwahade denen hime. Ningeb denbe al kura yamin bana mat samun bikkekya gergenya yade sinare katyen go gwahade goyen po saba bikkekya gergenya tumnan nurde han,” yinyin.

Nasaret taunde kurin

(Mak 6:1-6; Luk 4:16-30)

⁵³ Be, maya mere buda goyen momon yirdeb gasun go tubul ten kurin. ⁵⁴ Kunbe taun gor

hen kurun hirinde gor forok yenbe gor nin Yuda marte gabu yare kun al saba yirke hurkunƙat tenbe, “Ey, al gabe damde kun Al Kurunyen dufay wukkenya mata tinen kurayen kurayen ird ird tarenya gayen yawarun!” yamin. ⁵⁵ Irdeb, “Al gabe kapenta urmin mon? Yenbe Maria urmin. Kulin yagobe Yems, Yosep, Saimonyabe Yudasya mon? ⁵⁶ Haymin yagob gar ma tumnan hityen? Gega al gabe damde kun dufayya tarenya yawarun?” yamin. ⁵⁷ Irdeb bulun nurd unamin. Goyenbe Yesu belen, “Al Kurunyen mere basan marbe taunminde nin marya taynenya belen palap ma yirde meremin ma nurde hanen,” yinyin. ⁵⁸ Irdeb yen ge heken ma nurde hinhan geb, gorbe mata tinen budam ma forok yiryin.

14

Herot belen Yon Baptais mayke kamyin (Mak 6:14-29; Luk 9:7-9)

¹ Be, Yesu belen mata kurun ten kun hinhin goyen Galili nana gote doyan al kurun Herot belen mere momonmin nuryin. ² Irdeb meten marmin go, “Yon Baptais maymeke kamun al go goyen sopte huwarun geb, mata tinen ird ird sanin minyan meten ten kun hi gogo,” yinyin.

³⁻⁴ Be, Yon mayke kamyin gote baraminbe gahade: Yon dilin gergen hinhinyabe Herot belen kulin Filip berem Herodias gora iryin. Irkeb Yon belen kawan po, “Mata gob bulun wor po tiyan geb,” inkeb Herot belen goke igin ma nuryin. Irdeb fulen marmin yinke Yon fere ten tukun koyare keramin. ⁵ Irde maymeke kamwon yen

nurde hinhin gega, al beley Yon gob Al Kurunyen mere basan al yen nurd unen hinhan geb, Yon mayde mayde nin kafura hen hinhin. ⁶ Be, Herot gobe milin beley kawan kiryin nalu go forok yekeb Herotyia kadom wenya gabu irde dulan ten hinhan. Irde tikin hekeb Herodias wirin beley gor gabu iramin mar goke gege tiyyin. Irkeb Herot gobe aman wor po hirin. ⁷ Irdeb, “Det kuran nurde gusanan nirkeb igin gunen,” inen dilin mar bina tiyyin. ⁸ Irkeb milin beley gwaha inayin inyin gwahade po Herot inyin. “Hanaka ga po Yon Baptais tonan koronde kerde tawan nuna,” inyin. ⁹ Irkeb doyan al go kanduknen nuryin gega, bere go hitte bina tiyyin goya al buda gor hinhan mar gore daha wet kura ninnak yen nurdeb bina tiyyin go po gama irde bere gore yirin goyen po irde unyin. ¹⁰ Irde fulenja marmin hulayan yirke koyare kunbe Yon binin walamin. ¹¹ Irdeb Yon tonan gobe koronde kerde tawan bere go unkeb yen beley tukunbe milin unyin. ¹² Be, Yon komatmin beley mere go nurdeb wan hakwam goyen tukun mete tiyamin. Gwaha ten kunbe Yon kamin goyen Yesu momon iramin.

*Yesu beley al 5,000 bingge paka yirin
(Mak 6:30-44; Luk 9:10-17; Yon 6:1-14)*

¹³ Be, Yon kamin mere momon goyen nurdeb Yesube komatminya hakwa ten nana almem monde dunken balmin hini yen kwamin. Irkeb nana bana go nin taunan nin marbe Yesube gon kwa yen nurdeb makan feren gama irde kwamin. ¹⁴ Be, Yesu go kun kun fe sina kurhan forok yenbe al buda kurun goyen

yenenbe buninɛn yinyin. Irde garbam minyan marbe guram yirke igin hamin.

¹⁵ Be, wawun hewen ten hikeb komatmin yago belen Yesu goyen, “Nanɛ bana gab tiyun binde minmon. Irde hen ga mon kidoma hewen tiya geb, al buda kurun ga yinke tiyunyaɛn kun yingen binɛge kura damu ten nenan,” inamin. ¹⁶ Irkeb Yesu belen, “Mon, danin kunayin? Den belen det kura yunke nenan,” yinyin. ¹⁷ Irkeb, “Gwaha dinha goyenbe nenbe beret siptesononya makan dapɛa yadi iraw po han,” inamin. ¹⁸ Irkeb, “Yawan nunnan,” yinyin. ¹⁹ Irdeb al buda kurun go, “Yamunyaɛn kepernan,” yinke keperde tukamin. Irkeb beret siptesononya makan dapɛa yadi irawaya goyen yade kotan kan nanɛkinde nanɛkenen Al Kurunyaɛn saninɛde guram yirde yubala ten al yunnan yinenbe komatmin yago yunyin. ²⁰ Al buda kurun gob binɛge go nen nen ep po namin. Irkeb komatmin belen binɛge diknen buda iramin gobe tiri 12 gwahade makin yirtek hamin. ²¹ Be, binɛge namin mar al parguwak po kapyan haminbe 5,000 hirin.

*Yesu fe yuwalɛen hende huwarde kurin
(Mak 6:45-52; Yon 6:15-21)*

²² Be, gwaha tenbe komatmin yago, “Aranen hakwa hende hurkun fe ala sinɛ kurhan kunan,” yinke hakwa hende hurkunbe yen wa mehen hen fe ala sinɛ kurhan kwamin. Irkeb Yesube gor hen al buda kurun goyen, “Tiyuntinyaɛn tiyuntinyaɛn kunan,” yinyin. ²³ Al buda go gwaha yinenbe Al Kurunya mere tiyye yenbe dugu dabayinɛde kura gor hurkurin. Kun yen unɛkuren gon hikeb

kidoma hirin. ²⁴ Munan komatmin yagobe megen tubul ten fe ala kurunde hamin. Goyenbe mene huwarke fe goyen makaɗ duba yara karkuwan karkuwan huwamin. Irkeb hakwa gobe mun kura ma sor iryin. ²⁵ Be, nana minge hen hikeb Yesu go fe yuwalhen hende huwarde komatmin yago hitte kurin. ²⁶ Mel gore fe hende huwarde wan hike kenen kafura wor po henbe, “Gabe unɗura!” yen ulin barbar yeke daha tiniɗ tiniɗ tiyamin. ²⁷ Goyenbe aran po Yesu belen, “Kafura ma yo. Ne wan hime geb. Taren henayin,” yinyin. ²⁸ Irkeb Pita belen, “Doyan Al Kurun, gabe fudinde ge kenenbe ninke fe hende huwarde ge hitte kwen,” inyin. ²⁹ Irkeb, “Iginge waya,” inyin. Gwaha inkeb Pita go hakwa hende mat solok yen fe hende harde Yesu hitte kurin. ³⁰ Goyenbe kun henɗabe mene kenen kafura henbe hako ga dolok yen kenenbe, “Doyan Al Kurun, faran nura!” yen kekew tiyyin. ³¹ Irkeb goyare po Yesu belen hanin temeyde tanardeb isan hirin. Irdeb, “Danin dufay budam hen ne nin heken ma nurde ha?” inyin. ³² Gwaha tenbe hakwa hende hurkaryum. Irkeb mene kamin. ³³ Irke gab hakwa binde hinhan mar gore kenen bebak tenbe dolon irde, “Fudinde wor po gebe Al Kurun Urmin,” inamin.

*Genesaret nin garbam mar sope yiryin
(Mak 6:53-56)*

³⁴ Be, gwaha ten kun kunbe Genesaret nana belen gon forok yamin. ³⁵ Irkeb al gor nin belen Yesu kenen bebak tenbe mere kerke nana goyen bana nin mar yinke garbam mar tumnan Yesu

hitte yawayaminj. ³⁶ Irdeb, “Garbam mar gayen yubul tike meñe diba ulger niñ gote muruñ po sisanj urdeb iginj henañ,” inenj esenj mere iraminj. Niñgeb al garbam miñyañbe Yesu go sisanj urde tumñañde iginj haminj.

15

Yesu belenj asem yagot mata walde yunyinj (Mak 7:1-13)

¹ Be, naña goyen bana metenj tenj kuñ hikeyabe Yerusalem taun kurunje mat Farisi mar kuraya Moseyen saba mar kuraya goyen Yesu hitte wañbe, ² “Daninj geb komatge yagobe asinininj yagot mata ma gama irde hañ? Yenbe dula tininbe mali po biñge nene hañ. Haniñ ma haldeya gwaha tenj hañ,” inaminj. ³ Irkeb wol henbe, “Munañ denbe daninj geb asetinj yagot mata niñ po tenbe Al Kurunyen merebe pel irde bulunj irde hanjen? ⁴ Al Kurunj belenbe, ‘Nan-tinya mamtinjyabe palap yirde hinayinj,’ yitinj hi niñgeb, ‘Al kura naniñya miliñya mere bulunj yiryenj gobe mayke kamyenj,’ yitinj hi. ⁵ Goyenbe denbe saba goyen tigiri tenbe, ‘Al kura naniñya miliñya det kura farañ yurtek goyen ma yunenbe, “Iginj farañ durmewonj gega, Al Kurunj unenj yenj basinã irminj geb, go ma farañ dureñ,” yinyenj gobe mata bulunj moñ,’ yenj al saba yirde hanjen. ⁶ Niñgeb al gwaha mat saba yirke Al Kurunyen mere ma gama irde naniñya miliñya palap ma yirde dulinj hanjen. Denbe gwahade goyen po asetinj yagot mata niñ tenbe Al Kurunyen mere

buluŋ irde haŋyen. ⁷ Usi mar wor wor, Al Kurunyen mere basan al Aisaia belen asande kayyiŋ gobe fudinde wor po den gake kayyiŋ. ⁸ Merebe gahade:

‘Mel gabe mohonde po turuŋ nirde haŋ.
Gega bindebe ne niŋ ma nurde haŋ.
Hoyande wor po haŋ.

⁹ Mel gabe megen niŋ marte saba po gama irde al saba yirde haŋ.

Mel gabe biŋ hende hende po doloŋ nirde haŋ,’ yitiŋ hi geb,” yinyiŋ. *Aisaia 29:13*

¹⁰ Be, Yesu gob mel Farisi marya Moseyen saba marya goyen gwaha yinenbe al buda kurun gor hinhan go yinke yeŋ binde wayamiŋ. Irkeb, “Mere ga nurde bebak tinaŋ ko. ¹¹ Det kura al mohonde mat binde kurkuyeŋ gore Al Kurun diliŋde al go buluŋ ma iryeŋ. Goyenbe det kura mohonde mat kat kuyeŋ gore po gab Al Kurun diliŋde al go buluŋ iryeŋ,” yinyiŋ. ¹² Gwaha yinkeb komatmiŋ yago belen waŋbe, “Farisi marbe mere taha goke igiŋ ma nurde haŋ goyen yeneŋ bebak taha?” inamiŋ. ¹³ Irkeb wol heŋbe, “He kura Nanne Al Kurun tareŋmiŋ kurun gore ma haryiŋ gobe filginiŋ manan tumnan wasiyeŋ. ¹⁴ Niŋgeb diliŋ titmiŋ buda gobe yeneŋ wasak tinaŋ. Mel gobe saba fudinde goyen ma bebak teŋbe al mata buluŋde yukuŋ haŋ. Al kura diliŋ titmiŋ belen kadom yiŋgeŋ yara goyen belen ikala irde tukuŋ hime yiyyeŋ gobe tumnande kuŋ mete titmiŋde katiryeŋ,” yinyiŋ. ¹⁵ Irkeb Pita belen, “Maya mere gote miŋ momoŋ dira,” inyiŋ. ¹⁶ Irkeb, “Den manan dufaytiŋ muŋ kura ma wuk yeŋ

hanj? ¹⁷ Det kura al mohoŋde mat biŋde kurkuyen gobe kamebe kat kuyen gobe ma nurde hanj?
¹⁸ Goyenbe det mere kura al mohoŋde mat forok yey hanyen gobe biŋde mat waŋ hanyen geb, gore gab Al Kurun diliŋde al go bulun yirde hanyen.
¹⁹ Dufay bulun, al gasa yirke kamde kamde mata, al kura berem yaŋ gore bere hoyanya duwan teŋ teŋ mata, alya bereya foŋeŋde leplep mata, kawe mata, merere huwarde usi mat mere teŋ teŋ matayabe mere bulun mat teŋ teŋ mata kurun gobe al biŋde mat pul yey hanyen. ²⁰ Det gwahade gore gab Al Kurun diliŋde al bulun yirde hanyen. Haniŋ hal hal mata keŋkela ma gama irde dula tinayiŋ gore al bulun ma yiryey,” yinenj saba yiryiŋ.

Kenan marte bere gote dufay sanjij
(Mak 7:24-30)

²¹ Be, Yesu go naŋa hinhin goyen tubul teŋ Saidon taunya Tair taunyat naŋa bana goŋ komatmiŋ yagoya kwamiŋ. ²² Irkeb taun iraw goyen bindere tiyuŋ kura hinhide gor mat Kenan mar bere kura gore Yesu hitte waŋbe, “Doyan Al Kurun, Dewit Urmiŋ, buniŋeŋ nirde faran nura. Wernebe unŋura beley waŋ herneŋ irtiŋ hi geb, bulun bulun wor po irde hanj,” iney esey uryiŋ. ²³ Goyenbe Yesube meremiŋ goyen muŋ kura haywanj ma hiriŋ. Irkeb komatmiŋ yago beley, “Esey durde gama dirtiŋde po hi geb, takira tike kwi,” inamiŋ. ²⁴ Irkeb wol heŋbe, “Nebe Israel mar Al Kurunyen sipsip meremiŋ ma nurde duwi hitiŋ goke po wamiŋ geb,” yiriŋ.

²⁵ Irkeb bere gore waɗ palap irde dokolhoɗ yugulun tenbe, “Doyaɗ Al Kurun, faraɗ nura,” inyiɗ.
²⁶ Irkeb wol henbe, “Diriɗde binɗebe epte ma goraɗ yirde yad kulumiɗ yago yunke nenayiɗ,” inyiɗ. ²⁷ Gwaha inkeb bere gore wol henbe, “Doyaɗ Al Kurun, mere gobe fudiɗde ninha gega, diriɗde binɗe dikɗeɗ katnayiɗ gob kulu wor nene hanɗen. Niɗgeb faraɗ nurayiɗ,” inyiɗ. ²⁸ Irkeb Yesu belɗ, “Bere, ne niɗ hekɗeɗ wor po nurha geb, gusuɗaɗ nirha gote igineɗ forok yiyyeɗ geb,” inyiɗ. Be, wirin gobe goyare go po igin hiriɗ.

Al garbam kurayen kurayen sope yiryin

²⁹ Be, Yesu go naɗa goyen tubul teɗ mulɗaɗ heɗ Galili fe ala kurun fereɗ kun kunbe dugu dabayiɗde kura gor hurkuriɗ. ³⁰ Irkeb al budam wor po yeɗ hitte wayamiɗ. Waɗ henɗabe al kahaɗ nonbo hitin, diliɗ titmin, ulin albo yirtin, mohoɗ kattinɗabe garbam hoyan minɗaɗ marya goyen sope yirke igin henaɗ yeɗ nurde yawaɗ kahaɗ minɗe yeramiɗ. Irkeb sope yiryin. ³¹ Al gabu iramiɗ mar belɗ mohoɗ kattin mere tike yenamiɗ. Ulin albok hitin goyen igin heɗ, kahaɗ bulun hitin goyen huwarde kun waɗ teɗ, diliɗ titmin nanɗeneɗ tike yeneɗbe hurkunɗat tenbe Israel marte Al Kurun go turun irde kasor iramiɗ.

Al 4,000 binɗe yunke namin (Mak 8:1-10)

³² Be, Yesu belɗ komatmin go yinke wakeb, “Al buda kurun gabe tumɗaɗde hiteke kun kun yereɗkek hihi. Goyenbe det go kura netek

miñmon hañ. Biñge ma nene tiyuñmiñ kunayinbe belenyan kamnayin geb, buninjen yenen hime,” yinyin. ³³ Irkeb komatmin belen wol henbe, “Tiyun binde miñmon naña gahade gab biñge damde nin yade al buda kurun gahade gayen yunteke nenayin?” inamin. ³⁴ Irkeb, “Beretbe dahade hañ?” yinkeb, “Beretbe 7ya makañ dapña muknen yadi kura goya po hañ,” inamin.

³⁵ Be, al buda gabu iramin go megen keprnan yinke keperde tukamin. ³⁶ Irkeb beretya dapñaya go yadeb Al Kurun igin nurde unenbe beretya dapñaya go yubala tenbe komatmin yago al yukuñ yunnañ yen yunyin. Irkeb gwaha po tiyamin. ³⁷ Al buda kurun gobe biñge go nene ep wor po namin. Irkeb Yesuyen komat belen biñge diknen al belen ep nene yubul tiyamin goyen yade tiri 7 gwahade makin yirtek iramin. ³⁸ Bereya dirinya ma kapyan hen al parguwak po kapyan haminbe 4,000 hirin. ³⁹ Biñge yunke neke gabe, “Tiyunñyan tiyunñyan kunayin,” yinyin. Irdeb komatminya hakwa hende hurkunbe naña kura Magadan taun binde belen goñ kwamin.

16

*Mata tinen kura ira inen gusunan iramin
(Mak 8:11-13; Luk 12:54-56)*

¹ Be, Yesu go goñ hikeb Farisi marya Sadusi marya belen Yesu hitte wanbe tunan urnin yen, “Mata tinen Al Kurun belen irtek goyen kura irke kinnin,” inamin. ² Irkeb Yesu belen, “Denbe wawunbana hen naña buk yekeb, ‘Kadila hewen

tiya,' yey hanjen. ³ Irde wampotbe, 'Nanja bulun hihi geb, kigarij katenj tiya,' yey hanjen. Denbe nanjin kenej gab kadila hewenj tiya ma kigarij katenj tiya goyen kenkela nurde hanjen. Goyenbe gayenter ninj mar goke tenbe Al Kurunj belenj mata forok yirde hi goyen danij geb yenenj bebak ma tenj hanj? ⁴ Denj gayenter ninj marbe mata bulun tenj Al Kurunj harhoktinj unenj hanj geb, mata tinenj kurayen kurayen goke po nankenenj hanj. Goyenbe kura kinninj yekeb Yona hitte mata forok yirinj* go gwahade goyen po kame dikala direnj," yinenjbe mel goyen yubul tenj hoyande kurinj.

*Farisi marya Sadusi maryat saba bulun
(Mak 8:14-21)*

⁵ Be, fe ala kurunj go warde sinj kurhan kwaminja goyenbe komatminj go binj sir yekeb beret kura ma yade ga kwaminj. ⁶ Be, Yesu belenj Farisi marya Sadusi marya goke komatminj goyen, "Kenkela henj hinanj ko. Monjo mel gote yis belenj bulun diryenj geb," yinyinj. ⁷ Gwaha yinkeb komatminj belenj, "Beret kura ma yad wayhet geb, gogo dina," yey yingenj ulinj kadom mere gird tiyaminj. ⁸ Komatminj go mere kusa irde hike yenenjbe, "Danij dindikenj ulinj beretnininj minjonj yey hanj? Denbe ne ninj ma hekkenj nurde hanj? ⁹ Munj kura ma po bebak tenj hanj? Beret siptesononj al 5,000 naminj gote diknenjbe tiri dahade makinj yirtek haminj? ¹⁰ Goyen monj kenem beret 7 goyen al 4,000 nanj gote diknenj

* **16:4:** Yonabe wawunj karwo makanj dapnja kurunj milinj gote binj bana henjbe sopte sinjare katyinj. Gobe Yesu kamyinje mat yerenjek heke sopte huwaryinj gote tunjanenj.

yade tiri dahade makin yirtek han? ¹¹ Farisi marya Sadusi maryat sababe yis beley palawa bana hilyan kutin yara al hoyan kurun gote dufay bulun yirde hi goke dinen hime. Beret nin ma yen hime gayen dani geb bebak ma ten han? Ningeb sopte dinen hime, Farisi marya Sadusi maryat yis beley bulun diryenkek geb, kenkela hen hinayin,” yinyin. ¹² Be, gwaha yinke gab, “Yis beret bana irde han yen goke ma dinen hi. Farisi marya Sadusi maryat sababe yis yara goke hayhay dirde hi,” yen nuramin.

Yesu, gebe Mesaia
(*Mak 8:27-30; Luk 9:18-21*)

¹³ Be, Yesu go komatminya nanja bana go tubul ten kun Sisaria Filipai taun binde binde hen henbe gusanan yiriyin. “Ne Al Urmin gayen gake al hoyan beley ganun yen han?” yinyin. ¹⁴ Irkeb wol henbe, “Al kura beley gebe Yon Baptais yen han. Munan kura marbe Elaia ginen han. Kurabe Yeremaia ma Al Kurunyen mere basan mar hoyan kura goyen ginen han,” inamin. ¹⁵ Irkeb, “Munan den gayenbe nebe ganun yen nurd nunen han?” yinyin. ¹⁶ Irkeb Saimon Pita beley, “Gebe Mesaia, Al Kurun gwahader hitin al gote Urmin,” inyin. ¹⁷ Gwaha inkeb, “Mere gobe Nanne Al Kurun sanin minyan al gore ginke gab gago yaha. Al kura beley ma mere goyen momon gira. Ningeb Al Kurun beley guram girde sanin giryen. ¹⁸ Gebe ne nin dufayge hora yara taren irha geb, Pita ginen hime. Ningeb hora go hendebe nere alya bereya yeren. ¹⁹ Irde Al Kurunyen alya bereya doyan yird yird sanin goyen ge gunen. Ningeb ge

belen igin yawayinbe Al Kurun wor igin yiyyen. Irde ge belen bulun yawayinbe Al Kurun wor bulun yiyyen,” inyin. ²⁰ Gwaha inenbe tumnande komatmin goyen, “Al hoyan kura hitte ne nin yen, ‘Yenbe Mesaia,’ ma yinnayin,” yinen utan yiryin.

Kamde kamde min ge kawan tagalyin
(*Mak 8:31–9:1; Luk 9:22-27*)

²¹ Be, goyenter mat komatmin yago goyen kawan po, “Nebe Yerusalem kwen. Kumekeb Yuda marte doyan mar parguwakya Al Kurun dolon ird ird mata doyan marte karkuwan yabe Moseyen saba marya belen bulun bulun nirde mununke kamen. Goyenpoga kamen goyen yerenkek hekeb huwaren,” yinyin. ²² Irkeb Pita belen mere go nurdeb yen mun po tapat irdeb inen tenbe, “Doyan Al Kurun, gwaha ma tiyayin. Mata gobe ge hitte ma po forok yiyyen geb,” inyin. ²³ Irkeb fulgan kan Pita kenenbe, “Satan, hoyan kwa! Gebe belenne pet ten ha geb. Dufay gobe Al Kurunyen mon, alyen dufay po geb,” inyin.

²⁴⁻²⁵ Gwaha tenbe komatmin yago goyen gaha yinyin: “Al kura gama nirde kanduk yenen yingen ge kafura hen harhok nunyen al gobe kame tonenbe kanduk kinyen. Munan al kura ne gama nirde kamde kamde nin ma kafura hen kanduk kurun ten ulin misin katen hiyen al gobe tonenbe igin hiyen. Niñgeb al kura ne gama nire yenbe megen nin dufayya mataya harhok yunen. Irdeb kanduk yenen hiyen gega, yingen ge ma nurde gama po nirde hiyen. ²⁶ Al kura megen nin samun budam yade denem yan hiyyen gega, al gobe Al Kurun dilindeb kamtin yara

hiyyeñ gobe daha tiyyeñ? Gobe igiñ moñ, buluñ wor po. Niñgeb megen niñ samuñ kura teñ gore Al Kurunyen bearar bana hiyeñ al gob epte ma damu teñ tumulgañ titek. ²⁷ Ne Al Urmiñ gab kamebe Nanne Al Kurunyen sañiñ turuñuñ yañ goyen manañ kateñ. Goya goyenbe miyoñmiñya kattek. Irdeb alya bereyat matamiñ dahade dahade goyen gote muruñgembe gwahade po yuneñ. ²⁸ Goyenpoga deñ gar hañ gayen kurabe ma kamdeya ne Al Urmiñ gare Al Kurunyen tarende alya bereyamiñ doyañ yirde heñ goyen kennayiñ. Mere gabe fudinde wor po dinenñ hime,” yiniñ.

17

*Yesu uliñ hoyañ hiriñ
(Mak 9:2-13; Luk 9:28-36)*

¹ Be, naña fay 6 kamereb Yesu beleş Pita, Yemsyabe kuliñ Yonya po yade dugu kurunde kura gor hurkamiñ. ² Gor heñbe Yesu go mel gote diliñ mar po uliñ hoyañ hiriñ. Dinsokdebe naña timiytiñ yara hiriñ. Uliñ umña kerde hinhin go wor faykek wor po hiriñ. ³ Gwaha tikeyab diliñ mar po Moseya Elaiaya forok yeñ Yesuya mere teñ hinhan. ⁴ Irkeb Pita beleş Yesu goyen, “Doyañ Al Kurun, gar gabe neñ hitek gasuñ igiñ muñ wor po. Niñgeb ge beleş ok yekeb deñ al karwo hitek heñ heñ gasuñ kura yireñ. Kurabe ge niñ, kurabe Mose niñ, munañ kurabe Elaia niñ,” iniñ.

⁵ Mere gwaha teñ hikeyabe kigariñkiñ faykek wor po kura gore wañ aw yuriñ. Irkeb al melak kura gagap bana goreb, “Al gabe Urne. Yeñbe

bubulkunne wor po, yen ge bener mat amanen wor po nurde hime. Niñgeb yende mere po nurde gama irde hinayin,” yirin.

⁶ Be, Yesuyen komatmin belen mere go nurdeb kafura wor po hen bin tadam mat megen katamin. ⁷ Gega Yesu belen wan yanardeb, “Kafura hen ma, huwarnan!” yinyin. ⁸ Gwaha yinke nankenenbe Yesu unkenen po hike kenamin. Al hoyanbe hubu.

⁹ Be, dugure gor mat katen henyabe Yesu belen mel go saba yirde, “Hanaka det kenhan gayen gake al hoyan kura momon ma yirnayin. Ne Al Urmin gayen kanden mat sopte huwarmeke gab igin tagalnayin,” yinyin. ¹⁰ Irkeb mel gore, “Danin geb Moseyen saba mar belen Elaia wa wake gab Mesaiabe kame wayyen yen hanjen?” yen gusanan iramin. ¹¹ Irkeb, “Elaia wa mehen hen det sope irke gab Mesaia wayyen yen hanjen gobe fudinde. ¹² Niñgeb Elaiabe bikken wayun. Goyenpoga alya bereyabe kenen bebak ma tiyan. Irde yingen de dufay po gama irde bulun bulun irde mayke kamun. Mel goreb yen iran gwahade goyen po ne Al Urmin gayen wor gwahade po nirnayin,” yinyin. ¹³ Irke gab, “Yon Baptais nin dinen hi,” yen bebak tiyamin.

*Dirin unguram yan sope iryin
(Mak 9:14-29; Luk 9:37-43a)*

¹⁴ Be, mel go dugure mat katen al gabu kurun iramin de gor forok yekeb al kura gore Yesu hitte wan dilin mar dokolhon yugulun tenbe, ¹⁵ “Doyan Al Kurun, urne buninen irde faran ura. Bu tonen minyan geb, ulin misin kurun katen hiyen.

Kurareb kak alare katen hiyen. Kurareb fe alare katen hiyen. ¹⁶ Komatge yago hitte tawayhem gega, sope ma irhan,” inyin. ¹⁷ Irkeb, “Deŋ gayenter niŋ marbe dahade niŋgeb Al Kurun niŋ dufaytin muŋ kura sanin ma irde han? Tonantin sanin wor po, saba dirman dirmanen. Gayak ga ma denya hityen gega, hako po han. Dirin go tawanan,” yinyin. ¹⁸ Irdeb dirin go ten wakeb unŋura dirin bana hinhin go inen ten takira tike kat kurin. Irkeb goyare po igin hirin.

¹⁹ Be, go kamereb yen yunŋuren po hen gab komatmin beŋ, “Danin geb nenbe unŋura go ma takira tihit?” inamin. ²⁰⁻²¹ Irkeb, “Deŋ unŋura takira ma tahan gobe Al Kurun niŋ heken nurde han gobe kurun mon. Niŋgeb fudinde wor po dinhem. Al Kurun niŋ dufaytin hek irde han goyen mastet he bilmin dirnen muŋ gwahadebe megen gar det kura irnayinbe metenen ma diryen. Niŋgeb dugu gayen ‘Gar mat sinŋir ten iror kwa!’ inkeb gwahade po tiyyen,” yinyin.*

²² Be, Yesuya komatminya gabu henbe tumnan Galili nanɔ bana kwamin. Irdeb Yesu beŋ, “Ne Al Urmin gabe mununtek al haninde nernayin. ²³ Irke mununkeb kamen gega, yerenkek hekeb Al Kurun beŋ sopte nisan heke huwaren,” yinyin. Gwaha yinkeb komatminbe kanduknen wor po nuramin.

Al Kurunyen ya balem gote teks

* **17:20-21:** Asan hoyandebe gahade hi: 21 Goyenbe unŋura gwahade goke dindiken binje kutna irde Al Kurun gusunan irde takira tike gabe kat kuyen.

²⁴ Be, gwaha ten kun kunbe Kapeneam taunde forok yamin. Irkeb Al Kurunyen ya balem nin ten teks yad yad mar belen Pita hitte wanbe, “Tisage gayen Al Kurunyen ya balem nin ten teks kura yerde hiyen?” inamin. ²⁵ Irkeb, “Gwaha,” yinyin.

Be, gwaha yinenbe Yesu hinhin ya go binde hurkukeb goyare po Yesu belen, “Saimon, megen nin doyan mar karkuwan yuntek teks kurayen kurayen gobe ganun mar belen gab yerde hanjen? Urmin yago belen yerde hanjen ma al hoyan belen yerde hanjen? Gebe dahade nurde ha?” inen gusunan iryin. ²⁶ Irkeb Pita belen wol henbe, “Al hoyan belen yerde hanjen,” inyin. Irkeb, “Gwaha, doyan mar karkuwan gote dirnen wenbe nanin yagon teks ma yerde hanjen geb. ²⁷ Goyenpoga teks ma yertekeb dufaymin bulun henak geb fete kun funal temeyayin. Irde dapna mehende wor po tawayin gobe mohon takila ten teks yertek hora kura kenayin. Hora go tukuñbe neya geyat teks kerayin,” inyin.

18

Ganunbe denem kurun wor po hiyyen?

(Mak 9:33-37; Luk 9:46-48)

¹ Be, goya goyenbe komatmin hoyan belen Yesu hitte wanbe, “Ganunbe Al Kurun belen alya bereyamin doyan yirde hire gor nin denem yan wor po hiyyen?” yen gusunan iramin. ² Irkeb dirin dirnen kura inke komatmin yago hinhande gor wan huwaryin. ³ Irkeb Yesu belen, “Fudinde wor po dinen hime. Dirin gahade gayenbe yingen al denem yan hen hen nin ma nurde hanjen.

Gwahade goyen po al kura yiŋgeŋ al deŋem yaŋ heŋ heŋ niŋ ma nurde haŋ marbe Al Kurun beleŋ yende alya bereya doyaŋ yirde hi bana goŋ igiŋ hurkunayiŋ. ⁴ Niŋgeb al kura diriŋ gahade ga hinayiŋ marbe Al Kurun diliŋde deŋem yaŋ wor po yeŋ yinyeŋ. ⁵ Irde al kura deŋem moŋ diriŋ gahade gayen ne niŋ teŋ gargar iryeŋbe ne gayen niryen.

⁶ “Goyenbe al kura diriŋ saŋiŋ miŋmoŋ gahade gayen ne niŋ dufaymiŋ tareŋ irtiŋ goyen al kura beleŋ mata buluŋ tike keneŋ gama irde buluŋ tiyyeŋbe mata buluŋ miŋ uryeŋ al gobe muruŋgem buluŋ wor po tiyyeŋ. Niŋgeb al hoyan gama ma irkeya mata buluŋ miŋ uryeŋ al gobe hora kurun kura teŋ biŋiŋde feŋ teŋ makaŋ alare temeyke kamyen. Gogab gote muruŋgem buluŋ wor po goyen ma tiyyeŋ.

⁷ “Mata buluŋ titek dufaybe al biŋyaŋ hugiŋeŋ forok yeŋ tuŋaŋ yurke kateŋ hanyen. Niŋgeb megen niŋ mar dufay buluŋ go teŋ haŋ gobe Al Kurunyen bearar bana haŋ geb goke bunineŋ nurde hime. Dufay buluŋ gobe hugiŋeŋ al biŋyaŋ forok yeŋ hiyeŋ gega, al kura dufay go gama irde mata tinayiŋ mar gobe Al Kurunyen bearar bana hinayiŋ geb goke bunineŋ nurde yuneŋ hime. ⁸ Niŋgeb hange kura beleŋ girke mata buluŋde katayiŋbe hange go walde temeyayiŋ. Moŋgo hange unkuŋeŋ gore girkeb ulge tumŋaŋ kak hugiŋeŋ hitiŋde gor kutek goke teŋbe hange gore buluŋde gukutek go po walde temeyayiŋ. Irdeb igiŋ hange kurhan titmiŋ manan gasuŋ igiŋde kwayiŋ. Irde kahaŋge wor gwaha girkeb go wor

gwahade po irayin. Irdeb iginḁe kwayin. ⁹ Irde delge kurhan belen girke mata bulunḁe katayinbe delge go marde temeyayin. Monḁo delge unḁurenḁe gore girkeb ulge tumḁanḁe kak alare kutek goke tenbe delge gore bulunḁe gukutek go po marde temeykeb iginḁe delge kurhan titminḁe mananḁe gasunḁe kwayin,” yinyin.

Sipsip duwi hitinḁe gote maya mere

(Luk 15:3-7)

¹⁰⁻¹¹ Irde sopte po gaha yinyin: “Be, al kura denem monḁe dirinḁe gahade gayenbe Al Kurunḁen miyonḁe belen doyanḁe yirde hanḁe. Irde miyonḁe gobe Al Kurunḁe saninḁe minyanḁe gote dilinḁe mar huginḁe hanḁen. Ninḁeb al gahade goyen denem monḁe yen inḁogaha ma yirde hinayin.*

¹² Be, ga nurnanḁe! Al kura sipsipminḁe 100 hinayin. Irke unḁurenḁe kura kadom yubul tenḁe hoyanḁe kuyenḁe. Irkeb gonḁminḁe yenḁe tubul tiyyenḁe? Monḁe! Sipsipminḁe 99 go yukunḁe donḁonḁe kura gor yubul tenbe kunḁe nanḁkinyenḁe. ¹³ Fudinde wor po dinenḁe hime. Unḁurenḁe munḁe goke nanḁkenenḁe kunḁe kunḁe kenenḁe tenbe amanḁe wor po hiyyenḁe. Munanḁe 99 goke gwahade wor po ma nuryenḁe. ¹⁴ Gwahade goyen po, Nantinḁe Al Kurunḁe saninḁe minyanḁe al gobe al kura dirinḁe gahade gayen unḁurenḁe kura Al Kurunḁe tubul tenḁe kanduk bana kunḁe kunḁe gokeb iginḁe ma nurde hi,” yinyin.

Kadge kura bulunḁe girkeb daha tiyayinḁe?

* **18:10-11:** Asanḁe hoyanḁebe gahade hi: 11 Ne Al Urminḁe gabe alya bereya Al Kurunḁen dirnenḁe wenḁe gega, mere ma nurde duwi hitinḁe tiyanḁe goyen yumulanḁe tiye yenḁe wamirinḁe.

¹⁵ Irde sopte po, “Be, kadge kura bulun bulun girkeb kun yen po hikeya gabe mata bulunmin goke momon irayin. Irke mere go nuryenbe al gob sopte kadge Al Kurun urmin gigen yara hiyyen. ¹⁶ Goyenbe merege ma nurke kenem al hoyan unken ma iraw gwahade yade ga kwayin. Gogab al irawa ma karwo gore merege goyen tumnan fudinde yenayin. ¹⁷ Al hoyan yukayin gote mere wor ma nurke kenenbe mata bulunmin goyen Al Kurunyen dirnen wen hoyan goyen momon yirayin. Yende mere wor ma po nurkeb al gobe Al Kurunyen dirin mon, mata bulun al yen kenen hinayin.

¹⁸ Fudinde wor po dinen hime. Al Kurunyen alya bereya doyan yird yird sanin goyen den dunen. Ningeb den belen igin yenayinbe Al Kurun wor igin yiyyen. Irde den belen bulun yenayinbe Al Kurun wor bulun yiyyen.

¹⁹ Sopte dinen hime. Der al iraw kura megen gar henya det kuran nurde dufaytirin unken po irde Nanne Al Kurun taren minyan al goyen gusunan iriryenbe yen belen epte irde dunyen.

²⁰ Gwahade ningeb al irawa ma karwo gwahade kura, ‘Nenbe Yesuyen alya bereya,’ yen wan gabu irnayinbe ne manan wan yenya hitek,” yinyin.

Meten al buninen minmonyen maya mere

²¹ Be, gwaha yinkeb Pita belen wanbe, “Doyan Al Kurun, kadne kura belen bulun nirkeb wawun dahadere mata bulunmin go halde unen? Wawun 7 ma dahade?” yen gusunan iryin. ²² Irkeb, “Wawun 7 po mon. Bulun girde hikeb huginen halde po unen hayin,” inenbe ²³ mata goke

maya mere mat gaha yiriṅ: “Niṅgeb Al Kurun beḷeṅ yende alya bereya doyaṅ yirde hi bana goṅ niṅ matabe gahade: doyaṅ al kura beḷeṅ metenṅ marminiṅ horamiṅ yawaramiṅ go wol henaṅ yinyiṅ. ²⁴ Irkeb al kura doyaṅ almiṅ hitte hora kurunṅ wor po tiriṅ al goyen doyaṅ almiṅ hitte tawayamiṅ. ²⁵ Gega al gobe hora kurunṅ go epte ma wol hetek hiriṅ geb, doyaṅ almiṅ gore, ‘Al gote beremya diriṅmiṅ wenya detmiṅya goyen tumṅaṅ yukunṅ al hoyanṅ yunke damu tinaṅ. Irkeb hora gobe ne tewenṅ,’ yiriṅ. ²⁶ Irkeb metenṅ al go diliṅ mar gor po dokolhonṅ yugulunṅ tenṅbe, ‘Bemel nirde ma. Horage kurunṅ gobe wol heṅ gunenṅ geb,’ inenṅ esenṅ mere iryiṅ. ²⁷ Irkeb bunineṅ kenenṅbe, ‘Hora go wol heṅ heṅ ge ma nurayiṅ,’ inenṅ tubul tike kuriṅ. ²⁸ Goyenbe kunṅ metenṅ al kadom hora diriṅenṅ muṅ kura unke ma wol hitiṅ al goyen kinyiṅ. Irde hapekde tenṅbe, ‘Araṅenṅ horane wol hawa!’ inyiṅ. ²⁹ Irkeb kadom go kimiṅ mar dokolhonṅ yugulunṅ tenṅbe, ‘Bemel nirde ma yo. Horage wol heṅ gunenṅ geb,’ inyiṅ. ³⁰ Goyenbe al go bunineṅ ma irde kadom go tagal unenṅbe, ‘Horane wol heke gab tenṅ siṅa irnayiṅ,’ yinke tukunṅ koyare keramiṅ.

³¹ “Be, metenṅ mar kadom beḷeṅ mata go kenenṅbe biṅ ar yamiṅ. Irdeb kunṅ doyaṅ almiṅ go mata kurunṅ al gore tiyyiṅ goyen momonṅ iramiṅ. ³² Irkeb doyaṅ al beḷeṅ metenṅ almiṅ go hoy irke wakeb, ‘Geb metenṅ al bulunṅ. Horane epte ma wol hetek geb, esenṅ mere nirkeb bunineṅ girde goṅmiṅ ginmiṅ. ³³ Ne beḷeṅ bunineṅ girde kandukge kurunṅ go pasi irde gunmiṅ gwahade

goyen po, ge belen wor daniñ geb kadge gwaha ma iran?’ inyiñ. ³⁴ Doyañ al go biñ ar wor po yekeb, ‘Al go koyare kernañ!’ yinyiñ. Irdeb, ‘Horane tumñañ wol heke gab tubul tike kuyen,’ yinyiñ. ³⁵ Nanne Al Kurun sañiñ miñyañ gore deñ wor mata gwahade goyen po diryen. Niñgeb kadtin yago bulun dirnayan goyen bitinde mat wor po halde yunen hinayan. Mali hende hendem ma tinayan,” yinyiñ.

19

Al belen bere yakira ten ten mata (Mak 10:1-12)

¹ Be, Yesu go mere gwahade mat al saba yirdeb Galili naña tubul ten Yodan fe gama irde Yudia nañare kuriñ. ² Kun hikeb al budam gama irde kun hinhan. Irke al garbam miñyañbe sope yirke igin heñ hinhan. ³ Gwaha ten hikeyabe Farisi mar kura belen tunañ urniñ yen wañbe, “Al kura miñ goke kuram moñ berem takira tiyyen gobe Moseyen sabarebe igin yitiñ we?” inamiñ. ⁴ Irkeb wol heñbe, “Hañkapyä wor po tikula kerdyabe Al Kurun belen al irde, bere irde iryiñ goyen Al Kurunyen asañde katiñ hi gobe ma kapyañ heñ hanñen?” ⁵ Al Kurun belen gwaha yiryiñ geb, goke tenbe albe naninya miliña yubul ten kun bere-mya gabu hiriryen. Irke al belen yenenmiñ iraw goyen Al Kurun diliñdebe unñkuren po yinyen. ⁶ Niñgeb irem gobe hoyañ hoyañ ma hiriryen. Unñkuren po hiriryen. Gwahade geb Al Kurun belen alya bereya yade gabu yiryen gobe al belen epte ma bur yirnayiñ,” yinyiñ. ⁷ Irkeb mel goreb,

“Gwahade kenem daniñ geb Mose belenñ igiñ bere takira tenñ tenñ asañ kanñ unenñbe takira tiyayinñ yirinñ hi?” yenñ gusunñanñ iraminñ. ⁸ Irkeb wol henñbe, “Denñbe tonanñtinñ sanñinñ wor po, mere ma nurtek goke tenñbe Mose belenñ gwaha dinyinñ. Goyenbe hanñkapyar wor po minñde matbe gwahade moñ. ⁹ Ninñgeb al kura berem al hoyanñya ma duwan tenñ hikeya takira tenñ bere hoyanñ tiyyenñbe Al Kurunñ dilingñde mata bulunñ tiya yenñ kinyenñ,” yinyinñ.

¹⁰ Irkeb komatminñ belenñ, “Be, gwahade kenem bere ma tenñ dulinñ henñ henñ gobe igiñ,” yaminñ. ¹¹ Gwaha yekebe, “Al berem moñ dulinñ hitek yahanñ gobe al tumñanñ gwahade hitek moñ. Al yunñkurenñ igiñ gwahade po hinayinñ yenñ yirtinñ mar gore po gab gwahade hinayinñ. ¹² Al kurabe bere ninñ ma wor po nurde hanñyen. Goyen mar gobe kurab gwahade po kawanñ hitinñ. Munanñ kurabe al belenñ po minñ minñyanñ gwahade yirtinñ. Munanñ kura marbe Al Kurunñ belenñ yende alya bereya doyanñ yirde hi gote metenñ po tenñ hininñ yenñ bere ma yade hanñyen. Ninñgeb al gwaha titek mar po gab igiñ gwaha tenñ hinayinñ,” yinyinñ.

Dirinñ mukñenñya Yesuya

(Mak 10:13-16; Luk 18:15-17)

¹³ Be, dirinñ mukñenñ go Yesu belenñ haninñ yerde Al Kurunñ gusunñanñ irke guram yirde sanñinñ yiri yenñ naninñya milinñya belenñ yawayaminñ. Irkeb komatminñ yago belenñ yinenñ tenñ utanñ yiraminñ. ¹⁴ Goyenbe Yesu belenñbe, “Utanñ yirde ma. Dirinñ mukñenñ go yubul tike ne hitte yawanñanñ. Al kura Al Kurunñyen al hewe yenñbe dirinñ belenñ naninñya milinñya hitte kunñ kunñ ninñ kama ma henñ

hanŷen go gwahade hiyyen gab Al Kurun be len yende alya bereya doyan yird yird gobe yende hiyyen,” yinyin. ¹⁵ Gwaha yinenbe dirin muknen go guram yirde yubul tenbe hoyande kurin.

Al samunmin budam

(Mak 10:17-31; Luk 18:18-30)

¹⁶ Be, gon hikeb al kura gore Yesu hitte wanbe, “Tisa, da mata igin ten gab Al Kurunya huginen hiren?” inen gusunan iryin. ¹⁷ Irkeb, “Danin geb det igin nin gusunan nirde ha? Al Kurun unken po ga al igin geb. Yenya huginen hen hen nin nurde ha kenem Moseyen saba goyen gama irde hayin,” inyin. ¹⁸ Irkeb al gore, “Saba damin damin nin yen ha?” inyin. Irkeb, “Al ma gasa yirke kamnain, al berem yanbe bere hoyan duwan ma irde hiyen, kawe ma tiyain, merere huwarde usi mat ma mere tiyain. ¹⁹ Irde momkeya nanakeya palap yirde meremin nurde hayin. Irde gigen ge amanen nurde hayen gwahade goyen po kadge hoyan nin wor amanen nurde hayin,” inyin. ²⁰ Irkeb al gore, “Go ninha gobe tumnande nurde gama irde himyen. Da mata wor po son hen himyen geb, goyen tiyain yen ninen ha?” yen gusunan iryin. ²¹ Irkeb, “Al Kurun dilinde al huwak wor po hewe yenbe kun samunke kurun goyen al yunke damu tikeb hora go yade yukun al det nin amu hen han mar goyen yunain. Irkeb Al Kurun be len nere hihi yen genke gab wan gama nirain,” inyin. ²² Irkeb al fonen gobe samunya detminya budam wor po geb, Yesuyen mere nurdeb binde kanduknen wor po nurdeya kurin.

²³ Gwaha tikeb komatmin yago goyen, “Fudinde wor po dinen hime. Al samunmin budam wor pobe Al Kurun belen yende alya bereya doyan yirde hi bana gon hurkun hurkun gobe metenen wor po geb. ²⁴ Dapna kurun kamelbe det haran hej hej kutum yamen dirnen mun wor po goyen bana epte ma hurkuyen. Gwahade goyen po, al samunmin budam wor Al Kurun belen alya bereyamin doyan yirde hi bana gon epte ma hurkunayin. Ningeb det irawa goyen tumnande metenen. Goyenbe daminbe metenen wor po yen nurde han? Al samunmin budam gobe metenen wor po geb,” yinyin. ²⁵ Irkeb komatmin yago belen mere go kukuwamnen wor po nurdeb, “Ningeb ganun mar po gab Al Kurun belen yawaryen?” inamin. ²⁶ Irkeb mel go yenenbe, “Mata gobe alyen tarenbebe epte mon. Goyenpoga Al Kurunen tarenbebe det kura metenen minmon,” yinyin.

²⁷ Irkeb Pita belen, “Be, nenbe detninin tumnan yubul ten gama girtin. Ningeb kamebe da yawartek?” inyin. ²⁸ Irkeb gaha yinyin: “Fudinde wor po dinen hime. Nalu funande Al Kurun belen megenya naninya gergen yiryen nature goyenter ne Al Urmin gabe saninne tunun yana maroro gasuner keperde alya bereyane doyan yiren. Irde den 12 gama nirde han mar gayen manan maroro gasuntinayan keperde nere alya bereya tumnan, al min 12 Israel yinen hinayin goyen doyan yirnayin. ²⁹ Irde al kura nere alya bereya nin ten yamin, haymin, babam, itin, kulin, nanin, milin, dirinmininyabe metenminya

yubul tinayinbe gote murungembe budam wor po yawarnayin. Irde Al Kurunya huginjen hen hen goyen manan yende hiyyen. ³⁰ Goyenpoga al kura yingen ge yen, 'Nebe gwaha gwaha timin geb, gote murungem kurun al hoyande gote folek wor po tewen,' yiyyen al gobe dirnen mun tiyyen. Munan al kura nebe hako hime yen nurde hiyen al gobe murungem kurun wor po al hoyande gote folek tiyyen. Ningeb al mehende hiyen al gobe kame hiyen. Munan kame hiyen al gobe mehende hiyen," yinyin.

20

Wain meten marte siraw mere

¹ Be, meremin goke tenbe siraw mere matbe gaha yinyin: "Al Kurun belen alya bereya doyan yird yird mata kurabe gahade: al denem yan kura wain metenner al yawarmeke wan meten tinan yenbe wampot mun po kurin. ² Kunbe, 'Hanƙa nanƙahal meten tinayinbe denari* unƙuren unƙuren dunen,' yinyin. Irkeb igin yen nurdeb metende kwamin. ³ Be, kun 9 kilok nana gwahade hekeb wain meten min al go gabu irde hanƙen gasunde gor kun al hoyan dulin meten minmon hinhan goyen yinyin. ⁴ Irdeb, 'Den wor kun metenner meten tinan. Irkeb hora gwahade igin dunen yen nurde hime goyen dunen,' yinyin. ⁵ Irkeb kwamin. Al go sopte po nana banƙahalya 3 kilok wawunbanaya wor kun meten mar yad

* **20:2:** Denari: Al belen wampot mat meten tenbe wawunbana nana sul yeke bada henbe gote hora tiyyenbe denari unƙuren tiyyen.

yerke metenminde kuŋ meten tiyamin. ⁶ Be, 5 kilok wawunbana wor po kuŋbe al hoyan kura meten minmon dulin hike yinyin. Irdeb, 'Danin dulin meten minmon wor po hike nana hubu hewen tiya?' yinyin. ⁷ Irkeb, 'Mon, al kura belen meten kura ma dunkeb gago dulin hite,' inamin. Irkeb, 'Den manan kuŋ wain metenner meten tinaŋ,' yinyin.

⁸ "Be, nɔmtuk urkeb meten min al goreb metenmin doyan ird ird al goyen gaha inyin. 'Meten tahaŋ mar goyen hoy yirde murungem yunayin. Funan wor po waŋ meten tahaŋ mar go wa damu yirayin. Irde kuŋ kuŋ funanbe wampot muŋ yeŋ wa wayhan mar goyen damu yirayin,' inyin. ⁹ Funan wor po wayamin mar gobe denari unkuŋen unkuŋen yawamin. ¹⁰ Niŋgeb go yeneŋbe wampot mat meten tiyamin mar gobe hora hende wor po tinin tihit yeŋ nuramin. Gega yeŋ manan denari yunkuŋen po yawamin. ¹¹ Horamin go yadeb meten min al goke igin ma po nurde bin ar yamin. ¹² Irde, 'Al gayamuŋ ga waŋ metenŋe tahaŋbe neŋ hora tihit gahade po tahaŋ. Neŋbe wampot mat nana misin ma yeŋ meten kurun wor po tihit,' inamin. ¹³ Gega meten min al gore huwarde kuramin kura goyen, 'Kadne, al hoyan po igin yirde, denbe bulun ma dirhem. Denbe igin denari unkuŋen goke meten titek ma yahan?' ¹⁴ Dufaynerbe al kamere meten ten nunhanya denyabe murungem tunande dunen yeŋ nurhem. Niŋgeb horatin yade kunan. ¹⁵ Horabe nigen geb daha wet kura ire yeŋbe gwahade po ireŋ. Gega danin geb

al buninɛn yirde faran yurhem goke igin ma nurhan?’ yinyin. ¹⁶ Al Kurun belen yende alya bereya doyan yird yird matabe gwahade geb, al kame hiyen al gobe mehenɛde hiyen. Munan mehenɛde hiyen al gobe kame hiyen,” yinyin.

*Yesu belen kamde kamdeɛnin ge sopte tagalyin
(Mak 10:32-34; Luk 18:31-34)*

¹⁷ Be, Yesu go Yerusalem kun henɛyabe komatin 12 goyen po yapat yiryin. ¹⁸ Irdeb, “Nenɛbe Yerusalem kun hite gago. Irde ne Al Urmin gayen al kura belen tagal nunkeb Al Kurun dolon ird ird mata doyan marte karkuwanɛya Moseyen saba marya belen nade fere nirnayin. ¹⁹ Yen belen mayke kami yenɛbe al min hoyan Yuda mar mon hitte nad nerke kwen. Irkeb yen belenɛbe giwgiw nirde nusulak tenɛbe kuruse hende mununke kamen. Gega kamenɛde mat kun yerenkek hekeb sopte huwaren,” yinyin.

*Sebedi beremde gusunɛn
(Mak 10:35-45)*

²⁰ Be, Sebedi berembe urmin waran yade Yesu hitte wayamin. Wanɛbe dokolhon yugulun tenɛbe gwaha nirwon yen Yesu gusunɛn iryin. ²¹ Irkeb, “Danin wor po nurde ha?” inyin. Irkeb bere gore, “Igin yen kenenɛbe ge belen alya bereya doyan yirde hayinɛde gorbe urne waran gayen ketalger hen tumnanɛde al doyan yirde hinayin,” yirin. ²² Irkeb Yesu belen, “Min gwahade nin gusunɛn hihit yen nurdeya ma gusunɛn hahan geb. Kanduk kurun tewen ten hime gayen epte tenayin?” yinyin. Irkeb, “Epte tetek,” inamin. ²³ Irkeb Yesu belen, “Fudinde kandukbe tiriryen

gega, neya hej al doyanj yird yird nin gusunaj nirhan gobe ne belej iginj ma bulunj ma dinen. Ne ketalner kurhan kurhan hej denem yan hej hej gobe Nanne belej hakot al basinja yirtin han gore yawarnayin,” yinyin.

²⁴ Be, komatminj hoyanj 10 gore mere go nurdeb ire itinja goke binj ar yaminj. ²⁵ Irkeb Yesu belej tumnanj hoy yirdeb gaha yinyin: “Megen nin doyanj mar karkuwanbe al kafura yirkeb yen yufukde po hanjen. Irde yende metenj marminj mananj denjininj yan hihit yen nurdeya al kanduk yunenj hanjen. ²⁶ Gega denbe gwahade monj. Al kura denj kahal bana gayen al kurunj hewe yen nuryenj gobe yingenj ge ma nurde dende metenj al po hiyyenj. ²⁷ Ningeb denj bana al kura doyanj al hewe yenbe yingenj ge ma nuryenj. Irde denj ge po dufay hej dende metenj al po hiyyenj. ²⁸ Gwahade ningeb, ne Al Urminj gayen wor al belej iginj iginj nirnanj yen ma katmirinj. Ne belej po al iginj yire yen katmirinj. Irdeb alya bereya budam gote mata bulunminj gote murungem yingenj yawartek goyen ne belej yawarenj goke tenj darine wok irde kamenj yen katmirinj,” yinyin.

*Al irawa dilinj titminj nanjkenaryum
(Mak 10:46-52; Luk 18:35-43)*

²⁹ Be, Yesuya komatminja goya Yeriko taun tubul tenj kunj hikeyabe al buda kurunj gama irde kunj hinhan. ³⁰ Goya goyenbe al irawa dilinj titminj kura belej sinare keperde hinaryum. Irde Yesu gago wanj kunj hi yinke nurdeb, “Doyanj Al Kurunj, Dewit Urminj, buninenj nurd dunenj faranj dura be!” yen hokde po gwaha inaryum. ³¹ Irkeb

al buda gore nurde yinen tenbe, “Balmin hiri!” yinamin gega, ug po, “Doyan Al Kurun, Dewit Urmin, buniñen nurd dunen faran dura be!” inaryum. ³² Irkeb Yesu go tek yen huwarde hoy yirdeb, “Daha dirwon yen nurde har?” yinyin. ³³ “Doyan Al Kurun, nankenyewon yen nurde har.” inaryum. ³⁴ Be, Yesu gob buniñen wor po yenenbe dilinyan sisan yurkeb goyare po nankenen gama irde yen kun hinhin beñen gon kwaryum.

21

*Yesu Al Kurunyen ya balem bana hurkurin
(Mak 11:1-11; Luk 19:28-40; Yon 12:12-19)*

¹ Be, Yesuya komatminya go Yerusalem binde binde hamin. Tiyun kura denem Betfage gobe Olip dugu dabayin beñen hinhin. Be, Yesube gor forok yenbe komatmin irawa kura hulyan yirdeb, ² “Kuri. Kun tiyun iroyenter forok yenbe donki al dirin fonen kura gor milinya yen titin yenenbe yugu ten yade wayiryen. ³ Al kura beñen goke daha wet kura dinkeb, ‘Doyan Al Kurun beñen goke yihi,’ inkeb yubul ten dunkeb yade wayiryen,” yinyin. ⁴ Yesu go tiyyin gobe bikken Al Kurunyen mere basan hen hen al beñen yirin goyen fudinde forok yen yen ge tiyyin. Merebe gahade:

⁵ “Yerusalem* nin mar goyen gaha yinnañ.

‘Doyan Al Kurunin den hitte wan hi.

Al gobe yingen ge turun turun ma ten hi.

Ningeb al gobe donki hende wan hi.

* 21:5: Denem hoyanbe Saion.

Donki gobe foŋeŋ, yinnayin,” yitiŋ hi.
Aisaia 62:11; Sekaraia 9:9

⁶ Be, Yesu komatmin go kuŋbe yinyin gwahade po tiyaryum. ⁷ Donki foŋeŋya miliŋya go yawakeb komatmin beŋe uliŋhormin yugu teŋ go hende ugamkeb hurkuŋ kipiryin. ⁸ Al budam Doyaŋ Al Kuruninin waya yeŋ uliŋhormin yugu teŋ beŋe yaŋ ugamamin. Kurabe patila hanin yufuŋ tiyamin goyen beŋeŋyaŋ sar irde tukamin. ⁹ Al kurabe meheŋ hekeb kurabe kame hamin. Irdeb tumŋaŋ ala turuŋ iramin.

“Dewit Urmin turuŋ irnin ko.”

“Doyaŋ Al Kurunyen deŋemde waŋ hi gobe Al Kuruŋ beŋe guram irde saŋin iryen!” *Tikin 118:25-26*

“Al Kuruŋ turuŋ irnin ko.”

¹⁰ Be, Yesu go kuŋ Yerusalem forok yekeb taunde gor nin mar gob tumŋaŋ hurkuŋkat wor po teŋbe, “Al gab ganuŋ?” yamin. ¹¹ Irkeb al buda goreb, “Al gabe Yesu Al Kurunyen mere basaŋ al. Yeŋbe Galili naŋa bana goŋ nin tiyuŋ Nasaret nin al,” yinamin.

*Yesu beŋe Al Kurunyen ya balem haraŋ hirin
(Mak 11:15-19; Luk 19:45-48; Yon 2:13-22)*

¹² Be, Yesu go Al Kurunyen ya balem koya beŋe po milgu irtin bana goŋ gabu gasuŋ kurunde hurkuŋbe al buda gor det damu teŋ hinhan go kwep kwep yirde yakira tiyyin. Irde hora kapyan heŋ heŋ mar beŋe hora yirtin gasunya damure nin kalyinŋi yawaŋ yerdeb keperde

hanyen gasunja goyen yade yabolon tej yuniñ.†
 13 irdeb, “Al Kurunyen mere asanđe katiñbe gahade: ‘Ya gabe ne mere nird nird gasun. Gar wañ gabu irde mere nird nird ya hiyyen,’ gwahade yitiñ hi. Goyenbe deñ belenbe tej ‘kawe marte gasun’ irde hañ,” yiniñ.

14 Be, Yesu go ya balem bana goñ po hikeya al diliñ titminya kahañ simsimanya goyen yeñ hitte wake sope yiriñ. 15 Irkeb diriñbe bana goñ, “Dewit Urmiñ turuñ irniñ ko!” yeñ hewhow tej hinhan. Irkeb Al Kurun dolon ird ird mata doyañ mar pris buda gote karkuwanminya Moseyen saba maryabe Yesu beley mata tiñen forok yiriñ goyen kenamiñ, irde diriñ beley Yesu goyen Dewit Urmiñ yeñ turuñ iramiñ goyen nurdeb biñ ar wor po yamiñ. 16 Irdeb wañ Yesu gusuñan iramiñ. “Gebe diriñ mere tej hañ gayen nurde ha?” inkeb wol heñbe, “Gwaha, nurde hime. Deñbe diriñ beley mata tej hañ goke Al Kurunyen asandeb, ‘Diriñ kahanyañ hitinya diriñ mamure niñya beley turuñ nird nird niñ gitik yirtiñ,’ yitiñ gobe kapyañ ma heñ hanyen?” yiniñ. 17 Gwaha yinenbe yubul tej Betani taunde kuñ go wawuñ gobe gor hinhin.

*Yesu beley fik he karan uryiñ
 (Mak 11:12-14,20-24)*

18 Be, fay urkeb wampot muñ Yesu go mulgan heñ Yerusalem kuñ heñyabe belen biñge iryiñ.

† **21:12:** Hora kapyañ heñ heñ marbe Roma gabmanyen horaya Yuda marte hora goyen al beley yeñ yunke Al Kurunyen ya balemde niñ hora tej wolmiñen al go yunke gab Al Kurun galak irniñ yeñ ya bana goñ yerde hanyen.

¹⁹ Irkeb fik he yuwalñen digula urtiñ goyen belen sinjare hike kenenbe iginen minyan daw yen kuñ kinyiñ. Kuñ minde mat kinyinbe iginen minmon, yuwalñen belen po aw urtiñ. Gwahade kenenbe Yesu belen he goyen, “Tebañ iginen ma hawayiñ,” inen karan uryiñ. Irkeb goyare po gwilgwal iryiñ.

²⁰ Be, Yesuyen komatmiñ go fik he goyen goyare po kamtiñ heke kenenbe diliñ fot yamiñ. Irdeb, “Dahade geb he gob bemel po gwilgwal ira?” yamiñ. ²¹ Irkeb Yesu belen wol henbe, “Fudinde wor po dinen hime. Al Kurun niñ hekkeñ nurde dufay irawam ma irnayinbe ne belen fik he irhem gwahade igiñ tinayiñ. Irdeb dugu wor, ‘Kuñ makañ alare kurka,’ inkeb gwaha po tiyyen. ²² Al Kurun niñ hekkeñ nurde det kurañ gusuñan irkeb tumñan dunyen,” yinyiñ.

*Yesu tareñmiñ ge gusuñan iramiñ
(Mak 11:27-33; Luk 20:1-8)*

²³ Be, Yesu go Al Kurunyen ya balem koya belen po milgu irtiñ bana sawsawa al gabu irde hanyende gor hurkuñ al saba yirde hinhin. Irkeb pris buda gote karkuwanminya Yuda marte doyan mar parguwakya belen Yesu hitte wanbe, “Mata teñ ha kurun gayenbe da tarende teñ ha? Ganuñ belen igiñ gwaha teñ hayiñ ginuñ?” inamiñ. ²⁴ Irkeb, “Ne wor gusuñan kura direñ tihim gayen wol henayiñ. Irke gab nebe goyen saninde teñ hime yen momoñ direñ,” yinenbe gaha yinyiñ. ²⁵ “Yon Baptais belen al baptais yirde hinhin gobe Al Kurunyen tarende ma alyen tarende? Momoñ nirnan,” yinyiñ. Irkeb mel goyen yingen uliñ mere sege irdeb, “Daha intek?”

Al Kurunjen sañinde intek gob, ‘Munañ daniñ sabamiñbe fudinde yeñ gama ma irde hinhan?’ dinyeñ. ²⁶ Munañ alyen sañinde yetek gob al buda kurunñ gabe Yon Baptaisbe Al Kurunjen mere basañ al yeñ nurde hañ geb, biñ ar yeke mudunnayiñ,” yamiñ. ²⁷ Irdeb mel goreb, “Go ma nurde hite,” inamiñ. Irkeb Yesu belenñbe, “Ne wor al gore ok ninke teñ hime ma dineñ,” yinyiñ.

Al kurat urmiñ warañ gote maya mere

²⁸ Irdeb Yesu belenñbe, “Ga dineñ tihim gayen dahade nurnayiñ goyen tagalke nurenñ. Be, al kura urmiñ irawam yañ hinhin. Kurarebe urmiñ kurunñ hitte kuñbe gaha inyiñ. ‘Eke, hañkabe kuñ wain metenñde metenñ tiyayiñ,’ inyiñ. ²⁹ Irkeb urmiñ kurunñ goreb, ‘Badne,’ inyiñ. Goyenbe kamebe dufaymiñ mulgañ hekeb kuñ metenñ tiyyiñ. ³⁰ Be, al gob urmiñ dirneñ hitte wor kuñbe urmiñ kurunñ inyiñ gwahade po inyiñ. Irkeb urmiñ dirneñ goreb, ‘Be, doyañ al, gwaha tiyenñ geb,’ inyiñ. Goyenbe kuñ metenñ ma tiyyiñ. ³¹⁻³² Niñgeb diriñ damiñbe naniñde mere nurde gama iryiñ?” yinyiñ. Irkeb mel gore wol henñbe, “Urmiñ kurunñ gore,” inamiñ. Irkeb Yesu belenñ wol henñbe, “Denñbe Yon Baptais belenñ wañ Al Kurunñ diliñde huwak henñ henñ niñ yekeb meremiñ ma nurañ. Irde matamiñ goyen yenañ gega, meremiñ fudinde yeñ ma nurdeb Al Kurunñ niñ bitiñ mulgañ ma hiyuñ. Goyenbe teks yad yad marya bere belen niñyabe fudinde yeñ nurañ. Niñgeb fudinde wor po dinhem. Teks yad yad marya bere belen niñyabe denñ fole dirde yeñ wa

Al Kurun belen alya bereyamin doyan yirde hi bana gon hurkunayin,” yinyin.

Wain meten doyan irde hinhan mar gote maya mere

(Mak 12:1-12; Luk 20:9-19)

³³ Irdeb Yesu gobe teban gaha yinyin: “Maya mere hoyan ga nurnan. Al kura wain meten harde koya kerde milgu irdeb wain fimin gilyan hej hej nin mete talde det gitik yiryin. Irdeb ya kawan kura al gor hej wain meten go doyan ird ird nin iryin. Irdeb meten gobe meten mar hoyan haniinde kerdeb nan gisaw kurin. ³⁴ Be, wain iginen yad yad nalu hekeb min al gore meten marmin karwo hulyan yirkeb wain iginen kura yawarnin yen kwamin. ³⁵ Goyenbe mel goreb gasa yiramin. Unkuren maydeb kurabe mayke kamyin. Irdeb funanbe horare mayamin. ³⁶ Be, al gob teban po meten marmin kura budam hulyan yirke kwamin. Kukeb mehende yiramin gwahade po yiramin. ³⁷ Irkeb funan wor pobe, ‘Urne hulyan ire. Gogab palap irde meremin nurnayin geb,’ yenbe urmin ten kerke kurin. ³⁸ Gega wain meten doyan irde hinhan mar gobe kadam momon gird tenbe, ‘Meten gate min al gote urminbe gago geb, mayteke kami. Gogab meten gayen nanin minmon hekeb nende hiyyen,’ yamin. ³⁹ Irdeb meten min alyen urmin go ten tukun meten sinare mayke kamyin. ⁴⁰ Gwaha tikeb meten min al gore wanbe daha yiryen yen nurde han?” yinyin. ⁴¹ Irkeb Al Kurun dolon ird ird mata doyan marya Yuda marte doyan mar parguwakya belen wol henbe, “Mata

buluŋ tinayiŋ mar go gasa yirke kamnayiŋ. Irde metenmiŋ go teŋ al hoyaŋ haniŋde kiryeŋ. Irkeb mel gore gab wain igineŋ yad yad nalurebe yeŋ untekebe unenŋ hinayiŋ,” inamiŋ. ⁴² Irkeb Yesu belen wol heŋbe, “Deŋbe Al Kurunyen mere gahade katiŋbe ma keneŋ hanyen? Merebe gahade:

‘Ya yird yird mar belen igiŋ moŋ yeŋ nurde pel iramiŋ hora goyen al hoyaŋ belen teŋ go hende ya saŋiŋ wor po iryiŋ.

Go iryiŋ gobe Doyaŋ Al Kurun belen iryiŋ.

Niŋgeb Al Kurun belen iryiŋ gob dilniniŋdebe igiŋ wor po yeŋ keneŋ hite,’ yitiŋ hi. *Tikiŋ 118:22-23*

⁴³ “Niŋgeb fudinde wor po dineŋ hime. Deŋbe Al Kurun belen alya bereyamiŋ doyaŋ yirde hi bana goŋ hitek gega, dakira teŋbe Al Kurun diliŋde mata igiŋ teŋ hinayiŋ mar goyen po gab yunyen. ⁴⁴ Niŋgeb Al Kurunyen asaŋde hora niŋ yitiŋ gobe ne gago. Niŋgeb al kura hora go hende takteŋ mayyenbe mugol niyyen. Irde hora gore kateŋ hika tiyyen al gobe umetek tiyyen. Niŋgeb al kura neneŋ bebak ma tinayiŋ mar hittebe kame mata gwahade forok yiyyen,” yinyiŋ.

⁴⁵ Be, pris buda gote karkuwanmiŋya Farisi marya go Yesuyen maya mere go nurdeb, “Neŋ ga po dineŋ hi,” yeŋ nuramiŋ. ⁴⁶ Irdeb daha mat kura teŋ fere titewoŋ yeŋ nuramiŋ. Irdeb Yesube al buda gore yeŋbe Al Kurunyen mere basaŋ al yeŋ nurde hinhan geb, al buda goke kafura hamiŋ.

22

Bere tej tenje niñ dula mata gote maya mere (Luk 14:15-24)

¹ Be, Yesu go teban po maya mere mat al gaha yinyin: ² “Al Kurun belen alya bereyamin doyan yird yird goyen kurabe gahade: doyan al kurun kura urmin bere tewe yekeb dula mata kurun gitik tiyyin. ³ Irdeb meten marmin hulyan yirdeb, ‘Kun dula mata gake al hoy yirmin mar goyen yinke wanan,’ yinyin. Goyenbe kun yinkeb bada hamin. ⁴ Irkeb meten marmin hoyan wor sopte hulyan yirdeb gaha yinyin. ‘Kunbe, “Doyan al kuruninin belen bulmakaw firfurnen gasa yirde det tumnan gitik tej ep ira. Irdeb wanayin yen den ge keya hihi geb wake kuniñ,” yinnayin,’ yinyin.

⁵ “Be, meten marmin gore kun al hoy yiryin mar goyen yenenbe doyan almin belen yinyin gwahade po yinamin. Goyenpoga yende mere go ma nuramin. Irdeb dufayminde dufayminde kwamin. Al kurabe binje metenminde kurin. Munan kurabe hora metenminde kurin. ⁶ Al kura marbe doyan al kurunde meten mar buda goyen yade bulun bulun yirde gasa yirke kamamin. ⁷ Gwaha tikeb doyan al kurun go bin ar yekeb fulen marmin yad yerke kwamin. Kunbe al buda meten marmin gasa yiramin goyen gasa yirke kamkeb tiyunmin go manan kunga tiyamin.

⁸ “Gwaha tenje doyan al kurun go meten marmin yenya hinhan go hoy yiryin. Irdeb gaha yinyin. ‘Dawetbe tumnan gitik tej ep irtin

gega, al watek mar wor pobe waŋ waŋ niŋ bada hahan. ⁹ Niŋgeb kuŋ belenyaŋ alya bereya kura yenenbe mali po yinkeb dula mata tiyen tihimde gar wanayin, yinyin. ¹⁰ Gwaha yinkeb meten marmin gobe taun bana goŋ niŋ belen hanin hanin gama yirdeb kuŋ al bulunya iginya goyen yenenbe mali po yinke wayamin. Be, al go waŋ keperaminbe yabe makin wor po hirin.

¹¹ “Irkeb doyaŋ al kurun belen al gabu iramin go yene yen waŋbe al kura dula matare niŋ umŋa ma titin goyen kinyin. ¹² Kenenbe, ‘Dula matare niŋ umŋa ma taha gega, daha mat bana gaŋ wayha?’ inkeb al gob mere ma po tiyyin. ¹³ Irkeb doyaŋ al kurun goreb, ‘Teŋ kahanya haninya fere teŋ siŋare kidoma bana temeynaŋ. Gorbe esen misin isen bana goŋ hiyen,’ yen meten marmin hulyaŋ yiryin. ¹⁴ Be, maya mere ga nurhaŋ gwahade goyen po, Al Kurun belenbe al budam hoy yirde hi gega, yunƙuren yunƙuren po gab nigen yen basaŋa yirtin haŋ,” yinyin.

Farisi mar belen teks kerd kerd niŋ Yesu gusunŋa iramin

(Mak 12:13-17; Luk 20:20-26)

¹⁵ Be, Farisi mar go meremin nurde bin ar yekeb siŋare katenbe Yesu go soŋ hekeb merere kertek yen yingen ulin mere sege iramin. ¹⁶ Irdeb yingenŋe komatmin yad yerke Yesu hitte kwamin. Herot gama irde hanjen mar manan yensa tumnaŋ kwamin. Kuŋbe Yesu goyen, “Tisa, gebe mata fudinde po ga teŋ hayen. Irdeb Al Kurunyen merebe fudinde mat po saba teŋ hayen. Gebe al denjem yanja denjem monja

goyen mereya matayabe tunjande po yirde hayen. ¹⁷ Niñgeb gebe dahade nurde ha? Neñ Moseyen saba gama irde hite mar gayen Roma gabmanyen doyañ al kurunj Sisar niñ teks kertek gobe iginj ma dahade? Iginj momon dirayinj?” inaminj.

¹⁸ Goyenpoga Yesu gob dufayminj bulunj gob bikkenj yenenj bebak tenjebe, “Usi mar wor wor, daninj tunjñ nirde hañ? ¹⁹ Teks yerde hanjen hora go nikala nirke kene,” yinyinj. Irkeb denari unjkurenj tawayaminj. ²⁰ Irkeb al tonenj hora hende gor kenenjebe, “Gabe ganunj tonenja denjemya?” yinyinj. ²¹ Irkeb mel gore wol henjebe, “Sisaryen,” inaminj. Irkeb wol henjebe, “Gwahade niñgeb, det kura niñ Sisar belenj dinyenj gobe Sisar unnayinj. Munanj Al Kurunj belenj det kura niñ dinyenj gobe Al Kurunj unnayinj,” yinyinj.

²² Be, Yesu belenj mere tiyyinj go nurdeb dinonj kok yekeb tubul tenj kwaminj.

Sadusi mar belenj al kamtinj huward huward niñ Yesu gusunjanj iraminj
(Mak 12:18-27; Luk 20:27-40)

²³ Be, nanja fay goyare goyen po Sadusi mar belenj Yesu hitte wayaminj. Go mar gobe al kamtinjde mat epte ma huwarnayinj yenj hanjen. Be, mel go Yesu hitte wanjebe gusunjanj iraminj. ²⁴ “Tisa, Moseyen sabarebe, ‘Al kura dirinj minjmonj henja berem tubul tenj kamkeb kulinj kura hiyyenj gore itinjde beretap go tenjebe itinj niñ dirinj forok irde unyenj,’ gwahade yitinj hi. ²⁵ Be, al kura kulinj 6 minjanj goyen nenja hi-tyen. Al gobe bere tirinj gega dirinj minjmonj henja kamyinj. Irkeb kulinj belenj beretap go tirinj.

²⁶ Goyenbe yeŋ wor gwahade po dirin miŋmon henya kamyin. Irkeb yeŋ kamekken gore wor beretap go tamin goyen dirin kura ma forok irdeya kamamin. ²⁷ Irke funanbe bere go wor kamyin. ²⁸ Be, al goya kulin wenya gote berembe unkuren gogo po hinhin geb, kame al kamtin huward huward nalurebe bere gobe ganunde berem wor po hiyyen?” inamin.

²⁹ Gwaha inkeb Yesu belen wol henbe, “Denbe Al Kurunyen tarenya meremya asande katin goyen kenen wuk ma yeŋ hanyen. Gwahade geb son hen go ma kenen han. ³⁰ Al kamtin huwar-nayin nalureb al belen bere yade bere belen al ma kunayin. Yenbe Al Kurunyen miyon yara po henayin. ³¹ Al kamtin huward huward matabe Al Kurun belen asanminde, ³² ‘Nebe Abraham, Aisakyabe Yekopyat Al Kurun,’ yirin goyen gobe kapyan ma hen hanyen? Mel gobe kamtin gega, tonenbe yenya han geb, gogo yirin. Ningeb Al Kurunbe al dilin gergen han gote Al Kurun, al kamtin gote mon,” yinyin. ³³ Be, al buda gobe meremin nurdeb dinon kok wor po yamin.

Moseyen saba gote miŋ wor pobe da?

(Mak 12:28-34; Luk 10:25-28)

³⁴ Be, Yesu belen Sadusi marte gusunan go kenkela po wol hekeb gwaha mat kura mere titek mon hamin. Irkeb Farisi mar belen go nurdeb wan Yesu hinhinde gor gabu iramin. ³⁵ Irdeb unkurenmin kura Moseyen saba kenkela nurde hitin al gore wanbe tunan ure yeŋ gaha inyin: ³⁶ “Tisa, saba kurun gabe nurde hite. Goyenbe daminbe saba kurun gote folek wor po?” inyin.

³⁷ Gwaha inkeb Yesu belen wol henbe, “Bubulkunje, tonge, dufaygeya tarengaya tumnan Doyan Al Kurunje, Al Kurun hitte po huginje kun hiyen. ³⁸ Gabe Moseyen saba kurun gote folek wor po. ³⁹ Gote kurhanbe gigen ge amanen nurde hayen gwahade goyen po kadge hoyan nin wor amanen nurde hayin. ⁴⁰ Moseyen sabaya Al Kurunyen mere basan marya belen saba kayamin kurun gote minbe irawa gago po,” inyin.

Yesu belen Farisi mar go Mesaia nin gusunjan yiryin

(Mak 12:35-37; Luk 20:41-44)

⁴¹ Be, Farisi mar go gabu irde hikeb Yesu belenbe gusunjan yiryin. ⁴² “Den gayen Mesaiabe ganunde urmin yen nurde han?” Gwaha yinkeb Farisi mar gore wol henbe, “Yenbe Dewit urmin,” inamin. ⁴³ Irkeb Yesu belenbe, “Dewit urmin yen han gega, dahade ningeb Holi Spirit belen Dewit ketal urkeb urmin goyen, ‘Gebe Kurunje,’ inyin? Dewit belen Mesaia nin gaha yirin:

⁴⁴ ‘Al Kurun belen Doyan Al Kurunje gaha inyin: “Wan ketalner hen al denem yan wor po hawayin. Irkeb asogo girde han mar goyen bul yirde yawameke gasa yirde yufurka tiyayin,” inyin,’ yitin hi. *Tikin*
110:1

⁴⁵ Ningeb kapyan hen hanjen gwahade po, Dewit belen Mesaia goyen ‘Doyan Al Kurunje’ inyin. Ningeb dahade geb Mesaia gobe Dewityen urmin hiyyen? Gobe epte mon geb!” yinyin.

⁴⁶ Be, gwaha yinkeb al kura belen mun kura wol

ma hirinj. Irde goyenter matbe al kura wan Yesu tunjan urde merem yan irnin yen gusunjan irde hinhan gobe bada po haminj.

23

Yesu belej Farisi marya Moseyen saba maryat sikkenj tagalyinj

(Mak 12:38-39; Luk 11:43,46; 20:45-46)

¹ Be, Yesu gob komatminya al buda kurunya goyen saba yirde henya be gaha yinyinj:
² “Moseyen saba gote minj tagal tagal metenje Moseyen saba marya Farisi marya belej tenj hanyen. ³ Ningeb mel gore saba dirkeb kenkela gama irde hinayinj. Goyenpoga yingenjebe saba tenj hanyen goyen ma gama irde hanj geb, mataminj po gab gama ma yirde hinayinj. ⁴ Mel gobe mata gama irtek metenjej wor po goyen budam forok yirdeb gama yirnayinj yen tagalde hanyen. Irkeb albe kanduknenj wor po nurde hanyen. Goyenpoga bindebe munj kura gama irtek ma yirde hiyen. ⁵ Mata tenj hanyen kurunj gobe al belej dennanjen yen mata tenj hanyen. Al Kurunj doloj ird irdde ninj bisi pelyenj wor po kura Moseyen mere go hende katinj goyen tonande yerde hanyen. Irde Al Kurunj doloj ird irdde ninj ulinj umnja murunjen belej ninj sinjanjen goyen ulyanj wor po yirdeb hor yirde hanyen. ⁶ Yenbe dula mata karkuwanya gabu yayanjen kunj henjebe al denjem yanje gasunyanjen po kepertek nurde hanyen. ⁷ Irdeb gabu gasunyanjen kunjebe al belej yenenjen palap yirde ‘Tisa’ yinenjen yinenjen ninj amanjenjen nurde hanyen.

⁸ “Goyenbe Doyan Al Kurunṭinbe unḱurenṭ po, irde denḱbe tumṇanṭ yende dirṇenṭ wenṭ niṅgeb, denḱbe daniṅ ‘tisa’ ma dinhanṭ yeṅ ma nurde hinayiṅ. ⁹ Nantiṅbe Al Kurunṭ saṅiṅ miṅyanṭ yeṅ unḱurenṭ gog po geb al kura ‘Ado’ ma inenṭ hinayiṅ. ¹⁰ Tisaṅbe Mesaia yeṅ unḱurenṭ po geb, denḱbe daniṅ ma ‘Tisa’ dinenṭ hanṭ yeṅ ma nurde hinayiṅ. ¹¹⁻¹² Niṅgeb al kura yiṅgenṭ turunṭ turunṭ irde hiyenṭ al gobe Al Kurunṭ belenṭ yeṅbe denem moṅ iryenṭ. Irde al kura yiṅgenṭ nebe denem moṅ yeṅ hiyenṭ al gobe Al Kurunṭ belenḱbe denem yanṭ iryenṭ. Niṅgeb denṭ bana gayenṭ al kura doyanṭ al hewe yiyyenṭ al gobe dende metenṭ al hiyyenṭ,” yinyiṅ.

Farisi marya Moseyen saba marte mata bulunṭ goke yiriṅ

(Mak 12:40; Luk 11:39-42,44,52; 20:47)

¹³⁻¹⁴ Irdeb al buda gor gabu irde hinhanṭ goyenṭ gaha yinyiṅ: “Be, denṭ Moseyen saba marya Farisi maryabe usi mar wor po. Denḱbe Al Kurunṭyenṭ bearar bana hanṭ goke buniṅenṭ wor po nurd dunenṭ hime. Denṭ belenḱbe Al Kurunṭ belenṭ alya bereyamiṅ doyanṭ yirde hire gor kuṅ kuṅ belenṭmiṅ pet tenṭ hanṭ. Dindikenḱbe bana goṅ ma hurkuṅ hanṭ. Irde al hoyanṭ goyenṭ bana goṅ hurkuniṅ yeṅ kurut yeṅ hanṭ mar wor belenṭmiṅ

pet ten haɲ.* ¹⁵ Deɲ Moseyen saba marya Farisi maryabe usi mar wor po. Deɲbe Al Kurunyen bearar bana haɲ goke buninɛɲ wor po nurd duneɲ hime. Deɲbe, ‘Al yawarteke mataniniɲ gama irnan,’ yeɲbe al unɲkureɲ muɲ kura goke wor kahaɲtinɛde kurab hakwa hende kuɲ naɲa kurunɲ gayen pasi heɲ hanɲen. Irkeb al gore mataɲinɲ gama irkeb Al Kurunyen saba bulunɲ irde hanɲen. Irkeb al gote mata bulunɲminɲbe dende folek wor po kak alare kutek po yirde hanɲen.

¹⁶ “Deɲbe al diliɲ titmiɲ belɛɲ al kadom belɛɲ ikala irde tukuyeɲ go gwahade goyen ten haɲ. Niɲgeb deɲbe Al Kurunyen bearar bana haɲ goke buninɛɲ wor po nurd duneɲ hime. Deɲbe al saba gahade yirde hanɲen: ‘Al kura Al Kurunyen ya balem deɲe urde biɲa tiyyɛɲ goyen ma gama iryeɲ goke kandukɲɛɲ ma nuryeɲ. Goyenpoga al kura ya bana gol hora hiyen goyen deɲe urde biɲa tiyyɛɲ gobe gama po iryeɲ,’ gwaha yeɲ hanɲen. ¹⁷ Duliɲ kukuwa! Dilitiɲ titmiɲ buda! Dabe det kurunɲ? Gol hora ma ya goyen? Gol hora yeɲ uliɲbe det himam moɲ. Goyenbe ya goyen bana hi goke tenɲbe himam hiyyeɲ. Niɲgeb ya gobe det kurunɲ. ¹⁸ Sabatiɲ kurabe gaha yeɲ hanɲen: ‘Al kura alta deɲe urde biɲa tiyyɛɲ goyen ma gama iryeɲ goke kandukɲɛɲ ma nuryeɲ. Goyenpoga Al Kurunɲ galak ire yeɲ alta hende

* **23:13-14:** Asaɲ hoyanɛdebe gahade hi: ¹⁴ Deɲ Moseyen saba marya Farisi maryabe usi mar wor po. Deɲbe beretapyen samunɲa horaya komkom heɲ hanɲen. Goyenbe al hoyanɲ belɛɲ denɛɲ turunɲ dirnanɲ yeɲ Al Kurunɲ mere irhet yeɲbe mere ulyanɲ wor po tulunɲ tenɲ hanɲen. Niɲgeb deɲbe gote murunɲgem bulunɲ wor po Al Kurunɲ belɛɲ yunyeɲ.

kirtin goyen deñe urde biña tiyyen gobe gama po iryen,' yen hanjen. ¹⁹ Diltin titmin buda! Dabe det kurun? Alta ma det go hende hi goyen? Det go yen ulinbe himam mon gega, alta hende kerkeb himam hiyyen. Ningeb altabe det kurun. ²⁰ Ningeb al kura alta deñe urde biña tiyyenbe alta go mun po mon, det go hende Al Kurun galak irtin go manan deñe uryen. ²¹ Irde al kura Al Kurunyen ya balem deñe urde biña tiyyenbe ya go mun po mon, det ya go bana hinayin kurun goyen manan gog po deñe yuryen. ²² Irde nankinbe Al Kurunyen maroro gasun. Ningeb al kura nankin deñe urde biña tiyyenbe maroro gasun go po mon, go hende keperde hi Al goyen manan gog po deñe uryen. Ningeb biña tinayinbe go po gama irde hinayin.

²³ “Be, den Moseyen saba marya Farisi maryabe usi mar wor po. Deñbe Al Kurunyen bearar bana han goke buninen wor po nurd dunen hime. Deñbe binge hapek yird yird det harde hanjen goyen yade buda 10 yirdeb unkenbe Al Kurun unen hanjen. Goyenbe deñbe Moseyen saba kurun wor po goyen pel irde hanjen. Al kura den nurd yunen han mar po ga igin igin yirde, go ma nurd yunen han marbe gwaha ma yirde hanjen. Kadtin buninen nurd yuntek goyen buninen ma yirde hanjen. Irde Al Kurun nin heken nurtek goyen go ma po gwaha ten hanjen. Goyenbe Al Kurun galak ird ird mataya kadtin buninen nurd yunen yunen mataya gobe tumnan gama po irde hinayin. ²⁴ Goyenpoga deñbe Moseyen saba karkuwan karkuwanbe pel

yirdeb mukneḡ mukneḡ goke po gabe ug po yeḡ hanḡen. Goke teḡbe deḡbe fe niniḡ yeḡ det mukneḡ muḡ kirkida gwahade goyen goke keḡkela yakkelyaḡ teḡ yade siḡa yirde gab nene haḡ gega, dapḡa kuruḡ kamel netek moḡ wor go ma nurde heḡya yohogo teḡ haḡ yara deney hime. Deḡbe al kura diliḡ titmiḡ gore al kadom beḡeḡ ikala irde tukuyeḡ go gwahade teḡ haḡ.

²⁵ “Be, deḡ Moseyen saba marya Farisi maryabe usi mar wor po. Deḡbe Al Kurunḡen bearar bana haḡ goke bunineḡ wor po nurd duneḡ hime. Deḡbe al hoyaḡ beḡeḡ ulḡiḡ siḡare po deneybe al wukkeḡ yeḡ deney haḡ. Goyenpoga bitiḡ banabe kuḡiḡ mataya meḡen niḡ mata buluḡ hapekyan teḡ teḡ niḡya beḡeḡ po maḡiḡ hitiḡ. Niḡgeḡ deḡbe giḡsuya koronya siḡare po haldeb biḡdebe tikiḡ yaḡ yubul teḡ hanḡen yara deney hime. ²⁶ Niḡgeḡ deḡ diliḡ titmiḡ Farisi mar, meheḡdebe bitiḡ bana mata buluḡ haḡ go wa yade siḡa yirnayiḡ. Irke gab siḡare wor wuk yiyyeḡ.

²⁷ “Be, deḡ Moseyen saba marya Farisi maryabe usi mar wor po. Deḡbe Al Kurunḡen bearar bana haḡ goke bunineḡ wor po nurd duneḡ hime. Deḡbe bema kura siḡarebe umḡa irtiḡ haḡ. Gega biḡ banabe al kiḡkiniḡya det mormokya beḡeḡ po maḡiḡ hitiḡ haḡ go gwahade goyen. ²⁸ Niḡgeḡ al beḡeḡbe al huwak yeḡ deney hanḡen. Goyenpoga bitiḡ banabe usiya mata buluḡ teḡ teḡ dufayya beḡeḡ po maḡiḡ hitiḡ haḡ.

²⁹ “Be, deḡ Moseyen saba marya Farisi maryabe usi mar wor po. Deḡbe Al Kurunḡen bearar bana haḡ goke bunineḡ wor po nurd duneḡ hime.

Denje Al Kurunyen mere basan mar asetin yago belen gasa yirke kamamin gote bamba gergen yirde haran hen hanjen. Irde Al Kurun dilinde al huwak hinhan mar gote bamba umna yirde hanjen. ³⁰ Irdeb, 'Nen gayen asininin yago hinhan nalu goyenter hinhet manhan asininin yago belen Al Kurunyen mere basan mar gasa yirke kamde hinhan matamin goyen yilwa yirte-won,' yen hanjen. ³¹ Gwaha yen hanjen gobe den gayenbe Al Kurunyen mere basan mar gasa yiramin mar gote fonenmin goyen dindiken sikkenin forok yirde han geb. ³² Ningeb asetin yago mata bulun go min uramin goyen den belen tukunbe sol irnain.

³³ "Denje kunere duwi wor po! Al Kurunyen beararbe daha mat busahartek yen nurde han? Kak alare po ga kunain geb. ³⁴ Ningeb Al Kurunyen mere basan marya al dufay wukke minyanja saba marya yad yermeke den hitte wanain. Goyenbe go mar goyen kurabe gasa yirke kamnain, kurabe kuruse hende gasa yirke kamnain. Munan kurabe gabu yatinyan yukun yusulak ten, kurabe gasa yirnin yen taun kurar mat kurar gama yirde yukun hinain. ³⁵ Ningeb al huwak kurun megen gar hike gasa yirke kamnain gote kanduk goyenbe den gayenter nin manan tenain. Gobe Abel mayke kamiinde mat wan wan Berekia urmin Sekaraia goyen Al Kurunyen ya balem bana gasun himanya altaya kahalte asetin yago belen mayke kamiin gote kanduk. ³⁶ Ningeb fudinde wor po dinen hime. Kanduk kurun dinen hime gabe tumnan den

gayenter niŋ mar gare tenayiŋ,” yinyiŋ.

Yerusalem niŋ mar goke bunineŋ nuryiŋ
(Luk 13:34-35)

³⁷ Irdeb sopte po, “Awo, Yerusalem niŋ mar, bunineŋ wor po nurd duneŋ hime. Al Kurun beŋ den ge nurde mere basan marmiŋ yad yerke waŋ hanŋen. Goyenbe den beŋbe kurab hora po gasa yirde, kurabe mali gasa yirde hike kamde hanŋen. Tatirok miliŋ beŋ dirneŋ yawaŋ tapen beŋ po aw yurde hiyen go gwa-hade goyen po, ne beŋ den goyen dade doyan dirde himewoŋ yeŋ hugineŋ dufay heŋ himyen. Goyenbe dindikeŋ po merene pel irde yilwa nirde hanŋen. ³⁸ Niŋgeb ga nurnaŋ. Al Kurun beŋ tauntiŋ tubul tiyyen. Irkeb naŋa hoyande niŋ mar beŋ waŋ tauntiŋ goyen gwamuŋ urkeb det kura bana goŋ ma hinayiŋ. ³⁹ Nebe dubul ten kumekeb epte ma nennayiŋ. Irde kuŋ kuŋ kame sopte wayen. Irkeb ne nenenbe dindikeŋ mo-hoŋtinde wor wor, ‘Doyan Al Kurunŋen denemde waya al gabe Doyan Al Kurun beŋ guram irde igin wor po iryen,’ yeŋ turuŋ nirnayiŋ,” yinyiŋ.

24

Al Kurunŋen ya balem buluŋ heŋ heŋ niŋ yirin
(Mak 13:1-13; Luk 21:5-19)

¹ Be, Yesu gob Al Kurunŋen ya balem goyen tubul ten hoyande kuŋ hikeyab komatmiŋ yago beŋ waŋbe, “Ya balem ga kena,” inamiŋ. ² Irkeb Yesu beŋ, “Ya kenhan kurun gayenbe fudinde wor po dineŋ hime. Hora ya irtiŋ yenen han gabe un-kuren muŋ kura epte ma gasuŋende hiyen.

Tumṅaṅ pir irnayaṅ,” yinyaṅ. ³ Yesu go gwaha yinenḅe kuṅ Olip donḅonḅe kipiryaṅ. Irkeb yeṅ yuṅkureṅ po heṅyabe komatmiṅ yago beṅ, “Da mata forok yeke yeneṅ gabe nalu funaṅ go waṅ waṅ nalube forok yewenṅ tiya yeṅ bebak titek?” inamiṅ. ⁴⁻⁵ Irkeb wol heṅḅe, “Nalu funaṅ binde hekeb al budam waṅ, ‘Mesaiabe ne gago,’ yineṅ al budam wor po usi yirnayaṅ. Niṅḅeḅ keṅkela heṅ hinaṅ ko. Moṅgo al kura beṅ usi dirnayaṅ geb. ⁶ Kurabe fulenḅa karkuwaṅ forok yeke nurde hinayaṅ. Irde fulenḅa forok yenayaṅ mere momoṅ wor nurde hinayaṅ. Goyenḅe goke kafura heṅ hurkuṅkat ma tinayaṅ. Mata gwahade gobe forok yeṅ hinayaṅ gega, nalu funaṅḅe kame ga wayyen. ⁷ Goyenterbe al miṅ kura beṅ huwarde al miṅ hoyanya fulenḅa teṅ hinayaṅ. Gabman kura beṅ gabman hoyanya fulenḅa gird teṅ hinayaṅ. Albe biṅge niṅ kamde hinayaṅ. Niniṅa karkuwaṅ naṅa kurar kurar forok yeṅ hinayaṅ. ⁸ Kanduk kurunḅ gob bere kura diriṅ kawaṅ kere yeṅ meheṅde wor po uliṅ misiṅ katyeṅ go gwahade goyen po, nalu funaṅ binde heṅ hikeḅ mata goyen forok yenayaṅ.

⁹ “Goyenterbe al beṅ merem yaṅ dirde bulunḅ bulunḅ dirde mudunke kamnayaṅ. Irde al miṅ kurayen kurayen kurunḅ gore ne niṅ igiṅ ma nurde deṅ haram dirde hinayaṅ. ¹⁰ Goyarebe al budam ne niṅ dufaymiṅ saṅiṅ irde hinayaṅ goyen yubul tinayaṅ. Irdeb kadom haram gird teṅ asogom haniṅde yerde hinayaṅ. ¹¹ Irde al budam beṅ, ‘Neṅḅe Al Kurunḅen mere basanḅ mar,’ usi teṅḅe waṅ al budam usi yirde hinayaṅ.

¹² Mata bulun beley po nana tiyyen. Irkeb al kadam nin amanen nurd nurd mata gobe hubu hiyyen. ¹³ Goyenbe al kura sanen hen kanduk go fole irde kun kun funandenbe Al Kurun beley al go tiyyen. ¹⁴ Mere igin Al Kurun beley doyan dird dird goyen go wa megen kurun ga tagalde tukuke al nurde hinayin. Irke gab nalu funan go forok yiyyen,” yinyin.

*Kanduk kurun wor po forok yiyyen
(Mak 13:14-27; Luk 21:20-28)*

¹⁵ Irdeb sopte yinyin. “Al Kurunyen mere basan al Daniel beley asande, ‘Det kura Al Kurunyen ya balem bulun wor po irtek goyen ya bana gon forok yiyyen,’ yitin goyen forok yiyyen. (Mere kayhem gayen kapyan hen han marbe kenkela dufay hen gab bebak tinan.) ¹⁶ Be, mata goyen forok yekeb Yudia nanare hinayin marbe busaharde dugure kun bana kunayin. ¹⁷ Goyenterbe al kura ya hende hiyen goyen katen yamin bana hurkun detne kura yade ga busahare ma yiyyen. ¹⁸ Al kura metenmin tubul ten kun amilne ten ga ma yiyyen. ¹⁹ Goyen nalurebe bere bin yanya bere dirin besare nin minyanyabe metenen wor po yiryen. ²⁰ Ningeb kanduk kurun goyen nana nalu bulunde, ma Sabat nalure forok ma yewon yen goke Al Kurun gusunan irde hinayin. ²¹ Goyen nalureb megen ga kanduk kurun wor po tiyyen. Han kapyal Al Kurun beley tikula kiryinde mat wan ga hitere, irde kame wor kanduk gwahade kura ma kentek. Go kanduk goyenbe baran wor po duryen. ²² Ningeb Al Kurun beley nalu goyen sobamde po tubul tike manhan al tumnan

kamwoŋ. Goyenbe al nigen yirin goke tenbe nalu go wer irde dolfon iryen. ²³ Goyen nalure al kura belen, ‘Mesaiabe gago hi,’ dinnayin, irde hoyan belen, ‘Moŋ, iror hi,’ dinen inŋogaha dirke goya go ma nurde gama yirnayin. ²⁴ Mesaia falkukya Al Kurunyen mere basan mar falkukya belen alya bereya Al Kurun belen basina yirtin goyen usi yirteke katwoŋ yen mata tinen karkuwan kurayen kurayen forok yirde hinayin. ²⁵ Mere gabe nalu go ma forok yen hikeya gago momon dirde hime geb, kenkela heŋ hinaŋ ko.

²⁶ “Niŋgeb Al kura belen, ‘Mesaiabe sawsawa po kurun nanare hi,’ dinke ga kuŋ kinniŋ kinniŋ ma tinayin. Irdeb, ‘Mesaiabe gan banare hi,’ dinke goya fudinde yen ma nurnayin. ²⁷ Dagamel tikeb al nana wan wanya nana kurkurya belen tumnande kenen hanŋen gwahade po, ne Al Urmin gayen wamekeb wawun unkuŋende po megen niŋ mar kurun gayen tumnande nennayin. ²⁸ Det kamtin hinayindebe det bidak nen nen nu belen wan hanŋen gobe bebakken wor po geb, goke epte ma kadam mohaŋde titek gwahade goyen po, ne Al Urmin gayen wamekeb tumnan nenen nalu funanbe gago yen bebak tinayin.

²⁹ “Kanduk kurun goyen kamere po, ‘Nana kidoma hiyyen, irde gagasi ma timiyyen. Nanŋinde mat dinambe suk yen katnayin. Irdeb det kurun hende han gobe hambor yiryen,’ yitin *Aisaia 13:10; 34:4* gwahade po forok yenayin.

³⁰ “Goyenterbe ne Al Urmin wayen timekeb mata kura nanŋinde forok yiyyen. Irkeb ne Al

Urminɗ gabe tareɗne turɗuɗ yaɗ goya kigarinɗin faykek hende kateɗ. Irkeb megen nin mar ne nin ma nurde haɗ mar tumɗaɗ neneɗbe biɗ misin nurde esinayinɗ. ³¹ Miyoɗne yad yermeke belen meheɗ heɗ ne waɗ waɗ nin bigul fu irkeb al tumɗaɗ nurnayinɗ. Irde kateɗbe alya bereya naɗa kurunɗ hike kwa bana goɗ nin basaɗa yirtinɗ goyen gabu yirnayinɗ.

³² “Fik hebe yenen hanɗen gogo. Fik he go beda urke yeneɗbe kadila hewenɗ tiya yeɗ hanɗen. ³³ Gwahade goyen po, mere dirhem kurunɗ gayen forok yeke yeneɗbe nalu funaɗbe binde gag po wer ira yeɗ nurnayinɗ. ³⁴ Fudinde wor po dinenɗ hime. Mata gobe forok yenayinɗ geb. Irde mata go forok yenayinɗ nature al hinayinɗ mar gobe mata goyen yennayinɗ. ³⁵ Irdeb megenɗa naɗkinɗyabe hubu hiriryenɗ. Goyenbe merenebe saninɗ minɗanɗ geb, hubu ma hiyyenɗ. Huginɗen alya bereya nurde fudinde wor po yeɗ gama irde hinayinɗ,” yinyinɗ.

Nalu funaɗbe bebakkenɗ mon

(Mak 13:32-37; Luk 17:26-30,34-36)

³⁶ Irdeb sopte yinyinɗ. “Nalu funaɗ goyen al kura bebakkenɗ ma nurde hi. Hubu wor po. Adone po ga nurde hi. Urminɗa miyoɗminɗa wor ma po nurde haɗ. ³⁷ Ne Al Urminɗ gayen waɗ waɗ naturebe alya bereya bikkenɗ Noa hinhin nature mata teɗ hinhan gwahade teɗ hinayinɗ. ³⁸ Go mar gobe dula nin po teɗ, kukuwa fe nene, al belen bere yade, dirɗen weɗ yade al yertek nin po teɗ Al Kurunɗ nin ma nurde hinhan. Irde kuɗ kuɗ nalu forok yekeb Noa hakwa binde hurkurinɗ. ³⁹ Mel gobe kame mata gwahade forok yiyyenɗ

yeŋ ma nurde hinhan. Irkeb fe ala kurun forok yeŋ gwamuŋ yuryiŋ. Niŋgeb ne Al Urmiŋ gayen wor al beŋ gwaha naŋa wayyeŋ yeŋ ma nurde hikeya wayeŋ. ⁴⁰ Goyen nalurebe mata gahade forok yiyyeŋ: al iraw kura metenminde meten teŋ hiriryen. Irke Al Kurun beŋ unkuŋen teŋbe kurabe tubul tiyyeŋ. ⁴¹ Irde bere irawa palawa irye yeŋ wit bilmiŋ hora po karka teŋ hikeya bere unkuŋenbe Al Kurun beŋ teŋbe kurab tubul tiyyeŋ. ⁴² Goke teŋbe keŋkela heŋ ga hinaŋ ko! Doyaŋ Al Kurunŋiŋ waŋ waŋ nalube bebakken moŋ geb. ⁴³ Be, ga nurde ga hinaŋ ko. Ya miŋ al kura wawuŋ kurare kawe al beŋ waŋ yane upew uryeŋ yeŋ nurde hiyeŋdebe yamiŋ keŋkela doyaŋ irde hike kawe al beŋ epte ma waŋ yamiŋ upew uryeŋ. ⁴⁴ Niŋgeb gwahade goyen po, ne Al Urmiŋ gare wor nalu goyare wayeŋ tiya yeŋ ma nurde hikeya wayeŋ geb, hugiŋeŋ ne niŋ pet teŋ doyaŋ nirde hinayiŋ,” yinyiŋ.

*Meten al igiŋya bulunyat maya mere
(Luk 12:42-46)*

⁴⁵ Irdeb maya mere mat gaha yinyiŋ: “Be, ganuŋ meten albe dufaymiŋ wukkeŋ, irde gore doyaŋ almiŋ ge fudinde wor po meten teŋ unen hiyeŋ? Meten al gwahade gobe doyaŋ almiŋ beŋ naŋa gisaw kwe yeŋbe meten almiŋ goyen, ‘Meten mar kadge doyaŋ yirde biŋge yuntek nalu hekeb yuneŋ hayiŋ,’ inen kuyeŋ. ⁴⁶ Be, doyaŋ almiŋ go mulgaŋ heŋ waŋbe meten al gore meremiŋ po gama irde meten teŋ hike keneŋbe igiŋ igiŋ irkeb meten al gobe amaŋ wor po hiyyeŋ. ⁴⁷ Fudinde wor po diniŋ hime. Meten al

gobe doyaŋ almiŋ beleŋ, ‘Samuŋne kuruŋ gayen wor doyaŋ irde hayiŋ,’ inyeŋ. ⁴⁸ Goyenbe daha wet kura teŋ metenŋ al goreb, ‘Doyaŋ alnebe naŋa gisaw po kuŋ niŋgeb, araneŋ ma waŋ hi,’ yeŋbe ⁴⁹ metenŋ mar kadom alya bereya goyen, ‘Merene ma nurde haŋ,’ yineŋ gasa yirde dulaŋ po teŋ wain nene kukuwa heŋ hanŋyen marya wain nene hinayiŋ. ⁵⁰ Irkeb doyaŋ almiŋ go nalu goyenter wayyeŋ yeŋ ma nurde hiyeŋde gor mulgaŋ hiyyeŋ. ⁵¹ Irdeb mata buluŋmiŋ gote muruŋgem kuruŋ wor po unyeŋ. Irdeb metenŋ al go tukuŋ kak ala bana eseŋ misiŋ yiseŋ hanŋyende gor tukukeb usi marya gor hinayiŋm,” yinyiŋ.

25

Bere 10 gote maya mere

¹ Be, Yesu go sopte maya mere mat saba gahade yiryiŋ: “Nalu funaŋ goyenterbe Al Kuruŋ beleŋ alya bereyamiŋ doyaŋ yird yird goyen kurabe gahade: metenŋ bere foŋeŋ 10 beleŋ, ‘Doyaŋ alniniŋde urmiŋ beleŋ berem teŋ wayyeŋ tiya go,’ yeŋ, ‘Kuŋ belen tupi teŋ waniŋ,’ yeŋ hulsimiŋ yusuŋ yurde kwamiŋ. ² Bere siptesoŋoŋbe dufaymiŋ wukkeŋ moŋ. Munaŋ kurabe dufaymiŋ wukkeŋ. ³ Bere siptesoŋoŋ dufaymiŋ wukkeŋ moŋ gobe hulsimiŋbe yawaramiŋ gega, femiŋ pet yeke sopte yuneŋ yuneŋbe kura ma yadeya kwamiŋ. ⁴ Munaŋ bere siptesoŋoŋ dufaymiŋ wukkeŋ gobe hulsimiŋ yade femiŋ kame yuntek manaŋ yaliŋ bana goya yade kwamiŋ.

⁵ “Be, bere teŋ mulgaŋ heŋ watek al gobe aranŋ ma wakeb bere 10 gobe dukpu yirke tumŋaŋ

feramiñ. ⁶ Irke kuñ wawuñ binde heke gab al kura gore kuware, ‘Bere tihi albe wañ hi! Niñgeb wañ tupi tinañ!’ yiriñ. ⁷ Be, bere 10 gore go nurdeb huwarde hulsimiñ ommok hinhan goyen sope yirke melak sañiñ hamiñ. ⁸ Goyenbe bere dufaymiñ igiñ moñ goreb bere dufaymiñ wukken goyen, ‘Hulsininiñ kamniñ tahañ geb, femiñ kura dunnañ,’ yinamiñ. ⁹ Irkeb, ‘Moñ geb, fe gabe denya nenya tumñañde epte ma diryen geb, dindiken kuñ al hitte damu tinayiñ,’ yinamiñ. ¹⁰ Irkeb bere siptesoñoñ dufaymiñ wukkek moñ goyen fe damu niñ kukeb goyarebe bere tirin al go wayyiñ. Irkeb bere siptesoñoñ gitik ten hinhan goyen al go wakeb tupi ten yare dula mata kurun tiniñ tiyamiñde gor kwamiñ. Irkeb yamebe tayamiñ.

¹¹ “Be, goyen kamereb bere siptesoñoñ hulsire niñ fe damu tiniñ yen kwamiñ go mulgañ heñbe, ‘Doyañ al, Doyañ al, yame hol irde dunke hurkuniñ,’ inamiñ. ¹² Goyenbe al bere tirin gore wol heñbe, ‘Fudinde wor po dinen hime. Deñbe ma nurde dunen hime,’ yinyiñ. ¹³ Be, maya mere dirhem gwahade goyen po ne Al Urmiñ wañ wañ nalu funañbe ma nurde hañ geb, gitik ten hinayiñ,” yinyiñ.

Al karwoyen siraw mere
(Luk 19:11-27)

¹⁴ Irde sopte maya mere mat yinyiñ. “Be, Al Kurun belen alya bereya doyañ yird yird goyen kurabe gahade: al kura naña gisaw kwe yenbe detne doyañ yirde hinayiñ yen meten marmin hayhay yiryiñ. ¹⁵ Irdeb meten al unkurenbe

hora siptesoŋoŋ unyiŋ. Kurabe hora irawa, irde kurabe un̄kuren̄ unyiŋ. Meten̄ mar gobe al gwahade mat igiŋ meten̄ tinayiŋ yeŋ nurdeya gab hora goyen yunyiŋ. Irdeb yubul teŋ kuriŋ. ¹⁶ Meten̄ al hora siptesoŋoŋ tirin̄ al gobe goyare po tukuŋ meten̄ unen̄be go hende hora siptesoŋoŋ iryiŋ. ¹⁷ Meten̄ al hora irawa tirin̄ al goyen wor gwahade po, tukuŋ meten̄ unen̄be go hende hora irawa iryiŋ. ¹⁸ Goyenbe meten̄ al hora un̄kuren̄ tirin̄ al gobe kuŋ mete taldebe doyaŋ almiŋde hora goyen goŋ bana kiryiŋ.

¹⁹ “Be, doyaŋ al go naŋa gisaw kuŋ goŋ sobamde po heŋ heŋ gab wayyiŋ. Irdeb waŋ meten̄ marmin̄ hora yunyiŋ goyen daha yiramin̄ yeŋ gusuŋaŋ yiryiŋ. ²⁰ Irkeb meten̄ al hora siptesoŋoŋ unyiŋ gobe sopte hora siptesoŋoŋ yawaŋbe doyaŋ almiŋ gaha inyiŋ: ‘Hora siptesoŋoŋ goyen doyaŋ irayiŋ yeŋ nunen̄ kwariŋ geb, gore sopte 5 irmin̄ gago,’ inyiŋ. ²¹ Irkeb doyaŋ almiŋ belen̄ wol heŋbe, ‘Gebe meten̄ igiŋ wor po tiyaŋ. Gebe meten̄ al igiŋ, merene nuraŋ. Det ug ma gunmirin̄ gega, keŋkela doyaŋ yiraŋ niŋgeb, det budam wor gunmeke doyaŋ yirayiŋ. Irdeb wake tumŋaŋ neya dula teŋ amaŋ heŋ hireŋ,’ inyiŋ.

²² “Be, al hora irawa unyiŋ al gore wor waŋbe gaha inyiŋ: ‘Hora irawa doyaŋ irayiŋ yeŋ nunen̄ kwariŋ gobe gore po meten̄ unen̄be hora irawa tebaŋ irmin̄ gago,’ inyiŋ. ²³ Irkeb doyaŋ almiŋ belen̄ wol heŋbe, ‘Gebe meten̄ al igiŋ, merene po nuraŋ. Det ug ma gunmirin̄ gega, keŋkela doyaŋ yiraŋ. Niŋgeb det budam gunmeke doyaŋ yirayiŋ. Irdeb wake neya dula teŋ amaŋ heŋ

hireŋ, ’ inyiŋ.

²⁴ “Be, metenŋ al hora unŋkurenŋ unyiŋ gore waŋbe gaha inyiŋ: ‘Doyaŋ al, gebe al misineŋ yaŋ wor po nurde gunenŋ himyen. Biŋge ge ma hartinŋ goyen yawarde hayen. Irde ge ma tur irtinŋ wor kuŋ wasenŋ hanŋyen. ²⁵ Goke tenŋbe kafura henŋ horagebe tukunŋ mete talde goŋ bana kirmirinŋ. Niŋgeb hora gebe gago, ’ inyiŋ. ²⁶ Gwaha inkeb doyaŋ almiŋ beŋen wol henŋbe, ‘Gebe kumhaka al, metenŋ al bulunŋ wor po. Gebe detne beŋen ma hartinŋ goyen yawarde himyen, irde detne beŋen ma tur irtinŋ goyen wasenŋ himyen yeŋ nurde ha? ²⁷ Gebe ne gwahade yeŋ nurdeb horanebe hora yerde hanŋyen yare kerarinŋ manhan horane tolok hitinŋde ga temewoŋ, ’ inenŋbe metenŋ mar buda hoyanŋ hoy yirke wakeb, ²⁸ ‘Hora go goranŋ irde tenŋ metenŋ al hora 10 miŋyaŋ al go unnaŋ. ²⁹ Al det unke keŋkela doyaŋ irde igineŋ kurunŋ forok iryenŋ al gobe tebaŋ det yawaryenŋ. Irkeb detmiŋ budam wor po henayiŋ. Munanŋ det unke kumhaka henŋ igineŋ ma forok yiryenŋ al gobe yende det muŋ kura hiyenŋ goyen wor goranŋ irke det miŋmoŋ wor po hiyenŋ. ³⁰ Niŋgeb metenŋ al bulunŋ gobe tukunŋ siŋare kidoma bana esenŋ misiŋ yiŋenŋ hanŋyende gor temeynaŋ, ’ yinyinŋ geb, ” gwaha yirinŋ.

Doyaŋ Al Kurunŋ beŋen alya bereya matamde pota yiryenŋ

³¹ Be, Yesu go sopte gaha yirinŋ: “Ne Al Urmiŋ gabe tareŋne turunŋ yaŋ henŋbe miyoŋneya tumŋanŋ kattedek. Goyenterbe Doyaŋ Al Kurunŋyen maroro gasunŋde keperenŋ. ³² Irkeb al megen niŋ kurunŋ gayen ne hitte po gabu irnayiŋ. Irkeb

sipsipya memeya yewek belen pota yirde hiyen go gwahade yiren. ³³ Ne belenjebe sipsip yadeb hanne yase belen mat yerdeb memebe yade tapa belen yeren. ³⁴⁻³⁶ Irkeb ne Doyan Al Kurun gare al hanne yase belen mat hinayin goyen gaha yinen: ‘Ne binje nirkeyabe binje nunamin. Fe nin kammekeyab fe nunamin. Albak hen kun himekeb gargar niramini. Ulinhornem mon himekeb ulinhor nunamin. Garbam hemekeyab doyan nirde faran nurde hinhan. Koyare himekeb wan nenen hinhan. Goke tenbe Nanne belen guram dira. Nengeb Al Kurun belen alya bereyamin doyan yird yird bana gon hurkun hurkun gobe tikula kiriyina den gake gitik irtin hiyen geb wan tenan,’ yinen. ³⁷ Gwaha yinkeb Al Kurun dilinde al huwak goreb, ‘Daha nana binje kamke genen binje guntirin? Irde daha nanabe fe nin kamke genen fe guntirin?’ ³⁸ Daha nana albak hen kun hike gargar girtirin? Irde daha nana ulinborgem mon hike genenbe ulinhor guntirin? ³⁹ Daha nana garbam heke doyan girde faran gurtirin? Irde daha nana koyare hike kun gintirin?’ ninnayin. ⁴⁰ Irkeb ne Doyan Al Kurun gare wol henbe gaha yinen: ‘Fudinde wor po dinen hime. Nere al denem mon gayen kura gwaha iramin kenenbe ne gayen niramini,’ gwaha yinen. ⁴¹⁻⁴³ Irdeb tapa belen mat hinayin mar gobe gaha yinen: ‘Denbe binje nirkeb binje kura ma nunamin. Irde fe nin kammeke fe kura ma nunamin. Albak hen kun himeke gargar ma niramini. Ulinhornem mon himekeb kura ma nunamin. Garbam himekeb faran ma nuramin. Irde koyare himekeya wor

wan̄ ma nenen̄ hinhan. Goke ten̄be den̄be Al Kurun̄yen bearar bana han̄. Niŋgeb nubul ten̄ kuŋ kak ala Satanya miyon̄min̄ya niŋ gitik irtin̄ bana goŋ kunan̄,’ yinen̄. ⁴⁴ Gwaha yinmekeb al buda gore wol hen̄be, ‘Doyan̄ Al Kurun̄, daha naŋa biŋgeya feya niŋ kamke genen̄ wasak titirin̄? Irde daha naŋa ulin̄horgem moŋ hike kura ma guntirin̄? Irde daha naŋa garbam heke doyan̄ ma girdeb faran̄ ma gurtirin̄? Irde daha naŋa albak genen̄ gargar ma girtirin̄? Irde daha naŋa koyare hike go ma kuŋ gintirin̄?’ ninayin̄. ⁴⁵ Irkeb ne Doyan̄ Al Kurun̄ gare wol hen̄be gaha yinen̄: ‘Fudinde wor po dinen̄ hime. Nere al den̄em moŋ gayen kura gwaha ma iramin̄ kenen̄be ne gayen faran̄ ma nuramin̄,’ gwaha yinen̄. ⁴⁶ Mel gobe mata bulun̄min̄ gote murun̄gem hugin̄en̄ kanduk kurun̄ ten̄ hinayin̄. Munan̄ Al Kurun̄ dilin̄de al huwak gobe Al Kurun̄ya hugin̄en̄ hinayin̄,” yinyin̄.

26

*Yesu maynin̄ yen̄ mere sege iramin̄
(Mak 14:1-2; Luk 22:1-2; Yon 11:45-53)*

¹ Be, Yesu gob sabamin̄ kurun̄ goyen pasi irdeb tigiri ten̄ komatmin̄ yago gaha yinyin̄. ² “Pasoba dula nalu kurun̄ gobe molye go yen̄ nurde han̄ gogo. Go nalurebe ne Al Urmin̄ gayen kuruse

hende mununen mununen niŋ asogo haniŋde nernayiŋ,”* yiriŋ.

³ Be, goyenterbe pris buda gote karkuwaŋmiŋya Yuda marte doyaŋ mar parguwak yagoya beleŋ pris buda gote kurunŋmiŋ Kaiafasyen yare gabu iramiŋ. ⁴ Irdeb daha mat kura Yesu go usi irde teŋ mayteke kamyen yeŋ mere sege iramiŋ. ⁵ Goyenbe yiŋgeŋ mere maydeb, “Dula nalu kurunŋ gayenter ma gwaha titek. Moŋgo goke igiŋ ma nurde al beleŋ fulenŋa dirnayiŋ geb,” yamiŋ.

Bere kura beleŋ det fimiŋ hamiŋeŋ igiŋ wor po goyen Yesu tonanŋde wok iryiŋ

(Mak 14:3-9; Yon 12:1-8)

⁶ Be, Yesu go komatmiŋ yagoya Betani taunde Saimonyen yare hinhan. Saimonbe bikkeŋ busuka mananŋ hinhin. ⁷ Be, Yesu go keperde hikeyab bere kura gore det fimiŋ hamiŋeŋ igiŋ wor po alabasta hora beleŋ po irtiŋ yaliŋ kusamuŋ goyen bana hitiŋ go tawaŋ tonanŋde wok iryiŋ. ⁸ Det fimiŋ damum hende wor po goyen bere gore Yesu tonanŋde wok irke keneŋbe komatmiŋ yago beleŋbe biŋ ar hende daniŋ bulunŋ ira yeŋ gusuŋanŋ hamiŋ. ⁹ “Go tukuŋ al yunke

* **26:2:** Bikkeŋ Israel mar Isip naŋa tubul teŋ Kenan kuniŋ tiyamiŋyabe Al Kurun beleŋ sipsip al diriŋ dirneŋ gasa yirde darim yade yame kantayanŋ sam yirnayiŋ yinyiŋ. Munanŋ al kura gwaha ma tiyamiŋ marbe Al Kurunŋyen miyon beleŋ waŋbe mel gote urmiŋ mataliŋya dapnamiŋ mataliŋya goyen tumŋanŋ gasa yirke kamamiŋ. Gega meremiŋ gama iramiŋ marbe miyonŋmiŋ beleŋ yubul tiyamiŋ goke dufay heŋ heŋ ge dula mata teŋ hinhan.

manhan hora kurunđe po damu tike hora go ten al buninjen faran jurwon,” inamin.

¹⁰ Be, Yesu go mere ten hinhan goyen nurdeb, “Denbe danin bere go tagal unen bulun irhan? Yenbe mata igin wor po nira. ¹¹ Al buninjenbe denya huginjen hinayin. Goyenbe nebe denya huginjen ma hitek. ¹² Bere gare det fimin ulner wok ira gabe ne kammeke mete nirnayin goke gitik nira. ¹³ Ningeb fudinde wor po dinen hime. Kame al belen ne nin nanja kurun ga tagalde tukun henyaabe bere gare mata tiya gake wor tagalde hinayin, irde matamin goke dufay hen hinayin,” yinyin.

*Yudas Iskariot belen Yesu asogo haniinde kiryin
(Mak 14:10-11; Luk 22:3-6)*

¹⁴ Be, Yesu komatmin 12 bana goyen al denjem Yudas Iskariot inen hanyen gore pris buda gote karkuwanmin hitte kurin. ¹⁵ Kunbe, “Yesu haniinde kermekeb murungembe dahade nunnayin?” yinyin. Irkeb silwa hora kapyan heke kun 30 hekeb unamin. ¹⁶ Go kamereb Yudas go Yesu goyen daha mat kura asogom haniinde keren yen belen nin nankenen hinhin.

*Dula funan
(Mak 14:12-21; Luk 22:7-13,21-23; Yon 13:21-30)*

¹⁷ Be, Yesuyen komatmin go hanƙa wawunbe beret yis minmon nen nen nalu hewen tiya yenbe Yesu gusunan iramin. “Damde kunbe Pasoba binje gitik irde netek yen nurde ha?” inamin. ¹⁸ Irkeb Yesu belen wol henbe, “Yerusalem taun bana kunbe al kura gor kenenbe gaha inayin.

‘Tisa belenbe, “Nalunebe binde hihi. Niŋgeb neya komatneyabe gere yare Pasoba biŋge netek,” yihi,’ gwaha innayiŋ,” yinyiŋ. ¹⁹ Irkeb komatmiŋ yago goyen Yesu yinyiŋ go po gama irde kuŋbe Pasoba biŋge nen nen gitik tiyamiŋ.

²⁰ Be, wawuŋbana wor po hekeb Yesuya komatmiŋ 12 goya Pasoba biŋge niniŋ yeŋ keperamiŋ. ²¹ Biŋge nene heŋyabe Yesu belenbe, “Fudinde wor po dinen hime. Deŋ gayen kuratiŋ kura belen asogoner haniŋde niryeŋ,” yinyiŋ. ²² Irkeb komatmiŋ yago gobe kandukŋen wor po nuramiŋ. Irdeb kura kame yuŋkuren yuŋkuren, “Doyaŋ Al Kurun, ne niŋ wet yeŋ ha?” yeŋ gusaŋaŋ iramiŋ. ²³ Irkeb wol heŋbe, “Al kura neya tumŋaŋ haniŋ teŋ fe koron bana kera gore asogo haniŋde niryeŋ. ²⁴ Ne Al Urmiŋ gabe Al Kurunyen mere basaŋ mar belen bikken asaŋde kayamiŋ goyen po gama irde kameŋ. Goyenbe al kura asogoner haniŋde niryeŋ al goke buninŋen wor po nurde unen hime. Al go kawaŋ ma hiriŋ manhan kanduk buluŋ goyen go ma kenwon,” yinyiŋ. ²⁵ Irkeb Yesu asogomiŋ haniŋde kertek al Yudas belen, “Tisa, ne niŋ daw yeŋ ha?” inyiŋ. Irkeb wol heŋbe, “Gwaha, gobe ge po geb,” inyiŋ.

*Yesu belen beretya wainya komatmiŋ yunyiŋ
(Mak 14:22-26; Luk 22:14-20; 1 Korin 11:23-25)*

²⁶ Be, biŋge nene heŋyabe Yesu belen beret teŋbe Naniŋ turuŋ irdeb ubala teŋbe, “Beret dunhem gahade gayen po nebe deŋ ge teŋ kameŋ. Niŋgeb goke teŋbe beret gabe gasoŋne geb, teŋ nenaŋ,” yinyiŋ. ²⁷ Irdeb wain fimiŋ gisu bana hitiŋ go teŋbe sopte Al Kurun turuŋ irde, “Deŋ

tumɲaŋ ga teŋ nenaŋ. ²⁸ Al megen haŋ kurun gote mata buluŋ halde yuneŋ yuneŋ niŋ teŋ Al Kurun belen biŋa tiyyiŋ goke teŋ darine wok irde kameŋ. Niŋgeb wain ga teŋ nenaŋ. ²⁹ Fudinde dineŋ hime. Wain fimiŋ gayen tebaŋ ma neweŋ. Kuŋ kuŋ Nanne belen alya bereyamiŋ doyaŋ yiryenya goyenter gab denya tumɲaŋ wain fimiŋ gergeŋ sopte netek,” yinyiŋ.

³⁰ Be, go kamereb Yesuya komatmiŋ yagoya goyen tikiŋ heŋbe Olip donɔnde hurkamiŋ.

Pita helwan hiyyeŋ goke tagalyiŋ

(Mak 14:27-31; Luk 22:31-34; Yon 13:36-38)

³¹ Be, hurkuŋ gor heŋbe Yesu belen gaha yinyiŋ: “Haŋka wawuŋbe ne mununniŋ yeŋ fere nirkeb deŋbe tumɲaŋ nubul teŋ busaharnayiŋ. Mata goke Al Kurunyen asaŋde gahade katiŋ hi: ‘Sipsip doyaŋ al maymeke sipsipmiŋbe burgagaw kernayiŋ,’ yitiŋ. *Sekaraia 13:7*

³² Goyenbe kame sopte huwardebe ne wa meheŋ heŋ Galili naŋare kweŋ,” yinyiŋ. ³³ Irkeb Pita belenbe, “Al hoyanbe tumɲaŋ gubul tinayiŋ. Goyenbe nebe epte ma wor po gubul tiyeŋ,” inyiŋ. ³⁴ Irkeb Yesu belen wol heŋbe, “Fudinde wor po gineŋ hime. Haŋka wawuŋbe tatirok ma mere tikeyabe ge belen wawuŋ karwore ne niŋ yeŋ, ‘Al gobe go ma nurde unen hime,’ yawayiŋ geb,” inyiŋ. ³⁵ Goyenpoga Pita belenbe, “Nebe al belen mununnayiŋ gega, ge niŋ yeŋ, ‘Yeŋ ma nurd unhem,’ ma wor po yeweŋ,” inyiŋ. Irkeb kadom yago manan tumɲaŋ gwaha ala inamiŋ.

Yesu Getsemani heŋ Al Kurun mere iryiŋ

(Mak 14:32-42; Luk 22:39-46)

³⁶ Be, gor mat kuṅ naṅa deṅe Getsemani gor forok yeṅbe komatmiṅ yago, “Gar keperde doyaṅ nirde hike neb irar ira kuṅ Al Kuruṅ mere ireṅ,” yinyiṅ. ³⁷ Irdeb Pitaya Sebedi urmiṅ waraṅ Yonya Yemsa yadeb gasuṅ hoyande kwamiṅ. Goyareb Yesube dufaymiṅya biṅyabe kanduk wor po hiriṅ. ³⁸ Irdeb mel karwo go yinyiṅ. “Kanduk kuruṅ wor po mununke kamtek nurhem geb, neya gar heṅbe Al Kuruṅ mere irdeya ga hinayiṅ!” yinyiṅ. ³⁹ Gwaha yineṅbe gor mat muṅ kura siṅgir teṅ kuṅbe biṅ tadam mat wulgurut yeṅbe, “Ado, igiṅ kenem kanduk kuruṅ gayen teṅ siṅa irayiṅ. Goyenbe nere dufay ma gama irayiṅ. Gere dufay po gama irayiṅ,” inyiṅ. ⁴⁰ Gwaha teṅbe mulgaṅ heṅ kuṅbe komatmiṅ karwo gob firtiṅ yinyiṅ. Irdeb Pita isaṅ heṅbe, “Mel, deṅbe neya muṅ kura hitṅeṅ teṅ Al Kuruṅ mere irde ga ma fernayiṅ?” yinyiṅ. ⁴¹ Irdeb, “Ferde ma Al Kuruṅ mere irde hinayiṅ. Gogab uṅgura waṅ tuṅaṅ durkeb epte ma katnayiṅ. Tontiṅbe Al Kuruṅ mere ird ird niṅ wilakṅeṅ nurde haṅ. Gega ulṅiṅbe piṅeṅ heṅ haṅ,” yinyiṅ. ⁴² Irdeb sopte yubul teṅ kuṅ Al Kuruṅ mere irdeb, “Ado, kanduk ga ne beleṅ ma teweṅbe kanduk gayen pasi irtek beleṅ miṅmoṅ hiyeṅ kenem nebe dufayge po gama irdeb teweṅ,” yiriṅ.

⁴³ Be, Al Kuruṅ mere irde pasi heṅbe sopte mulgaṅ heṅ kuṅ komatmiṅ karwo gob diliṅ kanduk hekeb firṅde hike yinyiṅ. ⁴⁴ Yeneṅbe yubul teṅ sopte mulgaṅ heṅ kuṅbe Al Kuruṅ mere iryiṅ gwahade po sopte mere iryiṅ.

⁴⁵ Be, mulgaṅ heṅ kuṅbe komatmiṅ yago goyen,

“Denbe usañ heñ firinḡe po hañ? Ga kennañ! Ne Al Urmiñ gayen mata buluñ mar haniñde nerd nerd nalu gobe bikkeñ gago forok yihi. ⁴⁶ Huwarke kuniñ! Asogo haniñde nertek albe bikkeñ gago waya geb,” yiniñ.

Yesu teñ fere tiyamiñ

(Mak 14:43-50; Luk 22:47-53; Yon 18:3-12)

⁴⁷ Be, Yesu gobe gwaha yeñ hikeyabe komatmiñ kura Yudas gobe al yade wayamiñ. Al buda gobe fulenare niñ bidilaya nukwaya yade wayamiñ. Mel gobe pris buda gote karkuwanmiñya Yuda marte doyañ mar parguwakya belen yad yerke wayamiñ. ⁴⁸ Yesu go asogom haniñde kertek al goreb tetek mar go gaha yiniñ: “Kuñ forok yeñbe mata kura tiyen geb. Al kura aman aman irde ulunḡe u irmeke keneñbe al gobe gog po yeñbe kuñ tenayiñ,” yiniñ. ⁴⁹ Be, Yudas go bikkeñ mere gwahade yiniñde geb, kuñ forok yeñ Yesu hitte kuñbe, “Wawuñ, Tisa,” inenbe ulunḡe u iryiñ. ⁵⁰ Irkeb Yesu belen wol heñbe, “Kadne, gwaha tiye yeñ wayha go gwaha tiya,” inyiñ. Irkeb al wayamiñ mar goreb wañ teñ fere tiyamiñ. ⁵¹ Irkeb Yesu komatmiñ kura yeñ binde hinhin goreb fulenare niñ bidilamiñ marde pris buda gote kurunmiñde meten almiñ kura kirmiñ sapa iryiñ. ⁵² Irkeb Yesu belen, “Bidilage go gasuñenḡe kera! Al kura bidila belen al gasa yiryen gob haniñ wol hekeb gwaha mat po mayke kamyen. ⁵³ Adone gusuñañ irmekeb goyare po miyoñmiñ budam wor po yad yerke katen farañ nurnayiñ gobe ma nurde ha? ⁵⁴ Goyenbe mata gwahade

tiyenbe Al Kurunyen asanđe mata gwahade gwahade forok yiyyen yitiñ goyen daha mat forok yiyyen? Epte moñ,” inyiñ.

⁵⁵ Gwaha inenbe Yesu go yen ten fere titek mar goyen, “Ne gayen kawe mar yad kuñ hime geb, gago fulenare niñ bidilaya nukwaya manañ wañ nawarniñ ten hañ? Nebe nanƙahalmiñ nanƙahalmiñ Al Kurunyen ya bana saba tagalde himekeyabe ma nade hanjen. ⁵⁶ Goyenbe Al Kurunyen asanđe mere basañ marmiñ belen kame mata gwahade forok yiyyen yen kayamiñ goyen den belen gago ten hañ,” yinyiñ. Be, komatmiñ yagobe tumñan Yesu tubul ten busaharamiñ.

Yesu pris buda gote kurunmin diliñ mar huwaryiñ

(Mak 14:53-65; Luk 22:54-55,63-71; Yon 18:13-14,19-24)

⁵⁷ Be, Yesube pris buda gote kurunmin Kaiafas hitte tukamiñ. Gorbe Moseyen saba marya Yuda marte doyañ mar parguwak yagoya gabu iramiñ.

⁵⁸ Be, Pita go mel gore Yesu ten kuñ hikeya gisaw yarham po heñ gama irde kuriñ. Kuñ kuñbe pris buda gote kurunmin Kaiafasyen ya koya belen po milgu irtiñ bana goñ al gabu irde hanjen sawsaware hurkuriñ. Hurkuñbe daha kura tike keneñ yen ya go doyañ irde hanjen mar keperde hinhande gor kuñ kipiryiñ.

⁵⁹ Be, pris buda gote karkuwanminya Yuda marte doyañ marya goyen tumñan gabu irde da misiñde wor po Yesu go mayteke kamyen yen mere sege iramiñ. Goyenbe miñ kura ma keneñbe goke nanƙenamiñ. ⁶⁰ Irkeb al budam

wan̄ Yesu tagal unen̄ unen̄ niñ usi mere budam yad forok yiramin̄. Gega Yesu maytek meremin̄ iğin̄ kura ma kenamin̄. Irkeb̄ kuñ kuñ funañ al irawa kura wan̄be, ⁶¹ “Al gareb, ‘Al Kurun̄yen ya balem goyen upew urde sopte gergen̄ irde nan̄a fay karwore pasi ireñ,’ yeke nuraruñ,” yaryum.

⁶² Be, pris buda gote kurun̄min̄ Kaiafas belen̄ huwardeb̄ Yesu goyen, “Mere kurun̄ ulger irhar gabe wol ma hawayin̄?” inyin̄. ⁶³ Goyenbe Yesu go meremin̄ ma wol heñ balmin̄ po hin-hin. Irkeb̄ sopte, “Ne belen̄ Al Kurun̄ gwahader hitin̄ gote san̄in̄de ginhem geb, gebe Mesaia Al Kurun̄ Urmin̄ ma dahade goyen momon̄ dira,” inyin̄. ⁶⁴ Gwaha inkeb̄ Yesu belen̄ wol heñbe, “Dindiken̄ gog po yahañ. Goyenbe ne belen̄be den̄ kurun̄ gayen gaha dinen̄. Kame ne Al Urmin̄ gabe Al Kurun̄ san̄in̄ min̄yan̄ Al gote hanin̄ yase belen̄ mat keperde nan̄kin̄de gagap hende katen̄ himeke nennayin̄,” yinyin̄. ⁶⁵ Irkeb̄ pris buda gote kurun̄min̄ gore mere goyen nurdeb̄, “Al gabe Al Kurun̄ sukal ira,” yen̄ biñ ar yeke ulin̄hormin̄ erek irdeb̄, “Niñgeb̄ danin̄ mere hoyañ niñ nan̄kentek? Al Kurun̄ sukal ira gobe den̄ tumñan̄ nurhan̄ gago. ⁶⁶ Niñgeb̄ den̄be dahade nurde han̄?” yinen̄ gusun̄an̄ yiryin̄. Irkeb̄ wol heñbe, “Kamyen̄ po!” inamin̄. ⁶⁷ Irdeb̄ al gor hinhan̄ goreb̄ Yesu kimin̄de meyan̄ iramin̄. ⁶⁸ Irdeb̄ kimin̄ mala ten̄be hanin̄ mupi irde mayamin̄. Kura belen̄be palasi irdeb̄, “Mesaia, ganun̄ belen̄ muguna? Momon̄ dira!” inamin̄.

Pita belen Yesu niŋ helwan hiriŋ
(*Mak 14:66-72; Luk 22:56-62; Yon 18:15-18,25-27*)

⁶⁹ Be, goyarebe Pita go ya go biŋ bana saw-saware gor keperde hinhin. Irkeb meten bere kura gore wanbe, “Ge manan Yesu Galili niŋ al goya kuŋ hinaryum,” inyiŋ. ⁷⁰ Irkeb Pita belenbe al tumnan gor hinhan gote diliŋ mar helwan henbe, “Neb goke kura yeŋ ha yeŋ ma nurde hime,” inyiŋ. ⁷¹ Irdeb gasuŋ hinhin go tubul tenbe kuŋ yamere huwarde hikeb bere kura gore wan kenenbe al buda gor hinhan goyen, “Al gabe Nasaret niŋ al Yesuya kuŋ haryen,” yiriŋ. ⁷² Irkeb Pita gore teban po helwan henbe, “Fudinde wor po, nebe al gobe ma nurde unen hime,” yiriŋ.

⁷³ Be, hitnen muŋ kura tenbe al gor hinhan goreb Pita goyen, “Mere tike melakge nurhet gobe Yesu gama irde hanyen mar al kurabe ge gago yeŋ nurhet,” inamiŋ. ⁷⁴ Irkeb Pita belenbe mere fudinde po tihim yeŋ biŋa tenbe, “Fudinde wor po dineŋ hime. Neb al goke yeŋ haŋ yeŋ ma nurde hime,” yinyiŋ. Irkeb goyare po tatirok mere tiyyiŋ. ⁷⁵ Irkeb Pita go Yesu belen, “Tatirok ma mere tikeyabe ne niŋ yeŋ wawuŋ karwore, ‘Al gob ma nurde unen hime,’ yawayiŋ,” inyiŋ goke biŋ bak yiriŋ. Irkeb sinare katen kuŋ mata tiyyiŋ goke biŋde misiŋ wor po nurdeb esiriŋ.

27

Yesu go Pailat hitte ten kwamiŋ
(*Mak 15:1; Luk 23:1-2; Yon 18:28-32*)

¹ Be, wampot muñ wor pobe pris buda gote karkuwanmiñya Yuda marte doyañ mar par-guwakya beleş mere maydeb, “Yesube mayteke kamyen,” yamiñ. ² Irdeb haniñ fere tenbe Pailat hitte tukamiñ. Pailatbe Roma gabman al Yudia naña doyañ irde hiyen.

Yudas kamyin
(Aposel 1:18-19)

³ Be, asogo haniñde kiryiñ al Yudasbe Yesu go merem yañ irde mayke kamtek heke kenenbe mata buluñ tiyyiñ goke bunineñ nuryiñ. Irdeb silwa hora 30 damu iramiñ goyen pris buda gote karkuwanmiñya Yuda marte doyañ mar par-guwakya hitte yumulgañ tiyyiñ. ⁴ “Mata buluñ miñmoñ al goyen kami yeñ hantiñde kirmiñ. Niñgeb mata buluñ timiñ,” yinyiñ. Irkeb wol henbe, “Gobe nende samuñ moñ be. Gere kanduk geb,” inamiñ. ⁵ Gwaha inkeb biñ ar yekeb hora go Al Kurunyen ya balem bana goñ yemeyde kuriñ. Kuñbe beñe ten kamyiñ.

⁶ Be, hora yimiyyiñ gobe pris buda gote karkuwanmiñ beleş pilgañ henbe, “Hora gabe al kami yeñ damu titiñ. Moseyen sabarebe hora gahade gayen epte ma Al Kuruñ niñ unnayiñ yitiñ. ⁷ Niñgeb hora ga yade naña hoyande niñ mar Yerusalem wañ kamke mete ten hitek yeñ kuwe ird ird alyen megen goyen damu titek,” yeñ mere sege iramiñ. ⁸ Goke tenbe naña tapum gobe “Al Kamtiñde” inamiñ. Gayenter wor gwahade po inen hañ. ⁹ Niñgeb Al Kurunyen mere basañ al Yeremaia beleş mere kayyiñ gobe gwaha mat igineñ kawan hiriñ. Merebe gahade:

“Israel marbe yeŋ mayteke kami yeŋbe silwa hora 30 gore al damu tiyamiŋ.

¹⁰ Irde Doyaŋ Al Kuruŋ beleŋ gwaha gwaha tiyayiŋ ninyiŋ gwahade po, mel gobe hora go teŋbe kuwe ird ird alyen megeŋ damu tiyamiŋ,” yitiŋ hi. *Sekaraia 11:12-13; Yeremaia 32:6-9*

Gebe Yuda marte doyaŋ al kuruŋ we?

(Mak 15:2-5; Luk 23:3-5; Yon 18:33-38)

¹¹ Be, mel go goŋ gwaha teŋ hikeyabe Yesu gobe Roma gabman al Yudia naŋa doyaŋ irde hiyen al Pailat diliŋ mar huwaryiŋ. Irkeb, “Ge gayenbe Yuda marte doyaŋ al kuruŋ we?” inyiŋ. Irkeb, “Gwaha, gigen yaha gog po,” inyiŋ.

¹² Be, pris buda gote karkuwaŋmiŋya Yuda marte doyaŋ mar parguwakya beleŋ tagal unamiŋ. Gega Yesube meremiŋ wol ma hiriŋ.

¹³ Irkeb Pailat beleŋ, “Mel gare miŋge girde tagal guneŋ haŋ gabe kura ma wol hawayiŋ?” inyiŋ.

¹⁴ Goyenpoga Yesu beleŋ mel gote mere go muŋ kura ma po wol hiriŋ. Irkeb Pailat beleŋ go keneŋbe diliŋ fot yiriŋ.

Pailat beleŋ Yesu tubul timeke kwi yiriŋ

(Mak 15:6-15; Luk 23:13-25; Yon 18:39–19:16)

¹⁵ Be, goyenterbe damam damam Pasoba dula nalurebe Pailat beleŋ koyare hinhan mar goyen al kura teŋ siŋa irde hiyen. Al gobe Yuda mar beleŋ al gwahade inke gab gwaha teŋ hiyen.

¹⁶ Be, goyenterbe al buluŋ wor po yeŋ nurd uneŋ hanyen al Barabas goyen koyare hinhin.

¹⁷⁻¹⁸ Be, Pailatbe yiŋgeŋ dufaymiŋdeb, ‘Yuda marte doyaŋ mar gabe al budam Yesu gayen

gama irde hike yenenbe daniñ neñ gwahade moñ yeñ nurdeb yeñ ge iğin ma nurde mayke kami yeñ gago tawayhan,’ yeñ nuryin. Niñgeb al buda kurun goyen gabu irkeb, “Al damin tubul timeke kuyen? Barabas ma Mesaia inen han Yesu gayen?” yeñ gusunan yiryin.

¹⁹ Be, Pailat go mere nurd nurd gasunde keperde hikeyabe berem belen mere gahade asande kan ten kerke wayyin: “Al go daha wet kura ire ire ma tiyayin. Yenbe merem moñ. Han ka mite tihim. Niñgeb bener ga yeñ ge kanduknen wor po nurde hime. Tubul po tiyayin,” inyin. ²⁰ Goyenbe pris buda gote karkuwanminya Yuda marte doyan mar par-guwakya belen al buda kurun gabu iramin goyen hakot bin yawaramin. Irde, “‘Barabas tubul tike kwi. Munan Yesube mayke kami,’ innayin,” yinamin.

²¹ Be, Pailat belen al buda go, “Al irawa gayen ganunbe tubul timeke kuyen?” yinen gusunan yiryin. Irkeb, “Barabas,” yamin. ²² Irkeb wol henbe, “Niñgeb Mesaia inen han al gab daha iren?” yinyin. Irkeb al buda kurun goreb, “Kuruse hende mayke kami!” yamin. ²³ Irkeb Pailat belen, “Daniñ? Al gabe da mata bulun kura tiyun?” yinyin. Gega ugun po, “Kuruse hende mayke kami ko!” yamin.

²⁴ Be, Pailat go gwaha kura titek ma hirin. Irde al buda kurun go fulen forok irnin tike yenenbe fe ten mel gote dilin mar hanin halyin. Irdeb, “Al ga kamen tiya gabe neya neya moñ. Gabe dende samun po geb,” yinyin. ²⁵ Irkeb, “Igin,

yeŋ kamyen gote merembe nenya diriŋniniŋ yago kame forok yenayiŋ gore tetek,” inamiŋ. ²⁶ Irkeb Barabas go mel gote mere nurdeb tubul tike kuriŋ. Goyenbe Yesu go usulak teŋ kuruse hende maynaŋ yeŋbe fuleŋa marminiŋ haniŋde tubul tiyyiŋ.

Fuleŋa mar beleŋ Yesu giwgiw iramiŋ
(Mak 15:16-20; Yon 19:2-3)

²⁷ Be, Roma gabmanyen fuleŋa mar go Yesu teŋ Pailatyen ya kurun bana goŋ tukamiŋ. Irdeb fuleŋa mar kadom goya tumŋaŋ Yesu milgu iramiŋ. ²⁸ Irdeb uliŋhormiŋ tumŋaŋ yugu teŋ gab doyaŋ marte uliŋhor bukkeŋ yara goyen kerd unamiŋ. ²⁹ Irdeb kaŋ hirwaŋeŋ yaŋ goyen bili bili irde doyaŋ al kurunyen tonan umŋa irhet usi teŋ tonanŋde keramiŋ. Irde doyaŋ alyen kutum kura teŋ haniŋ yase beleŋ kerde fuleŋa mar gore Yesu diliŋde waŋ dokolhoŋ yuguluŋ teŋbe, “Fudinde wor po, Yuda marte doyaŋ al kurun,” inen giwgiw irdeb bak mayde iramiŋ. ³⁰ Irde meyaŋ irde kutum tanarde hinhin goyen po goran irde tonanŋde mayde teban irde hinhin. ³¹ Gwaha irde giwgiw irdeb uliŋhor bukkeŋ yara go tugu teŋbe yende uliŋhor wor po goyen yerde unamiŋ. Irdeb tukun kuruse hende maytek yeŋ teŋ kwamiŋ.

Kuruse hende mayke kamyiŋ
(Mak 15:21-32; Luk 23:26-43; Yon 19:17-27)

³² Be, beleŋyaŋ hako kun henyaŋbe al kura Sairini taunde niŋ al deŋem Saimon keneŋbe Yesuyen kuruse tawa inen pakku irke tiriŋ. ³³ Be, kun kun naŋa deŋe kura Golgota gor forok yamiŋ. Golgota gote miŋbe “al tonan kiŋkiniŋde”.

³⁴ Gorbe wainya he fimiñ urekya suluk irtin goyen unke ninam uryin gega, nen nen nin bada hirin. ³⁵ Yesu go kuruse hende kerde hikeb ulin umñamin ganun belen yawaryen yen yende matare tilin tanardeb pota yiramin. ³⁶ Gwaha tenbe daha kura tike kentuk yen keperde kenen hinhan. ³⁷ Irde da misinde Yesu mayamin goyen he parwek hende katin goyen kuruse tonan belen keramin. Merebe gahade:

AL GABE YESU. YUDA MARTE DOYAN AL KURUN

³⁸ Be, kawe al irawa kura goyen wor kuruse hende yeramin. Kurabe Yesuyen kuruse yase belen mat, munan kurabe tapa belen mat keramin. ³⁹ Al kun wan ten kenenbe birun birun ten giwgiw irdeb, ⁴⁰ “Ge gayen Al Kurunen ya balem upew urde sopte gergen irde nana fay karworeb pasi iren yawan al gobe ge gago? Irde geb Al Kurun Urmin kenenbe tarenger kuruse hende mat kata,” inamin. ⁴¹ Irde pris buda gote karkuwanminya Moseyen saba marya Yuda marte doyan mar parguwakya belen wor gwahade po inen ayan keramin. ⁴² “Al gabe al hoyanbe faran yurde hinhin gega, yingenbe epte ma faran uryen. Yenbe Israel marte doyan al kurun go. Kuruse hende mat katke kenen gabe dufayninin yen ge sanin irnin be! ⁴³ Yenbe Al Kurun nin heken nurde hiyen, irde ‘Neb Al Kurun Urmin,’ yen hiyen geb, tubul tike Al Kurun belen faran urenbe faran uri,” inamin. ⁴⁴ Irkeb kawe al irawa kuruse hende hinaryum go wor gwahade po sukal iraryum.

*Yesu kamyin**(Mak 15:33-41; Luk 23:44-49; Yon 19:28-30)*

⁴⁵ Be, nana banƙahal wor po hekeyabe nana bana kurun gob tumnan kidoma beɓe aw urtinde hike kun kunbe wawunbana 3 kilok hewen tiyyin. ⁴⁶ Be, 3 kilok binde hekeb Yesu go ug po, “Eloi, Eloi, lama sabaktani!” yirin. Mere gote minbe, “Al Kurunne, Al Kurunne, danin nubil taha!”

⁴⁷ Be, mere go al kura gor huwarde hinhan gore nurdeb, “Elaia deɓe urde hi,” yamin. ⁴⁸ Irdeb aran po al kura kup yen kun amil erek irde wain finin mukkuwen bana gon kerke ulin hekeb ten kutum ulyande giti irdeb Yesu unyin. ⁴⁹ Goyenbe al hoyan goreb, “Elaia wet wan faran urke kentek geb, tubul tike gwaha kura tiya yen kinni,” yamin.

⁵⁰ Be, sopte po Yesu go ugun po mere tenbe bin sul yirin. ⁵¹ Goya goyenbe Al Kurunen ya balem bana amil gasun himam wor po diba irtin hinhan goyen kahalte po hem beɓe mat erek yen bam beɓe katyin. Megeɓ manan diririt yen hora karkuwan karkuwanbe gilgalan iramin. ⁵² Al hakwam yirtin bamba goyen hol yen tukamin. Irkeb Al Kurun dilinde al wukken heɓ kamamin goyen budam sopte huwamin. ⁵³ Irde be-mba sinare katenbe kame Yesu sopte huwaryin nalureb Yerusalem taun kurunde kun al budam hitte forok yeke yemin.

⁵⁴ Be, Roma gabmanyen fulen marte doyan alya fulen marminya Yesu doyan irde hinhan goyen nininaya mata gor forok yirin kurun go

kenej kafura henbe, “Fudinde wor po, yenbe Al Kurun Urminj,” yaminj.

⁵⁵ Bere budam Galili nanjare mat Yesu gama irde faranj urde kunj hanjen goyen wor gor hen gisaw mat kenej hinhan. ⁵⁶ Bere goyen kurabe Makdala ninj Maria, Yemsya Yosepyat milinj Maria, irde Sebedi urminj waranj Yemsya Yonyat milinj.

Yesu mete tiyaminj

(Mak 15:42-47; Luk 23:50-55; Yon 19:38-42)

⁵⁷ Be, Yesu kamyinj goyen kunj wawunbana wor po hewenj tikeb Arimatea taunde ninj al samunminj budam kura goyen wayyinj. Denembe Yosep. Yen wor Yesu gama irde hiyen. ⁵⁸ Be, al gore kunjbe, “Yesu hakwam nunke mete tiye,” inenj Pailat gusunanj iryinj. Irkeb Pailat belenj, “Iginj, gwaha tiyayinj,” inyinj. ⁵⁹ Irkeb Yosep belenj Yesu hakwam goyen tenj amil faykek gergen belenj po mala tenj ⁶⁰ tukunbe yingenj, “Kammeke nernayinj,” yirinj bema goyen bana kiryinj. Irde hora kurun milinj kura goyen yenya kwaminj marya gore gilongilonj irde tukun bema gote yamem pet tenjbe kwaminj. ⁶¹ Irkeb bere iraw kura horabok gote dilinj mar sinja hoyanj belenj mat hinaryum. Makdala ninj Mariayabe Maria hoyanj kura goya belenj gwaha tiyaryum.

Bemba doyanj irde hinhan mar

⁶² Be, Sabat nalu fay urkeb pris buda gote karkuwanminjya Farisi marya belenj Pailat hitte kwaminj. ⁶³ Kunjbe, “Doyanj al, usi al gar go hinhinyabe, ‘Kamenjde mat kunj yerenjekek hekeb huwarenj,’ yenj hinhin goyen binininj bak yekeb

gago wayhet. ⁶⁴ Niñgeb fulenja marge hulyan yirke hanja mat kuñ molye bana goyen bamba go doyan irde hinayin. Monjo komatmin yago beley wan hakwam goyen hoyande tukunbe, 'Kamtinde mat huwarun,' yenayin geb. Irkeb al budam usi mere go nurde dufaymin bulun henayin. Gote kandukbe hanjapya, 'Nebe Mesaia,' yinen al usi yirde hinhin gote kanduk fole iryen," inamin. ⁶⁵ Irkeb Pailat beley, "Fulenja marne kura yukun den nurhan gwahade po kenkela yinke bamba go doyan irde hinayin," yinyin. ⁶⁶ Irkeb mel go kuñ bamba yamere nin hora kurun goyen al kura beley ma fegelnayin yen bisam irde go hende diba iramin. Irdeb fulenja mar goyen, "Gar hen kenkela doyan irde hinan ko!" yinamin.

28

*Yesu kamyinde mat huwaryin
(Mak 16:1-10; Luk 24:1-12; Yon 20:1-10)*

¹ Be, Sabat nalu hubu hen kuñ wawun hen fay ureñ tiyyin. Irkeb Makdala nin Mariaya Maria hoyan kura goya gore Yesu hakwam keramin gasun goyen kenye yen kwaryum.

² Be, bembare gorbe niniña kurun forok yirin. Gobe Doyan Al Kurun hitte mat miyonmin kura katen bamba gote yame hora kurun go kan kan irde hol irde go hende keperde hinhin geb, gogo tiyyin. ³ Yenbe ulinya dinsokyabe dagamel go gwahade epte ma kenkela kentek hinhin. Ulinhormin manan faykek wor po.

⁴ Be, fulenja mar gor hinhan gobe miyon go kenenbe kafura wor po hej barbar yej kamtin hakwam yara haminj.

⁵ Be, miyon gore bere irawa go yenenbe, “Kafura hej ma. Yesu kuruse hende mayke kamun al goke nankenen har yej nurde hime. ⁶ Gega yenje gar ma hi. Huwarenj yej hinhin go gwahade po huwara. Iginge wan hakwam keranj gasun ga kinyi. ⁷ Irde aranj kuj komatminj yago goyen, ‘Yesube kamunde mat huwara geb, yej wa mehen hej Galili nanare kwenj tiya. Gon gab kuj kennayinj,’ yiniryen. Mere gayen momonj dire yej gago wayhem geb,” yinyinj.

⁸ Be, bere iraw gob kafura haryum. Goyenbe mere go nurdeb amanj haryum. Irdeb bema go aranj po tubul tenj Yesuyen komatminj yago momonj yirye yej kup yej kwaryum. ⁹ Be, bere go mata gwahade forok yewenj tiya yej ma nurde kuj hikeya Yesu belen forok yenje, “Wampot,” yinyinj. Irkeb irem gobe kenenj bebak tenje kuj kahanje tanarde dolonj iraryum. ¹⁰ Irkeb, “Kafura hej ma. Kuj dine yago yinke Galili nanare kuj gab nennayinj,” yinyinj.

Fulenja mar belen usi tenj hinhan

¹¹ Be, bere irawa go hako ga mulganj hej hikeyabe fulenja mar bema doyanj irde hinhan mar goyen kura belen taunde kujbe mata forok yeke yenaminj kurunj goyen pris buda gote karkuwaminj momonj yiraminj. ¹² Irkeb Yuda marte doyanj mar parguwak hitte kuj momonj yirdeb mere kura sege iraminj. Irdeb fulenja mar go hora kurunj yunenbe gaha yinaminj. ¹³ “Sinare

kuṅbe mere gahade al momoṅ yirde tukunṅ hi-nayiṅ: ‘Neṅbe wawunṅ ferde ug hetekeya komatmiṅ yago beṅeṅ waṅ hakwam goyen kawem teṅ kwanṅ,’ gwaha yeṅ hinayiṅ. ¹⁴ Munanṅ mere momoṅ gayen kuṅ doyaṅ altiṅ Pailat hitte forok yekeb neṅ beṅeṅ kuṅ keneṅbe igiṅ mat mere irtek geb, deṅbe merem yaṅ ma diryeṅ,” yinamiṅ. ¹⁵ Gwaha yinkeb fulenṅa mar gobe horamiṅ go yadeb mel gore yinamiṅ gwahade po tiyamiṅ. Niṅgeb goyen mere gobe tagalkeb waṅ waṅ gayenter niṅ Yuda mar wor tagalde haṅ.

Komatmiṅ metenṅ kurunṅ yunyiṅ

(Mak 16:14-18; Luk 24:36-49; Yon 20:19-23; Aposel 1:6-8)

¹⁶ Be, Yesu yiriṅ gwahade po komatmiṅ 11 go Galili naṅa bana goṅ niṅ dugu kura gor kunayiṅ yinyiṅde gor kwamiṅ. ¹⁷ Kuṅ keneṅbe dolonṅ irde turunṅ iramiṅ. Munanṅ kurabe dufay kura kura hamiṅ. ¹⁸ Irkeb Yesu go bindere waṅbe, “Nanṅkiṅya megeṅya kurunṅ gayen doyaṅ yird yird tareṅbe ne nuntiṅ hi. ¹⁹ Niṅgeb deṅ beṅeṅ kuṅ al megen hike kwa kurunṅ gayen merene basanṅ heṅ tagalde tukunayiṅ. Irde merene nurnayiṅ marbe Al Kurunṅya Urmiṅyabe Holi Spiritiyat deṅemde baptais yirde komatne yirde hinayiṅ. ²⁰ Irde mata gwaha gwaha teṅ hinayiṅ diniṅ hinhem kurunṅ goyen mel go wor gama yirnanṅ yeṅ saba yirde hinayiṅ. Fudinde wor po, nebe dubul ma wor po tiyeṅ. Deṅya tumṅaṅ hiteke kuṅ kuṅ nalu funanṅ forok yiyyeṅ,” yinyiṅ.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab